

**NATIONAL ASSEMBLY OF
SEYCHELLES**

Wednesday 24th July 2024

The Assembly met at 9am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Bonzour tou Manm Onorab, tou Staff Sekretarya e piblik ki pe ekout nou nenport landrwa kot zot ete.

Bonzour, byenveni pour travay Lasanble Nasyonal pour sa Merkredi 24 juillet.

Nou travay ozordi pour prensipalman dominen par 2 Mosyon ki lo *Order Paper* alor nou ava kommanse. E premye Mosyon ki lo *Order Paper* ozordi i dan non Manm Elekte pour distrik Au Cap Onorab Samynadin... *err hold on*.

LGB, ou annan...?

HON BERNARD GEORGES

Wi, bonzour Mr Speaker. Bonzour tou bann Manm Onorab e tou dimoun ki pe ekout nou.

Mr Speaker, mon ti'n demann avek Speaker

Mancienne permision pou mwan bomaten dir detrwa mo lo *World Mangroves Day*.

MR DEPUTY SPEAKER

I pa ti'n dir mwan naryen, solman mon asire ou pe koz laverite ler ou'n dir mwan ou'n koz avek li, so si i ti'n donn son konsantman, ok nou ava fer sa.

HON BERNARD GEORGES

Mersi Mr Speaker. Mr Speaker, mon pour kourt me mon pa kapab mank sa lokazyon pour mwan dir detrwa mo la ki Lazournen Prezervasyon ekosistenn mangliye.

Mangrove Ecosystem Preservation Day pe vini Vandredi, pour mwan dir 2 mo lo sa lespes ki en lespes anvwad disparisyon dan bokou parti lemonn, me ki annan en gran litilite e avek en ekosistenn tre enportan.

Mon pran laparol bomaten pour 2 rezon; premyerman pour fer rapel ki enn bann pli gran area Sesel ki annan manglier ladan se Atol Aldabra avek bann lezot zil dan group Aldabra, Astove avek Cosmoledo.

E ki Aldabra—li tousel, parey nou konnen e nou'n aprann resaman i annan zis bann manglier Aldabra i en

carbon sink ki neutralise tou bann emisyon.

Bann gaz lefedser ki nou kapab met dan latmosfer isi Sesel.

Dezyenm keksoz mon ti a kontan dir bomaten, se felisit sa lorganizasyon nou Lasanble (*EPIC*) ki pe travay ekstraordinerman byen sa domenn e ki'n prezerv sa morso manglier ki zis par deryer nou Lasanble isi.

E ki pe fer en travay ekstraordiner e parey nou konnen, nou vwar dan *lobby* zot in mont en leksposizyon tre, tre enteresan e mon ankouraz tou dimoun pour vizit sa leksposizyon.

An partikilye, mon ti a kontan remersye Deputy Clerk ki ansarz sa, sa linisyativ e osi remersye tou bann Manm Lasanble Nasional e *Staff Sekretarya* ki donn zot letan pour prezerv sa morso manglier, e osi pour al travay dan bann lezot landrwa.

Mon ti a finalman osi kontan remersye tou bann dimoun dan bann kominote, dan bann distrik, dan bann lorganizasyon e bann endividzot menm, ki pe travay atraver pei pour prezerv leko sistenm manglier.

Ki parey mon'n dir i en leko sistenm tre, tre enportan

dan nou pli gran panoplie leko sistenm ki nou annan isi Sesel.

E finalman Mr Speaker, mon ti a kontan ankouraz tou bann Manm pour partisip Vandredi dan sa kozri ki pou ganny fer kot *Coast Guard* lo sa lespes, e lo son prezervasyon.

Mr Speaker, mon remersye ou.

MR DEPUTY SPEAKER

Mersi *LGB* pour sa bann mo ki mon swete in fer bann Manm aprann en keksoz ouswa de, ki otreman pa ti a nou laporte.

Donk, prezan nou a kontinyen ek nou *Order Paper* parey nou ti'n konmanse e mon pour envit Onorab Samynadin pour prezant son Mosyon.

Nou ava segonde *and then* nou ava retourn lo ou, pour ou lantervansyon. Onorab?

HON KELLY SAMYNADIN

Mersi Mr Speaker, bonzour Mr Speaker, tou mon bann koleg Onorab, tou *staff* Lasanble tou dimoun a le kout.

Mr Speaker, Mosyon i lir konm swivan;

Avek bi pour kontinyelman ankouraz nou bann zenn pou viv en lavi ki sen. E pour promot lespri pozitivite dan nou pei, Lasanble pe demann avek tou parti prenan, enkli piblik an zeneral,

pour partisip plis dan bann aktivite ki ranforsi en devlopman moral e spirityel solid. Mersi Mr Speaker.

MR DEPUTY SPEAKER

Mersi Onorab Samynadin e Onorab Roucou ki pe segonde?
Please proceed.

HON MICHEL ROUCOU

Mersi Mr Speaker. Bonzour *a tous*, bonzour tou Manm Onorab osi tou dimoun ki a lekout.

Mr Speaker, mon annan plezir pour mwan segonn Mosyon anmennen par Onorab Kelly Samynadin, en zenn vreman pozitiv. Mersi.

MR DEPUTY SPEAKER

Mersi Onorab. Donk, aprezan nou ava envit Onorab Samynadin pour fer ou prezantasyon silvouple.

Hold on Onorab Naidu, mon war ou lanmen anler.

HON SATHYA NAIDU

Yes, Mr Speaker, mon le lev en *matter of privilege* baze lo serten alegasyon ki'n ganny fer lo mwan avek Minis Dezinyen yer dan deliberasyon mon koleg Onorab, lo lot kote latab...

MR DEPUTY SPEAKER

Ok, ok...

HON SATHYA NAIDU

E i enportan ki mon klarifye...

MR DEPUTY SPEAKER

Yes ok, hold on, hold on.

Akoz ou pe lev en *matter of privilege* ou ti'n merit vin dir mon avan, avans e nou pour met li annakor avek *Order 25*.

HON SATHYA NAIDU

Ok.

MR DEPUTY SPEAKER

So nou pa pour kapab pran li la, me pli tar.

HON SATHYA NAIDU

Alright.

MR DEPUTY SPEAKER

So la nou pour *proceed* avek - si ou ti'n fer li avan i ti pour en lot size me...

HON SATHYA NAIDU

I ok Mr Speaker, nou tou nou aprann. Mersi.

MR DEPUTY SPEAKER

Wi Onorab Samynadin, nou ava kontinyen avek ou entervansyon. Mersi.

HON KELLY SAMYNADIN

Mersi Mr Speaker. Mr Speaker, dan en sosyete ki pe vitman evolye i vreman krisyal ki nou

priyoritiz—developman. Lartik 42(2) nou Konstitisyon i dir ki “*it shall be the duty of every citizen of Seychelles to contribute towards the wellbeing of the community*”.

Lazenes i form parti en gran cours nou popilasyon e zot osi zot donn lanmenm kontribye anver developman e lepanouisman nou pei, ki swa lo en baz ekonomik, sosyal ou kiltirel.

Mon pour konmans mon lentervansyon sitan Heather Rines en *fashion and lifestyle blogger* ki son focus prensipal i pou viv avek en *mindset* pozitiv.

E ki mannyer pour apresye lavi toulezour. I dir e mon sit li «pozitivite i en *mindset* e en fason viv, i en swa ki ou annan pour fer dan lavi, dan lavi i annan moman o ensi ki moman ba. E parfwa dernyen keksoz ki pas dan nou lespri se pour reste pozitiv. I normal-e *healthy* pour nou santi nou santi sagrinasyon, lakoler, fristrasyon eksetera.

I osi ok pour santi sa bann lemosyon akoz nou tou nou imen. En lespri pozitiv i an kordinasyon avek karakter en dimoun e osi dan lafason ki i reakte avek serten sityasyon.

Evidaman nou pa kapab evit bann move sityasyon me sa ki nou kapab fer se swazir pou

bouz devan e *focus* lo bann bon keksoz.” Fen sitasyon

Lo sa laliny Mr Speaker, mon pour bezwen admet ki malgre pozitivite i annan pour fer avek *mindset* e *lifestyle* an priyorite, me i annan nesesite pour annan bann mekanizm ek *platform* pour ki nou bann zenn i kapab manifeste sa.

Lo sa *note* mon pa pou fer zistis si mon pa mansyonn Konsey Nasyonal pour Lazenes Sesel byen koni konman SYNC.

Ki li son vizyon i pour rann bann zenn pli abil pour vin responsab, motive e antisipe pour kontribye anver zot prop byennet, ensi ki sa ki pour nou pei Sesel. Zot misyon i pour fer provizyon loportinite egal.

An sa ki konsern developman fizik, artistik, spirityel edikasyonnel ensi ki moral atraver *empowerment*, partisipasyon bann programm ek *advocacy* lentere bann zenn ki lo nivo nasyonal osi byen ki enternasyonal.—Sa Konsey Mr Speaker, i annan manda pour travay avek bann zenn aze 15 a 30 an.

E son bann partener kle se bann lorganizasyon lazenes, bann lenstitisyon segonder e pos-segonder ek bann lorganizasyon non gouvernmantal.

Enn zot bann pwen fokalizasyon kle se sa ki nou apel *active citizenship* kot SNYC i ankouraz bann zenn pour angaze dan zot kominote e devlop bann *leadership skills*.

Bann Programm *Young Citizens* ek Lasanble Lazenes kot bann zenn i ganny bann platform pour konpran zot bann dewar sivik, eksprim zot bann lopinyon, e pran par dan bann prosedir *decision making* ki kapab enpakte zot lavi dan en fason ou en lot.

En lot eleman fokalizasyon ki SNYC i fonksyonnen, se atraver sa ki ou apel *professionnalisation of arts*, ki enkli bann linisyativ parey *Taniah's entertainment* ek Latroup Lazenes.

Sa bann tel programm, i ede elev bann novo zenn talan dan *performing arts*, ofer zot lantrenman dan zot lavwa, loportinite performans ek gidans pour pourswiv karyer dan bann diferan form lar.

Latroup Lazenes an partikilye, in determinen dan promosyon bann talan lokal, kot zot ganny akse avek en platform kot zot kapab *showcase* zot bann diferan konpetans ki swa lokal ou eternasyonal.

Mr Speaker, en lot laspe fonksyonnman SNYC se

lantreprenarya. Sa i en domenn kle, anba ki sa Konsey ki siport bann zenn ki annan perspikasite kot devlopman biznes i konsernen.

Bann programm parey bann lokal *grants* ek *Programme de Promotion de l'Entreprenariat des Jeunes*, i fer bann sipor finansyel ek formasyon pour bann zenn antrepreneur.

Sa bann linisyativ i viz ver favorizasyon en kiltir linovasyon ek lotonomi, e ed bann zenn konverti zot bann nide biznes an realite.

Padan ki mon ti pe prepar mon lentervansyon pour sa Mosyon, mon ti konsilte CEO sa Konsey Mr Albert Duncan.

Kot i ti fer mon ganny akse ek bann statistik kredib pour demonstre langazman bann zenn, dan bann diferan servis e loportinite ki SNYC i ofer.

Depi Zanyye ziska Zen 2024 en total 3,061 zenn in akse zot bann programm ek servis. Depi lannen 2023 in konmanse in annan 40 klib lentere ki'n ganny formen.

Zis pour note se bann zenn zot menm ki zer sa bann klib e zot manda se pour fer provizyon en varyete benefis, ki pou an retour kontribye anver zot krwasans personnel, sosyal, e profesyonnel, tel ki *leadership*

development, personal growth langazman sosyal e kominoter, *skills development*, bann soft skills, kreativite ek inovasyon, diversite ek enkliziv, lesanz kiltirel, preparasyon pour lefitir, byennet sosyal e emosyonnel.

Mr Speaker, an sa ki konsern bann programm, i annan 2 seksyon kle anba ki SNYC i fonksyonnen.

Premyerman, se *program area 1 - Youth Leadership and Entrepreneurship Development Section* e anba sa seksyon nou pour trouv bann programm;

Tel ki parey mon'n mansyonnen *Young Citizens, Seychelles National Youth Assembly, Think Tanks* en group leaders profesyonnel volonter.

Local grants, Programme de Promotion de l'Entreprenariat des Jeunes, mobile filming, basketball for good ek the grooming of perfoming arts.

Dezyenmman Mr Speaker, anba *program area 2 Youth Empowerment and Wellbeing Section*, nou kapab war bann lankadreman parey *Youth Tech* ki li i annan pour bi rann bann zenn pli dinamik an sa ki konsern navigasyon *internet*.

I osi annan *Tech Talk* en programm sensibilizasyon pour edik e eksposz bann zenn avek

bann risk e benefis ki annan atraver lavansman teknolozi.

Latroup Lazenes en lot regroupman anba sa seksyon, li i annan pour bi *empower* bann zenn atraver lar dan en konteks kiltirel.

En lot programm anba sa seksyon se, *Connect* ki li son fonksyon se pour provok, elve e ranforsi lasante spirityel e moral bann zenn.

Mr Speaker, anba sa programm, i annan plizyer lezot ankor ki mon pa pour elabor lo la, notaman *Ignite, Upgrade 101, Pocket e Peer Educators Program*

Tousala Mr Speaker, i tout en galeri bann diferan *platform* pozitiv ki a laporte bann zenn, anba parasol SNYC.

Kot zot kapab ganny loportinite partisip dan bann aktivite ki moralman e spirityelman byen, e ki pou osi permet zot viv en lavi ki sen.

Nou bann zenn i fondasyon lavenir nou pei, lenvestisman lagrandisman spirityel e moral i garanti en sisyete ki prosperan e armonye.

Devlopman lazenes ki konstriktiv i favoriz plizyer valer ki enkli rezilyans, responsabilite ek respe.

I prepar bann zenn endividji pour fer fas avek bann

defi avek entegrite e pour kontribye signifikativman dan zot kominote.

Se dan sa laliny ki mon pour demann avek bann regroupman dan kominote, ki enkli Lotorite Distrik pour angaz plis bann zenn dan bann aktivite ki zot organize.

En legzanp re groupman trwazyenm az, madanm ou familyal dan distrik, i kapab organiz en aktivite ki pe envit bann zenn pour partisip ansanm avek zot dan bann aktive kiltirel ou sportif.

Bann zenn i bezwen gidans avek sa ki pli vye, e i enportan ki zot pa ganny kit deryer, apre nou pou dir ki bann zenn pa oule vin angaz ansanm avek zot.

I zis ki parfwa zot pa konnen kote zot pour ale pour zot ganny en sipor.

Dan sa demars nou angaz plis zenn pour partisip dan bann aktivite ki moralman en spirityelman byen, i enportan ki tou bann paterner konsernen i koz enn menm langaz, e vreman angaze.

Premyerman, nou tou nou konnen e nou pour bezwen aksepte ki laprantisaz i konmans dan lakour, e i plizoumwen atraver gidans moral e spirityel.

La fanmir i devret pe enkilke e ankouraz bann valer tel zenerozite, respe, lanmour, konpasyon lonnekte, la zantiyes dan zot zanfan.

Bann diskisyon familyal lo bann size moralite, partisipasyon dan bann size kominoter ek bann pratik spirityel, i kapab enpakte devlopman bann zenn signifikaman.

Dezyenmman Mr Speaker, bokou bann manifestasyon anti sosyal, sirtou bann konportman disipliner i pran plas dan bann lekol, e souvandfwa sa i enteronp prosedir lansennyman ek laprantisaz dan laklas.

Lekol i zwe en rol vital dan formasyon karakter bann zenn, se pour sa rezon ki mon pour kontinyen ensiste ki Minister Ledikasyon, i revwar *curriculum* larelizyon, e fer li vin enn ki pli enkliziv. Bokou etidyan i ganny kit deryer akoz zot krwayans spirityel e zot pa ganny sa posibilite pour vivman angaz dan bann tel diskisyon.

Akoz sa size i viz plis ver en sel afilyasyon relizyez, ti a preferab si sa size i ganny transformen konman enn ki focus plis lo sa laspe moralite.

Akoz se atraver sa ki pour permet bann zenn etablir en baz spirityel solid. Set atraver

bann bon valer ki pour permet zot vin bann bon sitwayen e aprann konn diferansye e aksepte lopinyon lezot.

Set atraver bann bon valer ki nou bann zenn pour kapab konpran lespri volontarya e lenportans pour pa diskrimin lezot malgre zot diferans.

Minister Ledikasyon i devret pe osi fer provizyon plis bann programm *mentorships* ensi ki bann latelye lo *ethical decision making*, avek bi pou promouwar sa sipor siplemanter pour bann ansenyan ek bann paran.

Bann lekol i demann kre en lanvironnman ki selebre diversite ensi ki promot enklisivite. Kot tou etidyan i santi zot apartenir dan zot lenstitisyon malgre zot diferans.

Plis enportan Mr Speaker, mon pou felisit Gouvernman dan son demars, pour garanti ki nou bann zenn ki annan potansyel avanse dan zot karyer, i ganny zot sans pour al fer zot letid pli o nivo, avek bi pour amelyor zot kalifikasyon ek lekspertiz dan domenn ki zot in swazir pour travay.

Trwazyenmman Mr Speaker, bann lorganizasyon kominoter lokal, bann lenstitisyon relizyez, bann klib ensi ki bann lorganizasyon non gouvernmantal, i devret pe

aktivman angaz dan provizyonnan bann *platform*, pour bann zenn kapab eksplor e devlop zot lidantite moral e spirityel.—Bann programm ki focus lo *leadership*, volontarya e leritaz kiltirel i kapab favoriz en sans lapartenans ek rezondet.

Mon rekonnet ki mon' n mansyonn SNYC pli boner, en antite ki pe fer bokou dan lepanouisman bann zenn, me mon santi ki nou bezwen plis NGOs ki annan byennet bann zenn konman zot lobzekatif. Koumsa bann zenn pa ava santi zot restren dan bann swa ki zot annan pour fer.

I osi annan bann dominasyon spirityel ki fer provizyon bann minister zenn, kot laba zot kapab adopte en sans lapartenans.

Me mon santi ki apard sa baz spirityel, i devret annan plis *platform* ou lorganizasyon non gouvernmantal, kot bann zenn i kapab ale, pour devlop zot bann talan artistik, kiltirel ensidswit.

Bann zenn zot menm zot osi zot bezwen leve e ede kre loportinite pour zot, annou pa zis asize espere.

Rode ki mannyer zot kapab fer zot lavwa ganny tande. I annan loportinite pour zot kre bann *platform* oubyen swiv bann programm *empowerment*, pour ki zot ava

osi kapab pran zot *ownership*. Zot osi zot bezwen kapab pran desizyon kritik pour zot lekor e aret depan lo lezot pour pran aksyon lo zot par.

Lo sa not Mr Speaker, mon pour profite pour felisit tou bann zenn dan distrik Au Cap, ki'n pran liniyativ lo zot menm malgre ki zot in bezwen vin vwar mwan pour serten sipor.

Me zot in deside pour vin devan pour kre bann diferan *platform* pour bann zenn dan distrik kapab epanouir.

Ki swa lo en baz sportif, edikasyonnel, environmantal ensidswit.

Mon demann zot pour kontinyen sa bon travay ki zot pe fer, e kontinyen persevere.

Mon pour osi profite pour mon osi pou felisit e remersye bann antite sportif, spesifikman bann federasyon dan sa travay ki zot pe fer, pour angaz plis zenn pour partisip dan bann aktivite oubyen zwenn bann klib sportif.

Sa i ede pour fer zot reste disiplinen e osi reste an deor bann aktivite anti sosyal tel ki labi drog ek lalkol.

Mr Speaker, nou tou nou okouran ki nou pe viv dan *digital age*. E byensir medya ek teknolozi i annan en lenflyians profon lo bann zenn. I enportan bann kontenir ki ankouraz

bann konportman pozitiv. E ki reflekte bann bon valer moral i ganny enkli davantaz lo azanda medya nasyonal.

Bann lorganizasyon ki annan byennet bann zenn konman zot manda, i devret pe servi bann *media campaigns*, bann liniyativ medya sosyal ek bann *online platforms* konman bann zouti efikas, pour fer pase zot bann mesaz lo pozitivite ek lenportans viv en lavi ki moralman e spirityelman sen.

Mr Speaker, mon pa pou kapab termin mon lentervansyon san koz lo rol Gouvernman ek bann *policy makers* dan sa demars pour angaz plis zenn, dan bann aktivite ki moralman e spirityelman sen.

I enportan ki bann Polisi ki siport bann programm developman pour bann zenn ensi ki provizyon bann finansman pour bann liniyativ kominoter i ganny etabli e enplimante.

Sa ki enportan pour fer resorti se ki Minister responsab pour lazene pour tre byento pe lans son novo Polisi lazene.

E mon pour profite pour felisit sa Minister pour sa bann diferan *meeting* konsiltativ ki ti ganny fer pour kapab ganny lopinyon bann zenn, an sa ki konsern zot lekspektasyon

vizavi zot bann diferan konsern e zot lavenir.

I osi enportan pour note ki dan sa prosedir konsiltativ Komite Lazenes MYSCC dan Lasanble Nasional ti osi ganny envite pour partisipe.

E mwan mon enn ki ti ganny sans partisip dan enn sa bann *meeting* konsiltativ ki ti fer lannen pase. Fodre note ki bann zenn ti partisip tre aktivman.

E plizyer konsern vizavi zot letid, lozman, lasante sityasyon drog dan pei, *sport* parmi plizyer ti ganny met devan.

Gouvernman i devret pe travay ver kreasyon bann lanvironnman ki sen e ki siport bann zenn, asir plis akse ek ledikasyon, swa lasante ek bann diferan loportinite pour zot krwasans personnel.

An konklizyon Mr Speaker, mon oule demann avek mon bann koleg Manm Onorab, e tou bann partner byennet lazenes, pour pran en rol aktiv dan promosyon devlopman spirityel e moral bann zenn.

An travayan ansanm nou kapab kre en lanvironnman ki enspir nou bann zenn pour anmenn en lavi ki pozitiv, prodkтив e sen.

Annou ankouraz zot davantaz pour fer en komitman pour angaz zot plis dan bann aktivite ki ranforsi sa bann valer.

Favorizan en zenerasyon ki defann bann prensip lentegrite, konpasyon ek respe, ansanm nou kapab batir en lavenir ki pli briyan, pli pozitiv pour nou pei.

Avek sa Mr Speaker, mon ti a kontan swet tou mon bann koleg Onorab, bonn deliberasyon e mon demann zot pour anmenn zot sipor pour sa Mosyon. Mersi Mr Speaker.

MR DEPUTY SPEAKER

Mersi Onorab Samynadin e sete Onorab Roucou ki ti segonde, eski ou le koz la ouswa reserv...?

Ok ou le koz la? Onorab Roucou please, proceed.

HON MICHEL ROUCOU

Wi, Mr Speaker, bonzour, bonzour *a tous* ankor enn fwa.

Mr Speaker i rann mon plezir ozordi, pour mon koz lo sa Mosyon anmennen par Onorab Samynadin, ki mon swete ki bann zenn kot zot ete zot a kapab ganny bann mesaz pozitiv ki nou konman bann *leaders* nou pe anvoy pour zot.

Mr Speaker, nou tou la anndan, ti annan en moman

letan nou ti zenn, e nou ti annan nou fason ki nou, nou ti anmiz nou lekor; ti annan nou fason mannyer nou ti angaz nou dan diferan aktivite.

E ozordi nou, nou'n war nou kot nou'n bouz lo en lot staz lavi ki ozordi nou'n war nou, nou pe vin en model pour larestan bann zenn parey nou zanfan dan lakour.

Bann zenn dan nou kominote, bann zenn dan bann landrwa kot nou frekante. E ozordi Mr Speaker, mon pa kapab manke pour mwan dir se ki i annan bokou keksoz negativ ki ou kapab dir ki i pe met lavi nou bann zenn ozordi a risk.

E nou, nou bezwen travay ansanm koman en pei li menm li, konman en lekip pour fer sir poudir se ki nou soz sa zenerasyon ki apre demen, apre nou ki zot ki pour pran larelev pei pour fer sir poudir pei i bouz pli devan.

Mr Speaker, annefe mon osi mon reste dan en kominote, mon reste parmi bann zenn. E souvandfwa espesyalman dan *weekend* mon ganny sans pour mon zwenn avek bokou zenn ki sorti plizyer landrwa pour nou kapab fer en pti aktivite parey *sport zwe football*.

E la i pour sirprann ou pou vwar ki mannyer nou zenn li menm li i kontan *sport*, ki

mannyer i angaz li dan keksoz pozitiv li menm li.

E nou konman bann paran - bann adilt nou bezwen rod en fason ki mannyer nou pou kontinyen ankouraz zot, pour zot demen war zot ki zot pa tonm dan bann move frekantasyon.

Mr Speaker, yer annefe mon ti ganny sans pour mwan zwenn en group zenn lekol Mont Fleuri Segonder kot la, i en group benn lekol.

Kot la zot pe fer bokou sikse akoz nasyonalman zot ganny envite pour zot pran par dan diferan aktivite.

E nou bezwen fer sir ki parey bann lide koumsa, la mon pour remersye Minister Ledikasyon ansanm avek SNYC pour zot vin avek en tel lide akoz sa demen i kapab ankouraz bann zenn pour zot pran sa.

Ou kapab dir pran sa nide pour zot vin bann mizisyen ; angaz zot dan bann lezot aktivite ki vreman pozitiv li menm li.

E i ankourazan Mr Speaker, ler ou asize ek sa bann zenn ou war ki mannyer zot annan sa lanvi. Sa lanvi pour zot antre dan serten, mon kapab dir bann serten aktivite parey mizisyen.

E yer osi Mr Speaker, dan mon dyalog avek sa bann zenn, i annan bokou keksoz ki mon konnen poudir zot pe demande, ki i pa pour vin deswit ki pa fasil.

E la nou'n angaze kot nou pou zwenn avek bann *partner* parey kiltir, annan en lot dyalog ansanm avek Minister Ledikasyon, pour fer sir poudir sa programm ki Minister Ledikasyon in mete dan diferan lekol, ki i vin en sikse e osi i ava kapab demen li menm li benefisyé Minister Ledikasyon.

Akoz souvandfwa akademikman Mr Speaker, dan lekol pa tou zanfan ki lo menm nivo, be selman petet sa i a kapab ede pour devlop zot dan en lot fason.

Osi Mr Speaker, yer mon'n ganny sans zwenn avek en zenn garson en artis Mr Speaker, Mr Romel Lesperance ki en etidyan Mont Fleuri.

Ki pour le moman Mr Speaker, i pe tenir premye pozisyon lo *top 10 Télésesel* Mr Speaker, avek son sanson "Mon promes."

Ki sa ou kapab dir i kapab vin en lot sir lankourazman dan, pour bann larestan zenn, pour zot osi kapab swiv dan bann semen pozitiv li menm li koumsa.

E sa i kapab ede demen pour nou kapab ankouraz bann lezot, lezot zenn ankor, lezot ki dan bann aktivite ou kapab dir anti sosyal, sa i kapab ede.

E osi lo la sa lo sanmenm sa nide Mr Speaker, petet nou bann artis, nou bann artis ki ozordi bokou zenn i ekout zot, petet la i sa paz, sa lespas kot zot kapab anvoy bokou bann mesaz pozitiv pour zot ankouraz bann zenn Mr Speaker, pour zot kapab swiv zot osi vini.

Tir zot; anvoy bann mesaz for deor pour ed nou dan sa travay. E bann paran osi dan sa travay ki zot pe fer pour fer sir ki bann zenn demen zot tonm dan en aktivite vreman pozitiv.

Mr Speaker, ozordi spirityelman Onorab Samynadin, in fer sorti spirityelman dan bann lekol, eski in war poudir mazorite bann lekol pe *still* annan sa pratik kot zot pe fer sa programm larelizyon?

Ozordi nou war poudir dan Sesel i annan diferan dimoun ki dan diferan larelizyon ozordi Mr Speaker.

Eski ozordi dan lekol, eski tou bann dimoun ki dan diferans larelizyon i ganny sa letan pour zot vin dan lekol pour koz ek bann zanfan spirityelman?

Pour prepar zot, zot menm zot, pour fer sir ki zot pa pe angaz zot dan bann keksoz ki ou kapab dir i kapab afekte zot lazenes?

E la i sa paz, i sa moman letan kot, mon mazinen Minister Ledikasyon, ansanm avek diferan larelizyon, vin devan - *SIFCO*, ansanm ek *SIFCO* Onorab Kelly, pe dir mwan.

Anmenn zot lo, asiz ek zot atab pou gete ki mannyer zot pour kapab travay avek diferan bann *partner*, pou fer sir poudir bann zenn sa zenerasyon ki la Mr Speaker, fodre nou pa blyie poudir in annan en zenerasyon ki ozordi nou'n preski perdi zot akoz zot in tonm dam drog.

E la i pa an retar, kot la nou a kapab konmans sa travay Mr Speaker, pour sov sa lot zenerasyon ki pour vini la pour fer sir ki nou, nou pe anmenn zot dan sa bon semen.

Osi Mr Speaker, mon mazinen poudir Ledikasyon zot bezwen annan lezot bann *partner*, parey Lapolis annou envit zot - *Red Cross*.

Lot annou envit zot Mr Speaker, kot lekol, donn zot sa moman letan pour eksplik bann zenn koz ek zot lo lalkol, lo drog ki defi ki sa i kapab anmennen pour zot, lo kote lasante li menm li.

Mantalman yer nou ti pe fek pe koz lo la nou'n demann en kestyon Minis, lo la pour ankouraz bann zenn ki zot pa war zot demen kot zot pe tonm dan sa move pratik, dan bann move aktivite li menm li ki sa demen i kapab afekte zot.

Mr Speaker, ozordi mon vreman apresye ki Minister Ledikasyon ankor i annan en lot programm ki zot pe fer.

I annan en group etidyan ki zot plase dan diferan bann landrwa travay pour zot kapab ganny sa, avek bann landrwa pour zot ganny sa ki mannyer mon kapab dir, ki zot ganny sa leksperyans dan landrwa travay, ki sa demen ler zot, an menm tan zot pe antre dan sa lot staz, zot fini lekol zot konnen egzakteman.

E osi Mr Speaker, i annan bokou zenn apre lekol apre ki zot in fini zot pos segonder, sa landrwa travay i apros zot.

I apros zot pour zot kapab kontinyelman kontinyen dan sa laliny pour ed zot. E ozordi Mr Speaker, nou osi anvi anvoy en mesaz avek bann landrwa kot zot ganny sa responsabilite.

Kot bann zenn i vini la avek zot, ki zot pe sey ed sa bann zenn nou pe demande ki zot vini, zot ed Minister Ledikasyon, ed bann paran ki bann zenn zot kapab war zot.

Pa dekouraz zot dan en fason ou en lot, akoz zot vini pour zot aprann. Pa tou keksoz ki zot pour konn deswit me selman en zot Mr Speaker, ki demen ler zot fini zot konnen poudir zot annan sa swa.

Mr Speaker, ozordi zenn ou bezwen asize pour ou ganny en konpran zot. Zenn pa pans parey nou panse.

Mwan, mon'n dir lo konmansman, se ki mon annan bokou zot ki viv dan kominote avek mwan e mon osi mon annan mon zanfan kot lakour.

Zenn pa ti aktiv parey nou, nou ti fer dan lepase. Bokou zenn ozordi zot pli for dan *game*, dan lot. E nou *as* bann paran, bann dimoun dan kominote, nou bezwen rod en fason ki mannyer nou pou angaz nou avek bann zenn.

Ozordi i annan bokou paran ki ler i zwenn en zenn dan semen sa zenn i dir li bonzour, i pa reponn.

I bann keksoz ki nou bezwen tire - bann latitud parey kot nou, nou menm nou dan semen en zenn i apros nou, ouswa en zenn i bezwen en lenformasyon nou bezwen pare pour nou kapab ed bann zenn.

Annefe mon mazin zenn Onorab Ashley Jean pour lekol Mont Fleuri Segonder tanzantan nou koze Mr

Speaker, annefe yer swar nou'n ganny en pti dyalog lo kote sa Mosyon ki in vreman apresye Onorab Kelly.

I dir mon sa bann keksoz ki pour ed zot lo kote lazennes, akoz i pour ed zot dan sa travay Lasanble Lazenes, pour zot kapab pas bann Mosyon, anmenn bann keksoz ki annan pour fer avek sa group dimoun ki otour zot li menm li.

E petet sa i en lapel pour nou osi Mr Speaker, pour nou petet rod en fason angaz nou avek Lasanble Lazenes en pti pe plis, pour nou konnen en pti pe ki pe deroule, kwa ki zot pe mazinen.

Yer mon'n tann Onorab Arissol, in koz en ti pe lo kote *hairstyle* kot lekol, sa i en keksoz ki dernyen eleksyon lazennes Mr Speaker, kanpanny dan lekol Mont Fleuri pour Lasanble Lazenes ti lo la.

Zot ti pe koz bokou lo la lo kote seve, *uniform*, fason ki - i annan bann zenn ennler lot fwa mon al kot lekol i annan en zenn in ganny met deor akoz in penn son zong.

Tousala i bann keksoz, i *style* konmela dan kominote, ki nou aprezan en senp pti keksoz sa zenn i perdi ler i ganny met an deor lekol. E petet i bann keksoz ki nou bezwen revwar; revwar pour fer sir poudir pa

akoz en senp pti keksoz, ki aprezan sa zenn i perdi en lazournen kot i ti kapab pe aprann en ta keksoz.

Osi Mr Speaker, bokou nou bann zenn ozordi, i pas laplipar zot letan, zot dezyenm lakour ou kapab dir kot lekol.

Eski nou paran nou pe angaz nou en pti pe avek lekol pour nou konnen ki pase? Lekel bann zanmi ou zanfan, ki ou zanfan kot lekol ki i fer, akoz souvandfwa ou zanfan kot lakour, dan senmen kot lekol, i diferan kalite dimoun.

E la *once* ki ou angaz ou avek lekol la ou kapab konnen ki mannyer ou zanfan pe pourswiv son letid ki bann difikilte ki petet lekol i anvi ki ou lo kote paran.

Mr Speaker, ozordi kot lekol sak fwa larantre, tou laklas i demann bann paran pour zot vini pour form en komite.

Souvandfwa ki ou war dan bann laklas, ou pa gannyen sa kantite partisipasyon paran. Paran pa le vini devan pour pran sa rol pour partisip dan lavi lekol nou zanfan.

Toultan ou war menm dimoun menm e mwan, mon krwar poudir sa osi tou paran in devret plis angaz li dan lavi lekol son zanfan. Pour ed sa *teacher* lo ki nivo swa pou fer

bann aktivite, swa ler *teachers* i bezwen serten led atraver laklas, pour nou kapab donn sa *push* Mr Speaker.

Sa osi tou i kapab ede. E osi dan kominote, dan kominote mon'n dir se ki i bezwen annan plis sa gran rol, kot nou pa war ki bann zanfan li menm li i pe tonm dan bann move frekantasyon, bann move pratik keksoz, kot la en kominote. Toultan i dir ou i pran kominote pour fer grandir en zanfan Mr Speaker, e ozordi mon apresye sa lapros ki SNYC in pran, kot ou menm ou war sa transformasyon.

Ozordi sa transformasyon dan SNYC, ou war bokou bann aktivite pozitiv, ozordi i annan bokou bann group danse.

I annan bann konpetisyon; benn li menm li Mr Speaker, lo kote artis li menm e nou war ozordi anba sa *scheme* ki *Local Government* i met a dispozisyon nenport endividé, i annan bokou zenn pe vin devan Mr Speaker, kot la zot kapab ankadre anba sa *scheme* ki ou kapab dir en dimoun i kapab vin anba la pour lo kapab montre en group marmay *football*.

Artis li menm li, lo kote artizanal li menm li sa pe mars vreman byen, me selman nou bezwen fer sir poudir i a

dispozisyon kot i pa vin konplike pour en zenn demen kapab ganny li akse avek sa *scheme*.

Sa i ede pour en zenn parey mon kapab mazin msye, nou zenn garson Abraham Scolastique dan mon distrik ki li ozordi i en *teacher* lo nivo *art*, ki aprezan in antre anba enn sa *scheme* Mr Speaker, pour li ed son bann lezot ti kanmarad ki zot annan lentere dan sa domenn ki sa i kapab.

E osi nou war lezot ankor. E nou, nou anvi Mr Speaker, mon mazinen avek sa Mosyon anmennen par Onorab Samynadin, i en Mosyon ki ozordi Mr Speaker, mon anvi ki sa Mosyon i al pli pre ek bann zenn petet Lasamble Lazenes zot a konnen en pti pe kwa ki nou, nou'n koz lo la.

Ozordi ki bann propozisyon ki ti annan ki nou konnen bann difikilte ki petet ki bann zenn pe pas ladan.

Akoz pa tou zenn ozordi Mr Speaker, ki vin devan avek zot problem.—Mon mazinen poudir i annan en fason ki SNYC ouswa Minister konsernen ki bann zenn i kapab vin devan pour zot eksplik en pti pe zot *grievance*, ki zot pe gannyen, bann difikilte ki zot pe gannyen, akoz ozordi souvandfwa Mr Speaker,

laplipar lakour ki ou passe ou pou war en papa i li tousel ek son zanfan, ouswa ou war en manman tousel ki pe fer grandir son zanfan.

E sa i pa ede Mr Speaker, akoz sa zanfan i bezwen annan sa *role model* konman en paran ki la pour donn li sa gidans.

Mr Speaker, mon pour donn mon sipor sa Mosyon vreman pozitiv pour bann zenn. Mon swete poudir la deor bann lenformasyon, bann keksoz ki nou pe anmennen ki bann dimoun zot tande li menm li pour nou kapab edik bann zenn.

Bann ki'n tonbe, nou war en zenn obor semen ki'n tonbe oubyen i pe al dan en move semen, i bezwen annan enn ant nou ki kapab apros sa zenn koz ek li spirityelman, osi gid li pour li kapab sorti dan sa bann sityasyon ki i ladan.

Mr Speaker, mon dir ou mersi ki ou'n donn mwan laparol e mwan, mon pour donn mon sipor sa Mosyon. Mersi.

MR DEPUTY SPEAKER

Mersi Onorab Roucou. Prosen Manm ki'n demann laparol se Onorab Phillip Arissol.

HON PHILLIP ARISSOL

Mersi Mr Speaker. Bonzour Mr Speaker, tou koleg Onorab, e

tou dimoun ki pe swiv nou sirtou nou bann zenn dan distrik Anse Boileau.

Mr Speaker, mersi pour laparol ozordi kot mon kapab aport mon sipor pour Mosyon Onorab Samynadin.

En Mosyon ki pe met laksan lo lenportans pour kontinyen ankouraz nou zenn, pour promouvwar lespri pozitivite dan nou pei.

Mr Speaker, i enportan pour nou tou konman sitwayen responsab, pour pran en rol aktiv dan la kouraz en kiltir moral e spirityalite sa nou sasyete.

Nou zenn i lavenir nou nasyon e nou responsabilite kolektif pour nouri e gid zot dan semen drwat e pozitivite.

Ler nou partisip dan aktivite ki bon moralman e spirityelman, nou pa selman asir, nou prop lavi, me nou pe kontinyen dan byennet e prosperite nou kominate e nou nasyon an antye.

Partisipasyon dan aktivite ki ankouraz valer moral ek spirityalite, i non selman batir karakter me i osi en stil san senpati, konpasyon e respe pour lezot.

Sa valer se fondasyon en sasyete an armoni kot dimoun i kapab viv ansanm dan lape e travay ansanm dan en

direksyon pour en lobzekatif komen dan progre e developman.

Mr Speaker, antan ki *Leader* e Manm sa Lasanble, nou merit demontre legzanp pour nou zenn e piblik an zeneral.

Ler nou partisip aktivman dan aktivite ki ankouraz pozitivite, zantiyes e bonn volonte; ler nou fer sa nou pa selman enspir nou zenn zenerasyon pour swiv nou lepa, me nou osi kre en kiltir kot labonte e vertir i ganny defann e selebre.

Mr Speaker, mon ankouraz tou parti ki enkli manm piblik, pour met lanmen ansanm dan sa zefor nob e annou ini pour siport linisyativ ki ankouraz krwasans moral e spirityel.

Ki se swa atraver servis benevol, servis kominoter ouswa at *de* bonn volante anver enn a lot ansanm nou kapab kre en lefe pozitiv ki pour elev nou sasyete, ki pour prepar semen pour en lavenir pli briyan pour nou bann zenn.

Mr Speaker, letan nou ankouraz en kiltir bon valer, valer moral e spirityel, sa pou non selman benefisy'e zenerasyon prezan me nou pe met baz pou en lavenir dirab e prospere.

Ler nou enstil en valer entegrite, lonnekte e konpasyon dan nou zenn, nou pe ekip zot ek zouti ki zot bezwen pou navig dan sa lavi ki ranpli avek defi avek dinyite.

An plis ki sa pouvwar aktivite ki bon moralman e spirityelman, nou pe ankouraz en sans kominoter e apartenans parmi nou bann zenn.

Ler nou reini ansanm, nou pe partisip dan en aksyon zantiyes e zenerozite, nou ranforsi lyen ki ini nou antan ki en nasyon e kre en sans lobzektif partaze ek limite.

Se atraver nou zefor kolektif pour promouw war pozitivite e la labonte, ki nou kapab konbat lafors negativite e divizyon ki menas e diviz nou.

Ler nou debout ansanm pour siport valer moral e spirityel, nou anvoy en mesaz pwisan pou lemonn, ki nou nasyon i fonde lo prensip desan konpasyon ek bonn volonte.

Annou pa bliye ki vre lafors en nasyon pa depan zis lo lafors militer ouswa pouvwar ekonomik, me dan karakter e lafors moral son pep.

Ler nou prioritiz aktivite ki ankouraz krwasans ekonomik, krwasans moral e spirityel, nou asire ki nou nasyon i reste rezistan devan

defi e ferm dan son langazman pour defann valer ki defini nou antan ki en sisyete.

Dan nou pourswit pour nou promouw war bon valer moral e spirityel parmi nou bann zenn, nou dwatet rekonnet tou lenportans pour ankouraz en kiltir enkliziv e diversite.

Anbras dimoun ki sorti dan tou kous lavi, ki se swa *background* ouswa krwayans politik pour larelizyon, ranforsi fabrik nou sisyete e ankouraz konprenezon e tolerans parmi nou bann zenn e tou nou sitwayen.

Ler nou ankouraz partisipasyon dan aktivite ki selebre diversite e an kouraz limite, nou batir fondasyon pour en nasyon ki pli an armoni avek li menm.

De plis envestir dan devlopman moral e spirityel nou bann zenn, i en lenvestisman dan en lavenir prospere e soutenabilite nou nasyon.

Ler nou *empower* nou zenn nou pe donn zot pouvwar e en konpa moral, solid e fondasyon spirityel, nou pe ekip zot pour dirizan responsab dan sisyete.

Atraver konsey ledikasyon e model positif, nou kapab asire ki nou prosen zenerasyon pour

defann valer ki esansyel pour progre e byennet nou nasyon.

Pandan ki nou pe antre dan sa voyaz kolektiv dan direksyon pour en sasyete ki pli solid dan domenn moral e spirityel, annou pa blyi pouvwar ti aksyon zantiyes e zenerozite.

Ki en senp zes pour ed en vwazen ki dan bezwen, ouswa en aksyon volonter dan en lorganizasyon saritab lokal, sak aksyon pozitiv i kontribye dan en pli gro dibyen e ranforsi valer ki defini nou koman en nasyon.

Se pour nou anbras loportinite pour fer en diferans dan lavi en lot dimoun, e enspir en kiltir konpasyon e bonn volonte ki pour dire pour zenerasyon ki pe vini.

An konklizyon, annou re afirm nou langazman pour ankouraz nou bann zenn e annou promouvwar lespri pozitivite dan pei.

Annou kontinyen sanpyonn aktivite ki elev lespri imen e enspir nou bann zenn pour vin bann pli bon versyon nou menm. Ansanm annou batir en nasyon kot valer moral e spirityel pa selman soutenir, me selebre konman en pilye dan nou sasyete.

Mr Speaker, mon pour aport mon sipor pour sa

Mosyon anmennen par Onorab Samynadin. Mersi.

MR DEPUTY SPEAKER

Mersi Onorab Arissol. Amwen mon latet ti anba, me mon pa'n - personn ankor pa'n lev lanmenm pour koze lo sa Mosyon.

Onorab Andy Labonte, selman nou pa fer li koumsa konmsi, sak fwa enn i fini prezan mon bezwen enplor lasal pour koze. Annou endike lekel ki pour koze - *ok* Onorab Andy pran laparol.

HON ANDY LABONTE

Mersi Mr Speaker. Bonzour Mr Speaker, tou koleg Onorab e tou dimoun ki a lekout.

Mr Speaker, sa Mosyon ki anmennen par Onorab Kelly Samynadin, pour mon i en Mosyon ki i annan bokou lenportans.

Parey Mosyon in ganny dir avek bi pour kontinyen ankouraz nou bann zenn pour viv en lavi ki sen.

Mr Speaker, ler nou pe koz sen nou tou nou'n ganny demande konman en imen pour nou viv la sentete e ler nou pe viv sa lavi i vedir ki nou annan respe pour nou frer.

E nou kominote an zeneral alor i enportan ki nou koman bann *leaders* dan

Lasanble, mon krwar i merit konmans par nou.

Nou bezwen montre poudir i annan respe pour enn a lot isi dan sa Lasanble akoz plizyer fwa e menm ou menm ou ou'n deza pronons ou lekor lo la.

Dan fason parler ki bann deliberasyon i deroule e i pa pe vreman montre ki nou pe donn sa respe nou pep deor ki pe ekout nou, ki'n elekte nou.

E Mosyon osi pe demande pour promot lespri pozitivite e pozitivite Mr Speaker, yer Mosyon ki nou ti diskit lo la ankor ti baze lo retir diskriminasyon.

E ler ou pozitiv dan lavi ou annan latolerans e ler ou annan latolerans i vedir ou annan lanmour dan ou leker.

Ler ou annan lanmour dan ou leker, ou aksyon i manifeste bann bon fri e i enportan ki nou realize.

Ki i enportan nou pa zanmen perdi sa sans pozitivite e nou bezwen kontinyen ankouraz nou bann zenn enspir nou bann zenn enspir kominote e-Mosyon parey pe demande, pe demann avek tou parti prenan enkli piblik an zeneral pour partisip plis dan bann aktivite ki anforsi en devlopman moral e spirityel solid.

Mr Speaker, pour mwan ler i koz lo la spirityalite i vreman en keksoz ki pre avek mon leker, akoz san la spirityalite koman en imen, ou perdi, ou perdi konplet.

E bokou fwa nou konfiz spirityalite avek relizyon, me spirityalite i, la relizyon i pratik spirityalite, me spirityalite i pa vedir nou pe koz relizyon direkteman.

Spirityalite i vedir en imen li menm li, lafason ki i epanouir e lontan parey Onorab *Chief Whip* Onorab Arissol, i kontan dir tanzantan se ki enn fwa mazorite nou bann ler nou ti ankor zenn, ler nou ti ankor marmay, nou paran ti batiz nou ankor zenn, ankor marmay.

So ler nou batiz ankor zenn, ankor marmay, i vedir ki nou paran in pran en larout ki anvi ki nou swiv me konmela avek levolisyon letan.

Nou war poudir i annan bokou plis la relizyon ki petet nou mank sa bout, kot nou krwar poudir se relizyon ki pour anmenn nou ver la spirityalite.

Be la spirityalite i pa li. I vedir ki ou bezwen annan en koneksyon avek en lafors ki pli for, e nou tou nou konnen ki nou'n ganny kree koman en imen.

E nou annan defayans e ler ou pe get bokou nou bann

zenn ki tonbe konmela Mr Speaker, i mazorite zot *cet* akoz zot mank sa bout spirityalite.

E ler ou mank la spirityalite, ou kit en lespas vid kot ler ou santi poudir ou feb, parey lo ter Mosyon in fer sorti dan son lentrodiksyon.

Ler ou tonbe ou pa pe war sa landrwa kot pour gid ou, kot pour ed ou pou ou kapab resorti e mon en dimoun ki koz bokou avek bann marmay ki lo sibstans.

E ler ou koz ek zot ou war poudir se sa ki manke i manke akoz zot napa sa gidans spirityel, e la mon pour anvi felisit SIFCO pour sa travay ki zot pe fer dan kominote.

Akoz i pe ed kominote pour nou war vre spirityalite, pozitivite kot nou kapab viv ansanm konman en kominote, nou kapab respe enn a lot Mr Speaker.

E parey in ganny fer sorti, i annan osi bann bokou bann groupman sportif dan distrik, me parfwa ki nou war se ki i mank gidans.

Petet i mank gidans akoz la fason ki sa bann groupman i ganny fer akoz? Akoz zot bi wi petet zot pe pratik serten *sport* ou petet lanmizik ki pe detann zot; me eski sa lankadreman pe ganny fer an son bon fason *or*

petet i annan bann move lenfliyans ki kontinyen antre.

Alor pou mwan ler mon pe get sa Mosyon, sa Mosyon i pe get keksoz dan en fason *holistic* kot nou kapab rod fason pour nou kapab ed, enspir nou bann zenn.

Ki nenport ki desizyon zot pran zot toulstan pran li avek en lespri ouver e apartenans e santi ki la spirityalite i en baz ki esansyel e i enportan.

E bon mon en Katolik Mr Speaker, e mon en Katolik, mon pratique e mon ganny bokou lenspirasyon ler ki mon rankontre mon bann groupman dan Dimans, kot mon *attend* lanmes.

I annan bann lezot groupman bann zenn osi ki ganny fer me sa i pa zis larelizyon Katolik parey mon pe dir. I annan bokou lezot bann groupman spirityel osi ki pe donn sa bann gidans nou bann zenn.

Alor mon krwar i esansyel Mr Speaker, ki nou rod fason pour kontinyen kit nou bann zenn lo sa larout e bann ki'n deroute nou sey rod en fason pour re-gid zot.

Pour fer sir ki nou kominote i kontinyen epanouir dan son vre sans, ki finalman, nou grandir konman en nasyon an zeneral.

Mr Speaker, avek sa 2 mo mon pour dir ki mon pour donn mon siper sa Mosyon, e mon krwar pozitivite i en laspe ki nou Gouvernman depi ler in vini in koz bokou lo la.

E nou pe kontinyen pouse pour pozitivite dan kominate e dan pei an zeneral, e nou bezwen rezet sa bann negativite, me annan en pe plis lakseptans anver nou sisyete an zeneral li menm li.

Alor avek sa 2 mo mon pour siport sa Mosyon Mr Speaker, mersi.

MR DEPUTY SPEAKER

Mersi Onorab Labonte. Mon pour donn la parol Onorab Zialor.

HON NADDY ZIALOR

Mersi Mr Speaker. Bonzour Mr Speaker; tou dimoun ki a lekout pour sa Merkredi bomaten.

Mr Speaker, mon pa pour mank sa loportinite pour mwan aport mon kontribisyon vizavi en Mosyon ki, ki koz lo en groupman ki mwan osi mon form parti ladan e sa se lazene.

Mon krwar i enportan ki sak fwa nou pran en Mosyon i enportan ki nou fer en pti tour dorizon.

E an menm tan i enportan nou pran sa, sa loportinite pour

nou fer en ser ten *advocacy* vizavi partaz en ser ten mesaz konman bann dirizan pour nou donn en ser ten gidans; nou pep, nou nasyon.

Ler nou koz lo lazene tre souvan bann ki'n la avan nou, zenerasyon avan nou, in annan en tandans pour kondann lazene Seselwa.

Nou toul tan annan sa *focus* lo bann keksoz negativ ki souvandfwa nou oubliy sa bout pozitiv.

E konversasyon ki souvandfwa ou tande deor laba se, lazene i dan drog, lazene pa oule travay, lazene i se si, lazene i se la.

Alors bomaten ou sa zenn, mon anvi dir avek ou ki dan lavi ou fer fas avek difikilte, dan lavi ou fer fas avek bann moman kot ou tonbe, dan lavi ou fer fas avek bann sityasyon kot ou vwar ou, ou pa pe ganny siper.

Me dan lavi ou bezwen egalman annan en *mindset* pozitiv, parske tou bann ki'n vin avan ou, zot in pas en parkour ki pa neseserman in fasil.

Zot in pas en parkour ki in permet zot pas dan bann sityasyon, kot in fer zot vin sa sitwayen ki zot ete ozordi.

Alors Mosyon i se ki nou kontinyelman ankouraz nou bann zenn pour viv en lavi sen,

e promot en lespri pozitiv dan nou pei Mr Speaker.

Pandan ki serten i kontinyelman kondann en pti minorite, nou konnen ki ozordi dan Sesel, i annan sa zenn ki li bomaten in leve 8 er bomaten in *clock in* dan son travay. Sa i premye keksoz pozitiv Mr Speaker.

Pandan ki nou pe debat lo sa Mosyon, nou annan en group zenn ki li in desann in al lekol e li i pe pran son laprantisaz o serye. Sa i bann keksoz pozitiv Mr Speaker.

Pandan ki nou pe debat lo sa Mosyon bomaten, dan bann lenstitisyon pos- segonder nou annan en zenn ki li i enspire pour pran en karyer.

E i pe fer sir ki i fer en bout ki pozitiv pour ki i reisir e i *graduate* pour li ganny en sertifika, pour li kontinyen sa parkour ki nou dir lavi e travay Mr Speaker. Sa i en keksoz pozitiv.

Lo nivo kominoter pandan sa dernyen 2 an, nou'n vwar diferan linisyativ ki'n ganny pran par bann dirizan kominote, pour ki nou fer sir ki nou anmenn en nouveau *trend* dan nou pei.

Premyerman, mon vwar pa mal lekol segonder ki ozordi ou annan bann benn ki bann zenn ki pe pran sa linisyativ,

pou anmenn bann nide, bann lespri pozitiv otour zot bann zenn li menm.

Dan *sport* malgre ki souvandfwa isi dan Lasanble nou'n ganny met an dout vizavi progre ki pe ganny fer, me nou annan pa mal nou zenn ki li ler i antre dan *sport*, i pa pe regarde ki rekompans i gannyen dan son pei.

Me i pe regarde ki lakonplisman li konman sa zenn i fer pour son lekor an menm tan pour son pei Mr Speaker.

Alors loter Mosyon in pas lo diferan linisyativ ki SNYC in antreprann pandan plizyer lannen. Me selman nou pa pour kapab nye ki pandan sa dernyen 4 an, in annan en transformasyon vizavi bann programm e striktir ki SNYC in annan an plas.

En serten letan en pti selektif, ozordi i proaktiv Mr Speaker. Ozordi nou pe vwar bann keksoz ki pli targetiv kot nou vwar en zenn i ganny pran depi son ladesans e i grandi ver sa lepa sikse Mr Speaker.

Letan nou pe koz lo *leadership* e Onorab Roucou, atraver ou Mr Speaker, in koz lo Lasanble Nasyonal Lazenes, ki dayer a en tre zenn az mon ti form parti ladan.

Me nou'n vwar en transformasyon. Nou'n vwar ki nou'n bouz ver en Lasanble Lazenes ki ganny swazir, me nou war en Lasanble Lazenes ozordi ki zenn li menm pe pran sa linisyativ pour konnen ki savedir elekte en reprezantan.

Partisip dan en aktivite sivik e sa i en pti kommansman, me ki pou fer konpran nou lazenes ki ou form parti dan pran desizyon, ou form parti dan fer ki keksoz pozitiv i arive dan ou pei.

En lot pwen Mr Speaker, ki mon ti a kontan fer resorti, letan nou pe koz lo pozitivite bann ki swiv de pros.

Ozordi nou annan en kantite zenn ki vin avek bann nide inovativ, ki swa lo nivo lanvironnman. Resaman semenn pase nou'n vwar teknolozi e prodiktivite, nou vwar bann zenn ki pe vin devan dan zot distrik e pe dir «mon anvi fer keksoz.»

Me tandis dan lepase se plizoumwen se Gouvernman ki ti fer keksoz pour lazenes e ozordi sa zenn pe dir ou «non, mwan anvi form parti dan kreativite mon pei.»

Alors mon kontribisyon pour sa Mosyon se ki annou kontinyen mars ver larout pozitivite. Pour annan moman kot parey mon'n dir o

kommansman, pour annan moman kot ou pour ganny dekoraze, pour annan moman kot ou pour tonbe e ou pour vwar ou, ou tousel.

Pour annan moman kot dan ou larout ki swa ou pe rod en lanplwa, ki swa ou pe rod en loportinite, ou pou vwar ou dan en kwen semen pa konnen ki direksyon ou pour pran e mon dir avek ou pa perdi lespwar.

Leve bomaten avek en lespri pozitiv, kontinyen tap laport, tap laport ziska ler sa bann laport i ava ouver, kontinyen ki dan tou sa ki ou fer, ki swa dan ou kominate a dan ou lakour, dan ou travay, kot ou lekol, kontinyen gard en lespri pozitiv.

Sel fason pour ou kapab sirmont defi dan lavi, sel fason pour ou kapab sorti sikse dan sa ki ou pe fer.

Ignore the noise, focus on the job. Mersi Mr Speaker.

MR DEPUTY SPEAKER

Mersi Onorab Zialor. Mon pour aprezan envit Onorab Spiro pour pran laparol.

HON RACHEL SPIRO

Mersi Mr Speaker. Bonzour Mr Speaker, bonzour tou koleg Onorab, e bonzour tou dimoun ki a le kout.

Mr Speaker, mon pa pour manke pour fer en pti entervansyon lo Mosyon Onorab Samynadin. Malgre mon pour ase bref me selman i enportan ki mon dir 2 mo.

Lazenes i form en gran parti nou popilasyon, zot en group ase signifikan dan nou popilasyon.

E sa group zenn zot ganny kategorize ant laz 15 a 30 an. Zot en groupman dan nou popilasyon ki swiv bokou sa ki pase otour zot e osi dan lemonn eksteryer.

Zot annan akse ek teknolozi ozordi e souvandfwa zot tre avanse lo la menm pli avanse ki nou bann adilt.

Bokou zot a sa laz, zot pe konmans pran bann desizyon enportan e desiziv dan zot lavi, sirtou sa bann zenn dan laz 15 a 21 an.

Zot anvi vin en depandan. Zot anvi kapab fer zot prop lopinyon e zot prop-refleksyon. Se osi a sa bann tre zenn az konmsa ki zot fasilman osi ganny enfliyanse.

Ki swa zot ganny enfliyanse par bann koleg ki pli vye ki zot, oubyen par bann adilt.

E sa a sa laz osi, ki zot pe fer bann swa ki enpakte lo direksyon zot lavenir.

Loter Mosyon Mr Speaker, in prezant detrwa valer ki i santi i enportan pour met lanfaz lo la pour li. I santi ki sa i pour ede pou sa zenn viv en lavi ki sen.

An premye moralite, spirityalite i de valer ki enportan ki reflekte dan bann Polisi nasyonal pour lazenes; Polisi date 2018 a 2023.

Moralite Mr Speaker, spirityalite e pozitivite i bann valer tre enportan dan devlopman en zenn.

I bann valer ki bezwen ganny enkilke dan nou zenn. I annan bann programm parey *PSE Personal and social education, civic education* e osi dan kominate ti annan bann programm parey renesans moral e sosyal.

Tousala ti ede pour enkilke dan bann zenn bann valer moral, sosyal e-spirityel. Sa bann valer tousel pa sifi pour fer en zenn grandir dan pozitivite.

Sosyete i bezwen kontinyelman met lanfaz lo tou bann valer pozitiv, pour ed sa zenn pour devlop dan en adilt konplet.

I annan mon bann koleg avan mon ki'n fer zot entervansyon, zot in koz lo bann lezot valer tel ki respe, konpasyon eksetera, ki Sa bann valer osi i kontribye pour ed en

zenn pour devlop dan sa zenn kapab e konpetan, pour li kapab fer bann bon desizyon lo ki direksyon son lavi pou pran dan lavenir.

Nou pa kapab zis kontinyen zis fer Polisi e aktivite an saylo. Nou bezwen- rode ki mannyer nou anmenn sa bann valer dan lavi nou zenn.

Ozordi kan en zenn i fini fer lakonfirmasyon, in fini blyie ki i bezwen sa konponan spirityel dan son lavi, pour li kontinyen grandir.

La mon pa pe dir larelizyon akoz larelizyon i pa spirityalite Mr Speaker. Spirityalite i sa et, sa *being*, sa et ki ou vini avek tou bann lezot fakter; e lezot aki ki ou gannyen dan ou kominate pour ou kapab grandir konman en adilt konplet.

Sosyete i bezwen rode par ki mwayen i pou kapab anmenn sa laspe spirityalite kot bann group larz e dan ki form.

Akoz parey mon dir i pa larelizyon, so nou bezwen rode ki mannyer nou anmenn li kot sa zenn e dan ki fason nou tous li pour nou kapab fer li reflekte lo la spirityalite.

Moralite; bokou fwa nou tann bann adilt koz lo konportman zenn e poz kestyion lo oli valer moral nou bann zenn?

Zenn i swiv legzanp adilt e bokou fwa se nou adilt ki sa bann *role model*, ki sa bann zenn i bezwen pour zot kapab viv moralite.

Si nou menm nou, nou pa *lead* par legzanp, ki mannyer nou le enkilke moralite dan bann zenn?

E ozordi dan tou sa lenfliyans ki annan otour nou dan nou pei, e menm a leksteryer ki bann zenn i ganny akse avek, ki swa par *internet* oubyen televizyon, i enportan ki sa valer moral i ganny enkilke a en tre zenn az, dan bann zenn pour zot kapab parey mon'n dir pli boner grandi pour vin en adilt konplet.

Nou bann zenn i bezwen kapab annan en lespri ranpli ek pozitivite, akoz si nou pa fer sa Mr Speaker, nou pe war ki mannyer kantite bann lenfliyans.

Ozordi nou pe tann bann zenn ki pe swiside, bann zenn ki pe angaz zot dan bann aktivite ki pa bon pour zot. E tousala si nou, nou pa ranpli zot avek bann lespri pozitiv pour zot kapab fer bann desizyon enportan, nou riske annan en gro problem dan nou sosyete.

Me nou bezwen osi ranforsi lo tou lezot valer

pozitivite ki fer sa zenn vin en adilt aparantye.

Sosyete i bezwen etablir sa bon baz e lankadreman apropriye avek bann *role model*, pour ed sa zenn viv sa lavi sen ki loter Mosyon in prezante dan son Mosyon.

Pour en zenn kapab devlop sa bann bon valer, i pa depans selman lo paran me i bezwen son lantouraz an antye. Parey proverb i dir e enn mon koleg in site pli boner, ki nou bezwen en vilaz, en kominote an antye pour nou kapab fer grandi en zanfan.

E mon rapel lontan ler nou pe grandi sa bann valer ki nou pe koz lo la ozordi, ki ti fer nou vin sa adilt ki nou, nou ti anvi vini e ki lasosyete ti kapab war nou bann adilt pozitiv.

Nou ti ganny enkilke e ti dimoun otour nou dan kominote ti ede pour fer sir ki nou pe swiv sa bann valer.

En zenn i osi bezwen bann edikater kot lekol oubyen bann *leaders* dan son kominote, ki pour ede fer swivi pour diriz li dan bon direksyon.

Mr Speaker, si napa tousala, tou sa lankadreman, i pa pour facil pour en zenn grandir konman sa adilt konplet, ki nou pe koz lo la ozordi.

E lafason e ki rol ki sak sa bann partener - menm bann partener dan sosyete sivil, ki ozordi zot pe fer en travay avek bann zenn, i annan ki fer li dan vakans.

E i annan ki fer li apre lekol, pour enkilke bann valer ki bon e bann laspe pozitiv dan bann zenn, ankadre zot ek bann konpetans e *skill* pour kapab desern sa ki byen ek sa ki mal.

I tre enportan pour devlop sa zenn pour ed li devlop tou son bann konpetans ki i sipoze gannyen, pour li kapab vin en zenn entegral konplet dan nou sosyete.

Permet mwan Mr Speaker, pour salye tou sa bann ankadrer dan tou bann programm ki swa dan lekol, dan bann sosyete sivil.

E piblik an zeneral, ki pe zwe en rol enportan pour ankadre nou bann zenn e donn zot bann valer apropriye pour zot kapab grandir byen dam nou sosyete.

Avek sa 2 mo Mr Speaker, mon remersi ou.

MR DEPUTY SPEAKER

Mersi Onorab Spiro. Mon pour aprezan donn laparol Onorab Lemiel.

HON SYLVANNE LEMIEL

Mersi Mr Speaker. Mon ti a kontan donn en pti *input* mon osi dan sa Mosyon Onorab Samynadin, ki'n vin avek ozordi bomaten.

Mr Speaker, letan nou pe regard Mosyon li menm, Mosyon pe konsantre lo nou bann zenn dan pei e an zeneral Mosyon ler nou pe regarde i pe demann bann zenn pour viv en lavi ki sen.

Bokou dimoun i kapab enterpret lavi sen dan diferan fason, me letan nou pe demann zenn pour viv en lavi sen, i vedir en lavi ki pozitiv.

I vedir ki en lavi ki promot bann bon keksoz; i vedir ki en lavi ki anmenn bokou bon keksoz dan zot, zot menm. Sa i konpri depi zot konportman e dan zot fason fer an zeneral.

Mosyon pe osi pe demann zot pour promot lespri pozitivite dan nou pei, me sa i en bon keksoz. Sa pozitivite nou menm nou tou, nou merit annan sa pozitivite dan nou.

I pa zis zenn, i konpri nou isi dan sa Lasamble, i konpri nou bann dimoun an deor e Lepep Seselwa an zeneral mon krwar nou merit vin en pe pli pozitiv.

Akoz pozitivite li menm i anmenn nou en pe pli pre ek kanmarad, i anmenn nou pour nou annan sa lantant avek

kanmarad, i anmenn nou pour nou inifye, i anmenn nou pour nou annan plis progre letan nou mazin pli pozitiv e annan en lespri pli pozitiv.

I byen pour nou met sa lespri dan nou bann zenn Mr Speaker.

Mr Speaker, letan ou regarde nou sosyete li menm ozordi letan ou fer en analiz, lepase ziska kot nou'n arrive ozordi, in annan en kantite sanzman.

In annan sanzman ki'n tre pozitiv, e i annan sanzman ki nou pe vwar ki negativ e ki i devwar nou tou pour met lanmen ansam. Pour nou vwar ki mannyer nou kapab aranz sityasyon e aranz keksoz sirtou dan faver nou bann zenn ki la ki pe leve ozordi.

Mr Speaker, letan ou pe regarde mwan mon pour dir e mon pour met lanfaz ki mon'n deza dir isi dan sa Lasamble e nou pour met plis lanfaz ankor lo la.

Ou konnen, tou zenn ki nou pe koz lo la, la ki nou pe met lanfaz lo la tousala i annan en fanmir.

E tou keksoz Mr Speaker, mon pour dir i devret konmans dan fanmir e ou ti vwar lontan ti annan plis lanfaz; mon pa dir ozordi napa.

I annan bokou paran ozordi ki ankor pe fer li, me i ti pou pli meyer si ti annan plis - nou tou konman paran nou pe fer sa.

Ou konnen, ou koz savwar viv, savwar *être*, savwar fer, nou pe koz lo disiplin, ou pe koz lo respe, ou pe koz lo donn moral, ou pe koz lo la spirityalite,

Mr Speaker, mwan mon pour dir ki tou sa bann keksoz ki nou pe nonmen la i devret konmans kot nou dan lakour.

Nou pa kapab fye zis lo *teachers* lekol pour vin fer tousala, pour vin montre sa savwar viv nou zanfan, pour vin montre sa savwar fer nou zanfan; sa i konmans kot nou sa.

Nou ki devret montre nou zanfan sa, be ozordi ou pe vwar serten dekadans dan lafason lafanmir li menm kot lakour ki mannyer keksoz pe arive.

Ou konnen ti annan sa zafer renesans moral li menm, ki ti lanse an 2011 mon rapel; i ti konmans koumsa, me i ti annan en gran lansman ki ti'n ganny fer.

Sa letan la sa ti'n ganny dir annou fer li renesans moral. Renesans sosyal sa ti'n ganny dir nou pou fer li, akoz, ti annan en dekadans or en labsans serten keksoz dan moralite Lepep Seselwa an zeneral.

E sa i pou enkli nou zenn, kot nou ti'n dir be non, nou pa kapab perdi tousala so annou relanse. Annou relans sa fason fer ; annou re angaz nou avek lasosyete e Lepep Seselwa li menm, kot pour nou re met sa moralite, re met sa bon fason fer avek nou bann dimoun dan sosozyete.

E sa lansman letan ti fer, ti annan diferan programm - mon konnen lo nivo tou distrik, ti annan bann diferan rankont, bann diferan *workshops* ki ti fer.

Menm si petet parfwa i ti ganny serten *boycott*, me i ti annan serten travay li menm ki'n ganny fer. Mon pa konnen ozordi petet avek loter Mosyon.

Mon pa konnen si sa i ankor egziste sa renesans *social body* ki ti annan, si Minister Zafer Sosyal ozordi in kontinyen avek sa - mon pa konnen, me selman ti en bon keksoz.

I ti en bon keksoz ki ti'n ganny *set up*. E Mr Speaker, ler ou regarde osi dan lepase, nou ti annan bann diferan groupman parey ozordi i annan. Ou konnen nou ti annan bann groupman lazernes lo nivo tou distrik. Ti annan bann regroupman lazernes e sa kot zot ti fer bann diferan aktivite ki

promot la moralite, la spirityalite e sa ti tre, tre for.

Menm si mon'n tann en koleg Onorab, avan pe dir poudir zenn dan lepase in ganny petet ganny kraze, in ganny - mon pa pou dir sa Mr Speaker.

Mon pa vvar. Zenn pa'n ganny kraze. Ou konnen, tou dimoun dan en fason ou en lot, Gouvernman avan, Gouvernman ki la, Mosyon ozordi in vin anmennen, mon krwar nou tou, nou pe sey travay ansanm pour nou kapab elev nou bann zenn. Wi, bokou zenn i tonbe, me nou tou nou bezwen rod en fason pour nou kapab elev zot.

Pran en legzantp ozordi Mr Speaker, ler ou get lansentman anba laz ozordi dan Sesel in ogmant bokou, vreman bokou.

Mon ti ankor la mon ti pe rod sa bon statistik, pour mwan kapab prezante ki mon pa'n reisir ganny li lo kot Biro Statistik.

Me selman sa ki mon konnen poudir 2021 nou ti war ti annan en *rise* 8 poursan ki ti annan, me la ozordi nou 2024 mwan asir ou to *teenage pregnancy* in vreman monte.

Me ki nou pe fer, ou konnen? Akoz bokou nou pou asize pou dir i kapab nou pou montre ledwa, me selman in

ariv en ser ten lenstans dan lavi, dan pei, kot nou pa tro, tro kapab montre ledwa lo sa ki ti la avan, oubyen sa ki'n vin pou pe fer pli byen.

Nou tou nou merit pe *join* ansanm, donn lanmen, sansibilize, travay ansanm, pour nou gete ki mannyer nou pou kapab ede rezourd sa bann problemm.

Mon konnen Lasanble Nasyonal i annan ser ten travay ki nou ti pe konmans fer Komite Madanm, kot nou ti zwenn avek *Elles Foundation* - ti annan ser ten travay nou ti'n konmanse ansanm.

Me selman mon pe mazinen petet nou merit annan en pti pe plis kolaborasyon ansanm, pour nou regarde ki mannyer nou pour fer pour nou travay avek bann diferan partner ankor, an sa ki konsern sa *issue teenage pregnancy*.

Nou'n koz lo drog, nou dir, nou pe dir sa ki zenn i dan drog, be i vre! bokou nou zenn i dan drog ozordi. Bokou paran pe soufer akoz sa dekalaz dan moralite ki'n arive - drog nou bann zenn pe servi ; dan mon distrik in annan zenn ki'n perdi lavi avek drog.

Ou konnen e sa i bann sityasyon ki vreman sagrinan Mr Speaker, i vreman fer lapenn letan ou pe regarde nou bann

zenn garson, nou bann zenn fiy ozordi zot ankor annan sa kouraz pour zot kapab pran en lanplwa, pour zot kapab travay.

E sa drog pe vreman, vreman afekte zot. E Mr Speaker, letan nou al lo aktivite li menm ki ou pe dir. Aktivite ki loter Mosyon pe demande, aktivite ki ran forsi devlopman moral e spirityel.

Ozordi nou annan en bon pe groupman spirityel mon konnen Legliz Katolik i annan - tou bann de nominasyon ozordi, zot annan bann diferan groupman kot zot seye pour zot anmenn bann zenn ansanm.

Kot zot seye pour zot ankadre sa bann zenn, pour met en ti pe sa valer spirityel dan zot, parey mon koleg Onorab Spiro in dir.

Nou pa pe dir larelizyon la, me la spirityalite li menm, kot bokou groupman nou war i pe vreman seye, me eski sa i a laporte tou zenn sa. Me eski nou zenn i vreman enterese Mr Speaker, avek sa bann groupman?

Ou konnen sak groupman zenn zot annan zot lentere nou kapab dir, me petet sa ki i merit ganny fer, nou merit mon pa konnen i bezwen i annan kek *survey*.

Mon pa konnen si i annan en *survey* ki devret ganny fer,

pour nou vvar en pti pe plis dan sa *survey* kekfwa ki, petet nou sizer SNYC fer *or si* in fer petet ti a bon nou konnen.

Nou war bokou groupman lentere i annan en bon pe ki ti la depi avan i annan ankor ki'n ganny entrodwir ozordi.

E petet ou ti a kontan konnen eski sa in ganny fer atraver *survey or si* non petet ti a bon nou fer en *survey* pour nou konn plis klib lentere ankor, ki nou zenn ti ava kapab *involve* ladan e ti a tir zot en pti pe dan swa bann negativite.

Ki petet ozordi nou vvar Mosyon ki Onorab Samynadin, in anmennen kot pe fer en pli avek bann zenn pour partisip dan bann aktivite ki anmenn moral. Ou konnen?

Me selman Mr Speaker, en lot keksoz osi ki mon pour dir petet pa tou dimoun ki pour dakor ek mwan, dan sa bann aktivite osi ki nou fer, i depan en ler bann keksoz osi ki mannyer nou organize, ki pou nou promot sa moral, ou konnen?

I annan aktivite ki nou fer ki petet sa ki anmenn bann zenn dan bann - mon pa pou dir frekantasyon - me selman dan bann fason fer ki kekfwa a en serten letan i vin w zot prop detriman, ou konnen?

Bann sanson ki kekfa ki nou pe sante dan sa bann aktivite, bann sanson ki pour promote vyolans ou konnen.

Petet sa osi nou bezwen *curb oubyen* aret net sa bann keksoz, e nou revwar en lot fason ki mannyer nou pou fer, si nou menm nou isi dan sa Lasanble ozordi,-nou pe lans en lapel avek zenn an zeneral pour zot kapab partisip plis dan bann aktivite e ki pour ranforsi en devlopman moral dan zot sa bann zenn, e rann zot spirityalite osi pli solid.

Avan mon terminen Mr Speaker, mwan mon ti a kontan felisit lekol Segonder Anse Royale ki enn parmi en lekol ki mon frekant tre byen.

E mon kontan lafason ki nou bann zenn dan sa lekol li menm, zot pe angaze dan fason pou zot anmenn en pti pe plis moralite, en pti pe plis ou konnen- sa *togetherness* ki zot anvi anmennen antre zot.

E promot respe *Headteacher* i stress bokou lo disiplin, respe e sa ki zot bezwen pour zot kapab fer byen zot letid pour zot kapab bouz devan.

E ki i anmenn sa bon moral Mr Speaker, e mon kontan pour dir pour Lafet Zanfan sa lannen zot ti lans zot

valer pour sa term e zot valer pour sa term ti respe.

Ler ou gete respe i sa ki nou, nou bezwen si nou annan respe pour kanmarad, nou annan sa bon valer, nou annan sa savwar viv, nou annan sa savwar fer Mr Speaker, definitivman, nou bann zenn pour kapab war nou konman adilt nou ki mannyer nou reakte avek kanmarad, ki mannyer nou azir avek kanmarad.

E mon krwar nou bann zenn pour ganny sa legzanp ki mannyer nou, nou fer isi dan sa Lasanble, an deor, antre nou, an zeneral ki mannyer nou fer, zenn i ava ganny sa bon, ou konnen nou pe donn sa legzanp.

Zenn a ganny sa bon legzanp e la mon krwar sa i ava ranforsi en bon devlopman moral pou nou bann zenn e ki zot ava kapab swiv bann bon semen. Mersi Mr Speaker.

MR DEPUTY SPEAKER

Mersi Onorab Lemiell. *On average* bann Manm pe koz 8 minit lo sa Mosyon *donk* la i 27 mon krwar pa si nou pou bezwen sot 10 er edmi.

I annan 4 lezot Manm ki'n endike zot le koze, alor mon krwar letan nou retournen nou

a kapab fini sa Mosyon *by 12 edmi at least.*

Donk,-nou ava *adjourn* la e nou ava repran travay 11 er.

(BREAK)

MR DEPUTY SPEAKER

Welcome back tou dimoun. Nou pe kontinyen avek deba lo Mosyon ki'n table par Manm ELEKTE pou distrik Au Cap Onorab Samynadin.

Avan *break* ti annan 3 Manm ankor ki'n lev lanmen... wi, wi Onorab Loizeau i parmi sa 3 Manm.

*Ok so nou pou fermen la apre en akoz sa zafer, mwan personnelman mon pa kontan so letan mon dan *chair* mon pa kontan sa zafer en dimoun i lev lanmen zis...*

So sa ki ti lo lalis deza i annan Onorab Aglae, Onorab Gill, Onorab Woodcock, Onorab Naidu, Onorab Cosgrow, Onorab Loze, Onorab William, wi Onorab Porice ou la ou wi.

*So sa bann la i bann dimoun nouvo so savedir napa ankor *we close the list*, Onorab Porice *you are next on the list.**

HON DOYACE PORICE

Mersi Mr Speaker. Bonzour tou dimoun a le kout Mr Speaker, mon pour anmenn mon sipor pour sa Mosyon anmennen par

Onorab Samynadin, akoz mon santi ki i annan en mank dan serten nou bann zenn.

Lavi konmela i annan zenn ki viv en lavi fasil, san realize ki i annan bokou keksoz pour zot revwar dan zot lavi.

I annan zenn i krwar dan zis lanmizman, fer fize e fer nenport kwa ki pa bon pour zot lavenir.

Me, kan sa ler Mr Speaker, viv dan en lavi pozitivite e en lavi sen pour ed zot rantre nenport ki landrwa kot zot ava anvi. Zot menm kapab ariv lwen dan sosyete e viv dan nenport ki landrwa kot zot ale, ki Sesel, ki aletranze.

Parey Mosyon pe rekomande pour kontinyelman ankouraz nou bann zenn, pour viv en lavi sen e pour promot en lespri pozitivite dan nou pei.

Alor nou bezwen vwar kalite aktivite ki zenn i enterese avek, vwar ki zot frekantasyon e kwa ki zot bezwen.

Mr Speaker, dan distrik bokou zenn i kontan partisip san spor; i annan ki kontan partisip dan kiltir parey zwe lenstriman lanmizik, danse, poem, lakwizin, eksetera.

I osi annan zenn ki kontan partisip dan serten group relizye. La i fer mwan mazin lo Praslin ki mon'n war bokou zenn dan group Paster Selven

ek son madam i okipe *Marie-Jeanne Estate*.

Kot zot anmenn bokou pozitivite anver nou bann zenn, mon'n osi vwar Sir Sonny Athanase ki anmenn bokou zenn dan spor, spesyalman *volleyball*.

E petet mon pour pouse e dir plis zenn pour zwenn e partisipe. Mon pou demann ek Minister Spor pour kontinyen ankouraz sa bann *coaches* lo Praslin, dan diferan spor pour zot kapab kontinyen sa bon travay ki zot pe anmennen anver nou zenn.

Atraver sa bann tel programm, i ede pou tir nou bann zenn dan aktivite ilegal parey drog lo nou zil.

Gouvernman, *businessmen* e lezot partener i bezwen vin devan, ede pour ganny le neseser, parey lekipman lenfrastriktir e lezot ankor pour kapab kontinyen ankadre nou bann zenn.

SNYC i annan en programm, me i bezwen annan plis programm pour ankouraz plis zenn pour partisipe.

Petet a lavenir, nou pou bezwen annan en program sansibilizasyon pou zenn dan tou laspe lavi dan Sesel.

Akoz mon santi ki lavi i evolye e nou bezwen annan plis dyalog avek zot, kot i konsern

bann pozisyon dan Gouvernman, dan politik, larelizyon e plizyer ankor.

Sa i pou ranforsi en developman moralite, spirityelman solid anver lezot zenn ki pe grandir dan nou kominote.

Sa Mosyon in ariv dan en moman kot nou Gouvernman pe fer en refleksyon lo sa size ki konsern nou zenn e mazin kwa ki bon pour nou zenn dan nou pti pei Sesel.

Avek sa 2 mo mon pou donn mon sipor sa Mosyon, mersi.

MR DEPUTY SPEAKER

Mersi Onorab Porice, la prosen entervenan se Onorab Aglae.

HON EGBERT AGLAE

Mersi Mr Speaker. Mon pour dir bonzour tou Manm Onorab, avek tou nou bann dimoun ki pe a lekout sirtou, tou nou bann zenn ki enterese avek sa deba.

Mr Speaker, Mosyon ki la devan nou, pe demann pou promot lespri pozitivite dan nou pei e osi pe demann tou bann parti prenan konsernen ki enkli piblik.

E lo nivo la gouvernans pour anmenn sa ranforsman kot i konsern developman nou lazene dan en fason pozitiv.

Mr Speaker, nou tou nou ti a kontan annan en popilasyon zenn ki an bonn sante ki pe devlope e ki pe kontribye ver nou sosyete.

Me i domaz pour dir ki i pa differan i pa neseserman le ka san poursan letan nou pe regard nou popilasyon zenn ozordi.

E mon ti a swete osi ki lo ter Mosyon dan son ladres ouswa bann ki'n entervenir, nou demann nou lekor kestyon lo ki mannyer nou kapab fer sa arive, ouswa ki fason ki sa demann Mosyon ki pe demande, i kapab vin en realite.

E Mr Speaker, lazences letan nou regard li, li menm dan son term parey Angle nou dir li *youth*.

Se sa staz kot ou sorti dan *childhood* pour al ver *adulthood*; sorti adolesan pour ou vin en adilt.

E dan sa *span* letan ki ou annan konman en zenn se en moman letan kot pou aprann plizyer keksoz.

I sa moman letan kot ou eksperyans bann differan konteks ki dan lavi li menm e lasosyete i annan, pour ou kapab konpran, an preparasyon pour ou al ver sa adilt ki pou vin en adilt responsab; en adilt disiplinen ouswa en adilt egzanpler pou

ou kapab konmans fond ou fanmir.

E pour mon sa i enportan akoz nou tou ki la anndan nou'n pas sa faz lazences dan nou lavi. Me byensir konteks letan i sanze e i evolye e nou war bann differan fakter ki antre dan sa staz li menm.

E mwan letan mon'n ekout serten Onorab, Mr Speaker, atraver ou par egzanp letan mon tann Onorab Zialor, in dir poudir dan lepase se Gouvernman ki ti fer tou keksoz pou bann zenn, e ozordi se bann zenn ki pe vin devan pour zot vin rod zot laspirasyon, ouswa bann programm.

Be nou bezwen osi konpran bann konteks letan pase ek konteks ozordi. Letan nou regard nou striktir ledikasyon a sa moman letan Mr Speaker, dan lepase, plis lanfaz ti ganny mete lo lakademik.

Pour nou ansenny nou bann zenn, donn zot sa pli o ledikasyon akoz nou tou nou konnen sa moman letan dan lepase, apre nou lendepandans sirtou, ti annan sa nesesite pour anmenn en ledikasyon pli o nivo pour donn nou bann zenn; pour ozordi annan bann fitir paran parey nou'n war ozordi ki'n vin en pti pe pli responsab, dan en fason pour

anmenn plis devlopman dan nou sosyete.

Me ozordi lefe i reste ki menm si ou pe dir zenn pe vin devan, me souvandfwa sa ki ou koz avek i dir ou «wi mon annan nide pour devlop programm pozitiv» me i napa sa resours pour li kapab met son rev an pratik.

E se sa kot problem i konmanse la. Si nou krwar nou pou tir sipor Gouvernman - sipor Gouvernman dan en fason, dan sa ki zenn pou fer pour dir li al lo ou *own* pou fer, i pa pour marse, i pou bezwen.

E nou tou ki la anndan nou annan bann Manm Elekte ki annan en distrik, nou war ki nivo programm aktivite ki annan lo nivo distrik, i preski napa ditou.

E enn bann rezon akoz i preski napa, se akoz napa resours; e resours kote i sorti? Resours i bezwen sorti kot Gouvernman, pour kapab enplimant bann diferan programm.

Sa i enn bann konsern akoz ozordi nou pe *fail*. E letan mon tann Minis, ki responsab pour Lazenes ek *Sport* i vini i dir ou «nou pa pour fer parey zot ti fer avan kot zis ti fer aktivite.»

Be letan ou koz ek plizyer bann zenn dan lepase e enn mwan, mon'n enn sa bann zenn

ki bann prodwir sa bann aktivite, en kantite aktivite ti ganny fer.

E zot dir ou tou le *weekend* ouswa tou le mwan, ti annan bann manifestasyon bann aktivite, ki swa *sport*, ki swa kiltirel, ki swa dan ledikasyon lanvironnman, ki swa dan ledikasyon lasante, ti annan bann groupman.

E akoz sa bann groupman ti marse, akoz zot ti ganny sipor Gouvernman par deryer avek bann resours. Be letan ou tir sa resours byensir pour napa kontinite.

Ou pour annan bann *ad-hoc activities* petet enn i deside *sponsor*, me i pa soutenab e i pa pour kontinyen. Sa i en keksoz ki nou pou bezwen realize.

Nou koz lo SNYC - i enportan pour nou koz lo la akoz li sa *body* ki li ozordi atraver Minister Lazenes ek *Sport*, ki li ki promouvwar Polisi enplimant bann Polisi ki annan pou fer avek lazenes.

In annan bann diferan striktir ki nou, nou'n *set up* dan lepase Mr Speaker, kreasyon SNYA - Lasable Lazenes nou'n war i annan *Young Citizen, Youth Entrepreneurs, Duke of Edinburgh's Award* ki ti donn bann zenn bann leksperyans sirtou aletranze.

Nou war bann diferan *award*, kot zenn in partisipe dan larezyon, nou'n war Latroup Lazenes, nou war bann groupman *sport* sa i *football, basketball, volleyball*.

Nou'n war bann *Grassroots Programme* ki'n ganny anmennen ki'n anmenn en kantite larelev sirtou kot i konsern sportif e pozitivite li menm.

Me ozordi tou sa lankadreman striktir ki la Mr Speaker, i la lo papye. Lenplimantasyon pa pe ganny fer dan fason korek. E letan mon tann nonm statistik poudir SNYC in war aepre ki'n akse son bann programm servis 3 mil ekek.

E letan ou pe get popilasyon demografik zenn Sesel sirtou bann ki tonm anba 35 an, i environ 30 mil, e dan 3 mil i vedir zis 10 poursan ki pe ganny akse avek sa servis, ouswa ki pe vin devan.

Be eski nou konman en Lasanble nou pour aksepte 10 poursan konman en *figures*, kot nou bann zenn pe vin devan pe partisipe?

Be non, 10 poursan i pa akzeptab *at least* nou ti ava annan en 30, 40 poursan ziska 50 poursan; la nou ti a dir programm i efektiv, programm pe marse e lobzektif pe *attend*.

Nou kapab koze pe dir pe fer novo *youth policy* be naryen pa pour sanze si i pa vin ek bann lankadreman neseser, pour kapab devlop sa bann programm sorti lo nivo santral, pour al lo nivo rezyonal e dan bann distrik.

This is sa ki sa bann zenn pe demande. E nou fer diferan *forums, survey* ki'n arive dan lepase e se sa ki bann zenn in fer resorti.

Fodre nou konpran poudir dan sa i ki zenn li i anvi zenn i volatil, zenn i kontan aksyon; zenn pa neseserman kontan asize, diskite fer *meeting* apre *meeting*.

Wi, ou a fer programm *meeting* konsiltasyon be apre disimilasyon sa ki'n ganny diskite i bezwen ganny enplimante.

Be ler pa arive eski pour annan lankourazman, pour mwan retourne ankor dan sa menm *forum*, pour mwan vin donn menm nide ki mon'n donne, kontinyen donn menm zafer e naryen pa marse.

So nou bezwen vwar sa. En keksoz osi enportan se zenn i konpran zenn, se zenn ki nou bezwen donn zot bann rol *leadership*.

Wi, nou bann adilt bann politisyen nou kapab sofgard kit lizye lo la akoz nou annan

leksperyans lo kwa ki kapab al mal e kwa ki kapab al byen; sa wi, i nou forte sa.

Akoz nou'n pas dan sa peryod lazenes, nou konnen ki i *entails* tou son bann mers ki atas avek, tou sa bann negativite ki atas avek. Nou konnen sa nou.

Me selman zenn li menm li si nou enspir zot pour pran bann *leadership role* a moman sitan boner, pour kapab ed bann lezot zenn ki pe tonbe i pour en *plus* pour nou.

I annan plizyer pei sirtou bann pei dan *west*, zot in vin avek sa bann tel programm parey kot zenn li menm li depi dan lekol, pe konmans pran sa bann responsabilite.

E pe sov bann zenn. Akoz zenn i ekout zenn, se zenn ki met presyon lo zenn. Si ou annan en group zenn negativ i pour met presyon pour ganny bann lezot manm ki pour vin negativ.

Si ou annan en group zenn pozitiv, i pou *recruit* bann zenn ki pou vin dan-pozitivite. Nou bezwen konsyan sa bann keksoz.

E la mon vin lo ledikasyon Mr Speaker, eski pa in ler pour nou vvar kot nou'n arive? E mon ti'n dir lo konmansman ki an konmansman depi lendepandans, priyorite

Gouvernman se ledikasyon. Fer nou bann zenn *shine*.

E sa bann moman letan la, lanfaz pa ti ganny mete bokou dan en fason pour annan sa o nivo petet disiplin, responsabilite.

Akoz nou ti deza annan, nou ti pe dir bonzour; nou ti per nou paran, nou ti per ansenyan, nou ti per lapolis.

Nou ti per okenn bann dan nou fanmir menm nou tonton. Ti annan sa nivo respe o nivo. Nou pa ti oze zoure, montre ledwa sa bann letan.

E *focus* ti lo ledikasyon. Me ozordi nou'n *attend* sa nivo ledikasyon ki nou, nou ti pe rode pour en pei. Me nou'n blyie prezan i annan sa nivo laspe lavi sosyal ki anmennen avek. Nou'n blyie sa nou.

E se sa ki ledikasyon i bezwen war son bann *curriculum* pa zis *focus* lo lakademik, *focus* osi lo savwar viv dan zot bann programm.

I annan bann programm parey *PSE* nou bezwen ranforsi. Mon pa pe dir vin andoktrinen avek okenn programm relizye mwan. Be se selman devlopman spirityalite i ou *belief*.

Met larelizyon dan en fason - sakenn i annan son krwayans, me selman nou bezwen anmenn li dan en fason

pour balanse, pour nou kapab ganny en sosyete pli meyer.

Now, si nou regard lo kote responsabilite kominoter tou dimoun, tou paran, tou fanmir, nou osi nou bezwen demann kestyon.

Akoz ki ozordi bann statistik pe montre nou, akoz nou annan sa o nivo *teenage pregnancy* ki pe arive dan pei. Sa o nivo *truancy* ki egzize ozordi dan pei, sa o nivo - Minis, in vin la anndan in dir tousala - sa o nivo kot nou annan sa bann nivo *neglect*, kot zanfan pe fer sa ki li i anvi e paran napa kontrol lo son zanfan.

Se akoz devlopman ki'n arrive i pa'n armonize avek fabrik sosyal. Letan paran nou war bokou bann *single parents* ki war li, li tousel ki bezwen fer detrwa e sa sipor sosyal ki dayer Lopozisyon *LDS* dan lepase ti kritike ki nou pe donneen, nou pe donneen.

Nou ti pe donn pour en rezon pour ou kapab gannyen, pour ou kapab annan plis letan ek ou fanmir dan plas fer 4, 5 travay.

Be ozordi napa sa zanfan. Paran i kit li granmaten i antre tar aswar, keler i ganny letan montre li *homework* laplipar letan? Keler i ganny letan pour koz ek son zanfan lo sa ki byen ek sa ki mal, i preske minim.

Nou bezwen konsyan poudir fabrik sosyal in sanze akoz serten fason fer, serten kalite politik ki'n ganny anmennen dan sa pei.

Mr Speaker, i annan en pei mon krwar La Swis laba, solman en pei laba kot i en Prezidan Madanm ki zot in vin avek bann nide inovativ pour donn plis letan paran pour dan fanmir.

Dan plas zis travay i donn ou en zour ; i donn ou serten letan i annan en fleksibilite, eski nou pa kapab kontinyen eksplor sa nou? Vwar? Akoz nou anvi fer letid vin ek programm pour lazenes be osi annou vwar akoz i annan sa esapman.

Nou koz lo problem drog Mr Speaker, be problem drog in ede pour detri fabrik lazenes e mwan, yer mon tann Mr atraver ou Vis Prezidan in dir ki zot in reisi elimin eroin.

Mon demann mon lekor kestyon, eski nou pe ganny dir laverite? Si ou'n elimin eroin akoz nou ankor annan sa ta problem adiksyon, droger ki pe ozordi?

Plis ki 5 mil, eski ou'n detri enn pour les en lot antre? En lot kalite antre? So nou bezwen konsyan letan nou anvi koz lo pozitivite dan zenn, nou anvi koz lo spirityalite i

enportan pour nou osi get *the real cause* kwa ki'n koz sa bann keksoz.

Mon pa pe vin montre ledwa lo personn, ouswa blanm personn. Mwan osi konman en paran, mon annan en responsabilite pour mwan edik mon zanfan. Nou tou la anndan nou annan en responsabilite.

Lot pwen Mr Speaker, mon krwar i enportan pour nou konpran en keksoz, sa nou apel *the norm* ki lasosyete i aksepte dan fason fer dan lapratik, avek *the trend* ki nou swiv parfwa. E parfwa nou fer *the trend* ki nou pran laba eksteryer ki nou anmenn li isi, e nou fer li vin *the norm* ki Seselwa, swa nou menm nou, nou aksepte.

Mon pa anvi al dan bann detay sa ki mon pe sey dir la akoz petet i kapab ofans serten dimoun, me selman nou konpran poudir nou bezwen annan en konversasyon nasyonal lo *what is the norm*.

Ki lasosyete i bezwen aksepte pour viv avek, dan en fason pou anmenn en kominote pli vibran, pli pozitivite, pli devoue.

Avek bann *trend* ki nou pran nou anmennen, pour anmenn dan pei e ki nou pe sey fer li vin *the norm*. E sa i afekte parfwa mantalman psikolozikman. E la en

terminnan mon anvi koz en pti gin lo sa zafer laspe mantal psikolozik nou pep.

E i domaz ki Minis Fonseka, letan ti vini in aksepte pour dir i annan en problem mantal ki pe arive e letan Onorab Loze en pe letan pase ti demann li kestyon, Minis, ti dir lo baze lo bann *suicidal rates* ki ti pe arive dan pei Minis, ti dir napa problem okenn problem mantal - pa alarman sa.

Be apre li menm li i vini in admet. So nou annan en problem mantal ki nou bezwen adrese fas avek sa bann defi.

E bokou dimoun i strese, viv anba presyon e i napa letan pour son zanfan dan en sans, e mon, mon tir sapo pou bann ki sey fer sa letan pour son zanfan pour anmenn ledikasyon pli devan pour son zanfan; pour anmenn bann pozitivite, pour li kapab devlope akoz i pa anvi anmas en problem sosyal alavenir.

Kot i war enn son zanfan nek i vini, swa in ganny en maladi, swa i tonm anba laz i pa ankor pare, akoz i pa ankor travay, kot li i bezwen resoutenir, kas programm lavi.

I pour arrive sa me mwan, mon salye tou bann paran ki pe sey anpes sa arrive ki pa ti ankor

ler, akoz zenn i bezwen pas son faz zenn pour li vin adilt.

E ler ou a vin adilt, la ou an pour ou pran bann desizyon pour ou form ou fanmir, ou bezwen travay, ou a *build* ou lakaz e la ou ava vin enspir ou zanfan ki pou vini demen.

So Mr Speaker, mwan, mon santi poudir sa Mosyon malgre i pe koz lo pozitivite, i pe koz lo responsabilite, mwan santi poudir annou tous pli lwen lo ki fason pour fer sa arive.

E la fason fer sa arive, se atraver bann programm ki ganny finanse par Gouvernman avek lapir sekter prive bann NGOs ki a marye ansanm e ki a dekol dan tou sours lasosyete.

E sa si i arive, nou war en zenerasyon ki pour sanze, ki pour vin pli pozitivite. As at now mannyer keksoz i ete mon pa pe war sa pe arive? Mersi.

MR DEPUTY SPEAKER

Mersi Onorab Aglae. Prosen entervenan lo lalis se Onorab Naidu.

HON SATHYA NAIDU

Mersi Mr Speaker. Bonzour tou dimoun ki a lekout e ki pe swiv sesyon ozordi.

Mosyon anmennen par Onorab Samynadin, i pe adres lazennes, lazennes i nou fitir e nou

bezwen fer en evalyasyon serye, pour nou kapab asire ki lavenir anba nou ladministrasyon i enn ki briyan.

Wi, pour nou kapab ganny en lavenir briyan, i annan enta travay ki pour bezwen ganny fer par tou bann parti prenan. In annan sa laspe spirityalite, ki'n ganny tous lo la espesyalman par mon koleg Onorab Labonte, kot in sey fer konpran ki savedir spirityalite. E i enportan pour nou kapab regard li en pe pli profon.

Akoz atraver en latitud, ouswa en fason lavi avek en nivo spirityalite, i kapab anmenn en kantite benefis pour ou konman sa endividé, pour ou kapab etablir ant sa ki byen e ant sa ki mal.

E nou lo nou kote nou, nou le ki lazennes i pran en semen ki bokou pli meyer, an konparezon ek sa semen ki plizyer lezot in pran, kot nou war ozordi i regretab poudir ki problemm lakol, problemm adiksyon espesyalman drog, i enn ki'n afekte en zenerasyon.

E Gouvernman dizour pe fer tou sa ki posib pour kapab retir sa pwazon, ki pe sirkile dan tou bann diferan lokasyon, ki pe afekte lavi nou bann zenn.

E dan ka Saint Louis obor kot Ladministrasyon Distrik i annan en sant kominoter e ler

mon ti'n antre ti'n annan drog ki ti pe ganny vann.

E lo nou kote nou'n fer tou sa ki posib pour nou non selman *deal* avek sa sityasyon drog, me pour nou kapab met sant kominoter annord.

Ziska preznan 1.2 milyon in ganny envestir e sa lenvestisman i en lenvestisman ki pe la ver zenn akoz mon rapel ki avan ki nou ti pe al konmans renovasyon, ti annan en groupman legliz.

Me laplipar zot se bann zenn ki sorti dan bann differan distrik enkli Saint Louis e tou le Dimans zot zwenn, zot pratik zot lafwa dan en fason ki en pe inovativ, ou kapab dir zot in amenn li lo nou lannen 2024.

Kot i annan sa laspe lanmizman osi ki'n ganny ancadre, ki fer ki lazene i pe pratik en keksoz ki pozitiv, i pe pratik en keksoz ki anmenn zot ansanm.

Me selman avek en bi pour kapab angaz zot dan bann laspe ki pozitiv, ki kot zot pour war zot pe avans en pa annavan e non pa an aryer.

E alors bann tel linisyativ ki'n ganny pran par bann zenn, i devret ganny ankouraze. E mon osi war tanzantan i annan bann groupman zenn ki fer bann *clean up*.

E sa bann zenn ki pe retir salte bann ki bokou pli aze ki zot e bann endividé ki itiliz bann differan sit pour kapab fer zot *picnic* e bann lezot ankor.

Zisteman Onorab Desheila, ti'n anmenn en Mosyon lo lanvironnman kot nou ti pe sey sansibiliz nou pep an sa ki konsern responsabilite ki zot bezwen pran. E nou war kot bann zenn i angaz zot dan bann keksoz lo pozitiv lo kapab ed zot bouz de lavan.

E ler nou war bann zenn ki pe debourye espesyalman lo kote SNYA - mon rapel an 2013 se pa lot ki mwan ki ti'n soumet en seri rekomandasyon.

E dan sa bann rekomandasyon mon ti pe pouse pour ki nou ganny en *Seychelles National Youth Assembly*, ki ganny elekte par lazene.

E sa mon ti fer an 2013 e Minis, sa letan ti Minis Macsuzy Mondon, e mon annan laprev a sa ki konsern mon bann rekomandasyon ki mon ti soumet.

Zot pou finalman war ki anba nou ladministrasyon, nou'n nobou kapab pran sa linisyativ e enplimant li.

Mwan dan en serten sans mwan, mon fyier poudir kantmenm mon lavwa sa letan

pa ti pe ganny ekoute koman en zenn.

E ozordi mon ti Manm pli zenn dan sa Lasamble e mon fyer pour war mon administrasyon pe pran sa linisyativ pour ankouraz bann zenn pour swiv en model ki anliny li avek la demokrasi, latransparans e bonn gouvernans

Ler nou konmans met sa bann valer dan nou bann zenn a en tre zenn az, nou pour ganny bann dirizan ki responsab.

E lo sa kote latab i annan mon koleg Onorab Samynadin, en zenn, Onorab Naddy Zialor en lot zenn, Onorab Michel Roucou, en lot zenn ki tonm dan sa kategori 16 a 35 an. E osi Onorab Anne Bistoquet, so i montre ki dan nou parti osi dan en serten sans dan politik nou parti lazenes i annan son plas.

E fodre ki zenn osi i travay dir pour ariv okenn par ki zot anvi arrive dan lavi. in pran mwan 10 an pour ariv kot mon'n arrive e pour sa ou bezwen sakrifye. Ou pour bezwen disiplinen e ou bezwen travay dir.

Sa i aplik dan nenport ki keksoz ki ou fer dan lavi - pa ekspekte ki lavi i fasil. Lavi i annan en kantite defi ki ou pou bezwen fer fas avek.

Si ou tonbe ou pour bezwen trouv sa kouraz ann dan ou, si ou napa *at least* i bezwen annan sipor paran. Me i regretab ozordi kot sosyete - annou mazin byen depi 2011 zot ti pe sey anmenn renesans sosyal, reform e mon rapel se Mr Vincent Meriton sa letan ki ti pe sey diriz sa zefor.

E mwan, mon ti siort sa zefor konman en zenn dirizan sa letan dan SNP kot mon ti dir «wi nide i bon» me malerezman lenplimantasyon pa'n vreman marse, ki fer ki an 2024 sityasyon dan en serten sans i bokou pli grav, i bokou pli pir.

E i fer ki nou, nou annan bokou plis travay pour fer e mon fermeman krwar ki anba nou ladministrasyon, nou pa pou fer rasanble bann zenn kot nou pour zis donn kot lalkol ek lanmizik.

This was being done back them in the day anba JJ Spirit Foundation e mwan, mon kapab dir ou, anba mon watch kot Ladministrasyon Distrik Saint Louis - sant kominoter Saint Louis.

Ler mon pou etablir mon *games room*, ler mon pour etablir mon *computer room*, ler nou pou fer tou sa travay pour lazenes Saint Louis i pour napa en gout lakol, ni sigaret ki pou antre dan sa sant kominoter.

Tou marmay pour ganny en *membership card* pour zot ganny akse ek sa facilite - ziska prezan pour kout 250 mil a 300 mil, mon le dir mersi tou bann *sponsors* ki krwar dan sa vizyon.

E ki le donn lazences sa koudmen sa sipor neseser. Akoz mon le met en *computer room?* Akoz mon'n war lo teren pa tou landrwa, tou lakaz kot en zanfan i kapab asiz se li pour li kapab etidye.

Akoz la fason ki zot paran i ete. Sa zanfan pa'n demande pour son paran vin en adikt swa dan lakol, swa dan drog, me *these are the things that we have to deal with.*

E dan lekol fodre ki annan bann *extra-curricular activities* ki kapab trenn zot ziska 6 er otan ki posib e dan sant kominoter Saint Louis-nou, nou anvizaze fer sa pour kapab devlop nou bann zenn.

E anmenn zot ver en pli meyer demen en pli meyer semen, kot zot pour war zot pe angaz zot dan bann keksoz ki pozitiv.

Sa ki pa pozitiv se asiz anba en pye mang apre ou pe konsonm drog, ou pe konsonm lakol; wi ou a pe ganny en konservasyon konmansman 8 er bomaten ziska 5 er apre midi,

me *that kalite lifestyle* pa pour anmenn ou okenn par

E i enportan pour bann ki pli ptipti a laz 6 an, 7 an mwan, mon bezwen fer tou sa ki posib pour sov zot. E anmenn zot ver en semen bokou pli mye

E Onorab Aglae, ti'n dir «napa sipor.” Mwan, mon kapab dir atraver Gouvernman Lokal, i annan sipor ki zot donnez atraver en *activity proposal* pour ou fer en maspor, me selman wi sa sipor pa ase.» Ler i pa ase nou bezwen swa tap laport, ouswa nou pran sa linisyativ lo nou menm. Avek sa R24 mil ki mwan, mon gannyen lafen dimwan, mon tir en pe larzan ladan pou mwan aste meday R3500, pour mwan met en pti larzan an plis lo sa *activity proposal*, pour nou kapab finalman fer aktivite ki pe kout aepre R18 mil.

Alors nou pou bezwen pran linisyativ, dan pas dir «ki Gouvernman pe fer, ki lezot pe fer?» Mon krwar ou osi, ou bezwen reflesir pour demande «ki mwan, mon pe fer.»

E mon kapab dir lo kote lenfrastriktir sportif ler nou regard toulour Mahe, Praslin, La Digue tousala in tonm an rin, be anba ki *watch* in tonm an rin?

Kot ladministrasyon obor kot Ladministrasyon Distrik

Saint Louis ziska prezan nou'n envestir R2.5 milyon, pour nou kapab met nou laplenn lo en nivo ki akseptab e menm nou kort lo en nivo lo en standar ki akseptab.

E i annan lezot travay ki pe ganny fer i pour pran *at least* en 2 mwan ankor, pour nou kapab konplet sa travay e Mardi mon le dir mon frer mersi pour sa zenerozite.

Ou'n vin devan apre ki mon'n tap pa mal laport e ou'n dir «mon a fer ou ganny R660 mil pour ou kapab fer sa proze arive, akoz mon war ou vizyon, mon war ou rev.»

E sa i bann linisyativ konman bann dirizan nou, nou bezwen pran. E mon konnen ki ou konman Onorab Henrie, konman Manm Elekte pour distrik Mont Buxton, ansanm nou annan en bon lantant travay avek lekol Belonie tanzantan mon panse ki ler ou war lekol Belonie pe mont lo Nouvel poudir zot in sorti premye.

Ouswa bann zelev pe fer ekstrememan byen i anmenn lafyerte pour nou, e nou konnen poudir konman bann *MNA* i annan bann kontribisyon ki nou fer *behind the scenes* nou pa poste lo *Facebook* pe rod laglwar.

Toultan parey serten i fer, zis en fwa rar zot fer, apre zot fer konmsi zot pe fer en gran travay. Me nou lo nou kote nou, nou senser nou donn tou lankourazman neseser, lo kote bann *eco school club* mon konnen Onorab Henrie, in vreman travay ansanm ek sa bann marmay, pour netway pa mal landrwa dan son distrik, pour amelyor *facade* son distrik pour fer sir ki la kominate i zouir en benefis.

E se pa lot ki nou zanfan nou bann zanfan, bann zenn ki pe donn nou en koudmen pour akonplir sa vizyon, pour akonplir sa rev. Se la kot nou kapab itiliz bann manrmay dan bann fason ki pozitiv. Annou pa asiz obor bann zenn ki lo *methadone* pour vin dir *methadone* pour arete, Gouvernman i annan sa dan zot lentansyon.

E annou pa asiz ek bann endividji, bann zenn ki zot lespri i en pe feb, pour fer politik bon marse parey serten in fer 2 Sanmdi pase pour dir mwan, mon anvizaze fer isi, mwan, mon anvizaze fer sa, apre zot menm zot ki pour vin dir mwan, mon pe *harass*.

Mwan, mon pe *harass* zenn zot ki pour vin dir? Apre se zot menm zot ki pour enstig bann zenn pour vann drog,

pour dir i *ok* pour vann drog. Mwan pour mwan i pa *ok* pou vann drog angaz ou dan bann keksoz ki pozitiv.

Se sa ki mwan, mon krwar ladan e kot Saint Louis sa bout ki konsern sant kominoter, ki konsern sa kort, ki konsern sa laplenn i annan en transformasyon radikal ki pe arrive.

E zis la dan pe koze ler mon'n koze en msye in anvoy en mesaz pou dir mon «mon a fer ou ganny R55 mil pour fer ou aste touk lapentir, pour fer en *mural* lo laplenn, eski sa pa en keksoz ki pozitiv?

Anba nou Gouvernman i annan kantite keksoz pozitiv ki arive. Tou bann parti prenan depi SNYC, NSC, Minister pour Sports ek Lazenes sakenn de zot, zot annan en par pour zwe pour kapab fer sir ki nou bouz ver sa semen pozitivite.

E mwan, mon krwar e mon asire poudir ki tou mon bann koleg - mon konn Onorab Michel Roucou tanzantan mon war li pe tap en *football* ek bann marmay dan en *state*.

Sa i bann linisyativ ki nou bann Onorab i pran; mon konn Onorab Arissol zot in etablir en *Library* pour kapab fer sir ki bann zenn i angaz zot dan bann keksoz pozitiv.

Zot osi zot annan en klib fantastik ler i konsern lo kote *Eco School* e zot enn bann pli meyer klib ki mon kapab fer resorti ki i egziste.

Pour bann lezot distrik swiv, kot nou partaz bann diferan pratik ki nou, nou pe fer, pour fer sir ki nou bouz ver en semen ki ranpli avek prosperite.

E mon, mon konnen ki lazences, wi sa ki nou, nou krwar an sa ki konsern zot ler i annan bann persepsyon ki negativ, i zot responsabilite osi pour sanz sa persepsyon.

I zot responsabilite pour kapab fer larestan sosyete ki annan dout lo zot pour dir non mon pa pare; mwan, mon pare pour leve mwan, mon pare pour travay pour mwan ganny en meyer demen.

E ozordi nou annan en Gouvernman ki pare pour akonpanny ou, tou dilon sa semen. Ou politik i pa ganny regard ladan pour ou pa ganny en loportinite parey mwan, mon ti'n manke, an 2011 ler mon ti'n ganny dir mon pa ti kalifye pour mwan al dan en lekol pos seconder, ki mon ti oule ale.

Ouswa ou prop paran pour ganny viktimize, akoz ou krwayans politik e ler ou paran i ganny viktimize akoz ou krwayans politik eski i pa afekte

ou konman sa zenn dan sa lakour?

Tousala se bann keksoz ki nou, nou'n eliminene e nou, nou fermeman krwar dan pozitivite. Mersi.

MR DEPUTY SPEAKER

Mersi Onorab Naidu. Onorab Churchill Gill, ou *next* lo lalis.

HON CHURCHILL GILL

Mersi Mr Speaker. Bonzour tou dimoun ki pe ekout nou.

Mr Speaker, mon le remersi tou bann paran ek bann zenn ki zot *despite* tou bann difikilte, oubyen bann *challenge* ki zot in kapab fer fas avek ziska konmela. Zot in kapab mentenir zot rol pour mentenir en bon moralite, spirityalite e an menm tan pozitivite. Akoz menm si Mosyon pe koz lo tousala.

nou bezwen rekonnet osi ki pa tou cours zenn Seselwa ki neseserman dan sa bann kalite sityasyon, akoz i annan paran ki'n pran zot responsabilite e bann zenn osi ki'n pran zot responsabilite.

E i annan pe kontinyen pran zot responsabilite. Nou bezwen demann nou lekor ki mannyer ozordi nou pe fer deba lo en size parey.

Nou tou ki la anndan *given* nou laz, nou konnen

poudir en letan dan Sesel nivo disiplin ti annan en repitasyon - mon'n tann plizyer Manm a plizyer Mosyon.

Isi dan sa Lasanble tou le de kote latab, eksplik zot leksperyans kot disiplin - mon menm rapel kot en Onorab, ti dir si ou pas dan semen ou pa'n dir madanm entel bonzour, ou pour dan problemm i pour menm bat ou.

E ler ou pour ariv kot ou, ou pa ni pour menm dir ou manman ou'n ganny bate, akoz ou pour ganny ankor bate.

Sa i montre nou poudir ti annan, ti egziste e i ankor egziste zenn ek paran ki konnen bann prensip lavi, ki en norm ki nou devret respekte.

Mr Speaker, nou tou nou konnen poudir zenn zot reseptiv dan plizyer laspe lavi e dan mazorite fwa zot tant pou swa swiv oubyen kopi bann latitud oubyen *behaviour* bann adilt.

E zot get bann adilt mazorite fwa konman bann *role model* e sa i montre nou ki sa Mosyon ki nou pe diskite ozordi.

To a large extent se nou ki devret legzanp pour sa Mosyon ki nou pe koz lo la kestyon eski nou legzanp parey nou devret été?

Mr Speaker, nou tou nou a rapel 4 an pase avan eleksyon

ti annan en *lyrics* ki ti ganny antre dan vokabiler, ti ki pa zis detri moralite, me i ti en baz pour sekwe sa fabrik Seselwa dan son popilasyon an antye.

Sa *lyrics* ki ti ganny entrodwir se "Pil lo li" annou demann nou lekor si en tel *lyrics* i pour reponn bezwen sa Mosyon ki la devan nou dan Lasanble, anmennen par Onorab sorti Au Cap?

Zot a dakor ek mwan ki kontenir sa *lyrics* i pa pour zanmen ede pour nou arriv *achieve* sa ki sa Mosyon pe demande.

Mon'n tann enn mon koleg dir ozordi 2024 i annan bokou travay, be nou bezwen demann nou lekor sa travay la kote sorti? Lekel ki'n met sa travay ki ozordi in pouse in zermen e nou, nou pe rekolte?

Mr Speaker, kot kestyon nou bezwen demande lekel ki ti *propagate* sa bann *lyrics*? Lekel sa bann dimoun ki ti deryer sa bann *lyrics*?

E an menm tan nou bezwen osi demande ki pozitivite nou ti kapab konman en nasyon tire ladan? Ki moralite nou ti kapab konman en nasyon tire ladan? Ki spirityalite konman en nasyon nou ti kapab tire ladan?

Si nou onnet ek nou lekor nou pour tonm dakor ki wi, si

ozordi nou pe diskit en tel Mosyon, nou osi nou annan responsabilite pour sa bann zenn ki nou pe demann zot, pour annan spirityalite, pour annan moralite, pour annan pozitivite.

Petet par nou aksyon nou'n, kontribye si i annan serten zot, zot koumsa, oubyen zot in arriv koumsa.

Mr Speaker, keksoz ideal ki devret ganny fer ozordi, se vin avek en lot *lyrics* ki pour reflekte sa ki nou pe rode dan sa Mosyon ozordi.

Mon krwar i ti a byen kot sa ti a revey pep Seselwa, e ti a fer nou realize bann ki pa ti kapab reziste sa tantasyon sa letan, pour zot kapab re dres zot lekor. Retourn lo larout e sa i a fer an rezulta nou a rekolte sa ki Mosyon pe demande ozordi.

Mr Speaker, en lot keksoz ki nou bezwen osi fran, mon repeate fran konman bann lezislater, konman bann adilt, konman bann paran, eski ler nou koz lo moralite, pozitivite, spirityalite nou pa pratike, eski nou pou *achieve* sa *goal*?

Eski fason ki nou viv i reflekte moralite, pozitivite, spirityalite?

Eski fason ki nou azir parfwa isi menm dan sa Lasanble, parfwa dan landrwa piblik, eski sa i pe ed nou pou

nou *achieve* moralite, pozitivite e spirityalite?

Eski nou fason azir i pour ede pour nou *achieve* sa 3 mo parey Mosyon pe demande?

Eski nou annan respe pour sa pep ki ozordi nou pe demann zot, pour annan sirtou adilt pe demann zot pour enkilke dan zot zanfan spirityalite moralite, pozitivite?

Alors si nou kapab reponn sa detrwa kestyon dan en fason onnet, nou a kapab vvar en Lasanble konmansman semenn prosen ki fonksyonn konman en Lasanble profesyonnel. E ki enkilke tou sa ki nou pe rode dan sa Mosyon avek popilasyon Seselwa.

Mr Speaker, si nou pa fer sa, nou pour retourne parey labitud, nou fer dan sa Lasanble, en zour nou anmenn en bon Mosyon nou diskit lo la, tou lede parti i aprouve ki nou'n deza fer dan sa Lasanble, me son lannmen diskisyon i pran en lot dimansyon, ki totalman le kontrer avek sa ki nou ti pe diskite ki nou krwar ti pou bon pour pep Seselwa.

Alors, mon krwar ki nou dan sa Lasanble, ki anmenn Mosyon, ki anmenn kestyon, nou bezwen konmans *walk the talk* nou menm.

Apre nou ava dir pep Seselwa, fodre nou zwenn

ansanm, fodre nou groupe, fodre nou annan kadreman pour nou kapab *build up* moralite, pozitivite, spirityalite.

Toultan nou pa fer sa, menm si nou pe anmennen, mon asir ou i annan i annan Seselwa la deor ki dir «be zot pe anmennen be selman demen oubyen konman zot fini, sa ki zot fer swa lo rezo sosyal, swa dan landrwa piblik oubyen dan Lasanble i totalman le kontrer.»

Mon swete ki sa ki mon'n fer sorti, loter Mosyon i a vvar poudir nou bezwen nou menm konmans konpran ki nou bezwen *walk the talk* e nou bezwen fer sa ki nou dir. Mersi Mr Speaker.

MR DEPUTY SPEAKER

Mersi Onorab Gill. Prosen entervenan lo lalis i Onorab Woodcock.

HON WAVEL WOODCOCK

Mersi Mr Speaker. Mr Speaker, i vreman sagrinan bomaten pou tann sa bann kalite lentervansyon sorti lo kote Lopozisyon.

Zot pe koz *walk the talk*, Mr Speaker, depi ler mon pe ekout bann entervenan lo sa Mosyon ozordi, lo nou kote latab mon'n tann bann Manm bann keksoz pozitiv ki zot menm zot pe fer endividelman.

Bann aksyon ki zot in pran, bann siper ki zot pe donn bann diferan groupman, bann zenn dan zot kominote.

Me lo kote Lopozisyon Mr Speaker napa naryen pozitiv ki zot in anmennen. Zis zot in kraze, kritike, me selman ou pa'n tann naryen ki zot in fer pour ede amenn pozitivite dan zot distrik, dan pei Mr Speaker.

Zot pe lager ek en *lyrics* Mr Speaker. Zot pe lager ek en sanson Mr Speaker, kan Mr Speaker, nou tou nou konnen poudir napa en parti politik ki'n fer plis sanson ki ankouraz vyolans

“Flit karya,”
“Kile Lopozisyon”
“Hit and run.”

Mr Speaker, kwa ki pli *worse lyrics* en sanson ouswa ler ou'n fer plizyer zanfan grandi san zot paran se akoz zot parti ki'n *involve* dan disparisyon e lanmor plizyer nou frer ek ser Seselwa. question mark

MR DEPUTY SPEAKER

Onorab, si mon zis kapab donn ou en konsey as en frer konmsi *stick on the general principle of the Motion*, silvouple. Mersi.

HON WAVEL WOODCOCK

Mr Speaker, nou pe koz lo pozitivite.

Annou koz lo pozitivite Mr Speaker, Mosyon pe demann nou pour ankouraz plis pozitivite, promouwar bann valer moral spirityel.

E pe demann nou konman en nasyon, Lasamble, nou kominote, nou tou pour zwe en rol dan devlopman bann zenn dan nou distrik Mr Speaker.

Mr Speaker, zis pour donnen legzanp i kommans avek nou e Lasamble Nasyonal i enn ki ozordi pe *lead by example* Mr Speaker.

Annou regard zisteman ki Lasamble fek fer le 20 Zen sa mwan menm Mr Speaker, Lasamble Nasyonal ti organiz en *Mock Sitting*.

Lasamble ti apel sa en *Kid MNA* kot a lokazyon *International Children's Day* zot ti stipulate en *parliamentary sitting*, kot bann zenn ti ganny evite pour asiz dan sa Lasamble Nasyonal Mr Speaker, pour stipulate en *Sitting* Lasamble.

I pozitiv sa Mr Speaker. I bann keksoz ki pe ganny fer Mr Speaker, pour montre poudir nou angaze avek zenn.

Fek annan en *career fairs* ki'n ganny organize kot lekol Plaisance, Lasamble in partisipe, ti annan bann Manm osi ti partisipe Mr Speaker.

Sa i bann kalite keksoz ki nou ganny angaze pour fer, pour ankouraz pozitivite, pour nou ankouraz e donn sipor nou bann zenn dan nou kominate, dan nou pei.

Mwan Mr Speaker, mon kapab dir ki mon'n fer, pour anmenn plis pozitivite, pour ede dan lepanouisman bann zenn dan nou distrik.

Youth Service Bureau Mr Speaker, ou konnen kot ti baze Mr Speaker? Ti baze *Horizon Complex* dan en letablismen politik Mr Speaker. Iwen avek bann zenn, iwen avek bann lekol. e ki nou fer? Mon'n pouse Mr Speaker, ki ozordi en *building* ki pa ti pe neseserman ganny *maximized to the fullest*, mon ti ankouraze. Mon ti met lanfaz ki sa landrwa i ganny aranze pour fer en *Youth Service Bureau* dan distrik Grand Anse Praslin Mr Speaker.

E ozordi Mr Speaker, mon bezwen felisit Ms Raina e osi Ms Nelle Marie pour sa travay ki zot pe fer ek nou zenn.

Ozordi e plizyer bann dimonn dan nou kominate Mr Speaker, ozordi nou annan 5 group lentere anba SNYC Praslin baze dan distrik Grand Anse Praslin kot *Youth Service Bureau* Mr Speaker.

Nou annan nou *Step up Dance club* ki pe ganny

spearheaded by Miss Marion Ragain. Nou annan nou *EGaming Rise Up club* kot marmay ki zwe Xbox kot mon osi mon ti *donate* bann kontrol *remote control* Mr Speaker.

Computeri annan marmay i vini, zot zwe *computer game* zot fer zot leson, zot fer zot resers, sa klib *EGaming* Mr Speaker, se Daruis Marie ki pe *spearhead* sa.

Nou annan nou *Media Filming Club* par Sir Wolfgang ki ed bann marmay montre zot mannyer pour tir portre, *filming* bann keksoz koumsa.

Nou annan nou *team Poem* Mr Speaker, se sa Krisson Athanase ki par deryer sa, ki ankadre sa bann marmay.

Nou annan nou *Music Club* ki se Mike Cedras ki par deryer sa e Mis May Paule osi i montre bann zenn ladans, i montre zot pour zwe bann lenstriman parey *keyboard* Mr Speaker.

E dan lekol Mr Speaker, nou annan bann aktivite pandan lekol e an deor lekol ki bann *teachers* pe ankadre bann zenn. Nou annan nou Sir Roland ki montre marmay sante, zwe lanmizik; nou annan nou Msye Bertin of *Island Vibration Band* Mr Speaker, ki'n

ede ankadre plizyer bann zenn dan lekol.

Ki sak fwa en *cohort i move to pos-segonder ou war bann larelev bann nouvo zanfan, bann nouvo zenn i monte.*

E nou annan bokou bann zenn ozordi Mr Speaker, bann benn bann zenn, zenn zanfan bann zenn ki pe partisip dan sa bann benn pe *entertain* dimoun, dan bann aktivite ki'n ganny organize o nivo distrik ou nasyonal.

SNYA Mr Speaker, Onorab Sathya Naidu in koz lo la, Onorab Sathya Naidu in koz lo SNYA Mr Speaker, nou tou nou konnen *how it was before.*

Lontan marmay ti ganny *handpicked* pour zot vin en zenn Onorab, e la ozordi pour premye fwa lo listwar eleksyon i ganny fer dan bann diferan lenstitisyon skoler kot mon war en kantite zenn i partisipe Mr Speaker.

Kot zot ganny elekte par zot *peers* Mr Speaker, parey mon ti vreman fyer ler Said Jeannevole zenn Onorab, Said Jeannevole ti ganny elekte konman pli zenn Speaker Lasanble Lazenès - Mr Speaker, selman 14 an.

Ou konnen Mr Speaker, mannyer SNYC ti ganny servi lontan? SNYC ti ganny servi konman en zouti politik Mr

Speaker. Sak fwa eleksyon zot asanble bann zenn, donn zot en bwat *take away*, donn zot en *pendrive* avek en triko pour zot vot pour en parti politik.

That was what SNYC ti ganny servi; e sa bann keksoz nou'n met en la fen avek, nou'n re donn nou bann zenn zot dinyite ki zot bezwen.

Mr Speaker, ozordi nou annan bann diferan klib, dan distrik nou annan *Spear* - Mr Jeannevole ki pe ankadre bann zenn foutboler.

Nou annan *Sir James Bau* Nou annan *Sir James Barreau* osi ki'n ede devlop en kantite zenn foutboler enkli mwan menm ler mon ti lekol ti mon *PE teacher*. In ed en kantite bann zenn ozordi devlop zot potansyel Mr Speaker.

Judo nou annan nou Calixte ek Brigitte Cesar Mr Speaker, baze Baie Ste Anne pour ankadre bann judoka.

Nou annan nou Christian Philoe Mr Speaker, pour ankadre bann zenn *judoka* - klib *up to 60* zenn par klib Praslin Mr Speaker, pour devlop nou bann zenn.

Laboks nou annan nou Roch Pirame Mr Speaker, zisteman resaman i ti *call* mwan ti annan en *issue* avek, akoz nou annan en vye *building* Mr Speaker, ki'n la pour bokou

lannen, travay pa ganny fer lo la - i ti *call* mwan i ti dir mwan “Onorab, mon pe ganny problemm sa landrwa i koule”.

Deswit mon’n pran kontak avek *CEO NSC*, nou’n organize nou’n rekouver, sa twatir pour anpes delo koul anndan ki ti pe koul lo *ring* Mr Speaker.

Nou annan nou an komunikasyon ek sa bann dimoun, pour donn zot sipor kot i neseser konman bann MNA.

Nou pa zis kapab vini, vin zis kritike, kraze, be ki ou pe fer pour ankouraz bann aktivite o nivo ou distrik? Sa ki mon’n tande bann Manm lo nou kote latab pe koz lo la.

What they are doing? Ki zot pe fer pour ed bann zenn dan zot distrik Mr Speaker.

Water Sports Centre, mon fek anmenn en kestyon Minis Zialor, in vin reponn lo size *Water Sports Centre* kot in rod en langazman ki travay pe al ganny pe al konmanse lo sa sant.

E la ankor mon bezwen felisit Jean Marc Lablache; mon bezwen felisit Jacquelin Languilla e bann lezot zenn ki pe ede ankadre sa nouveau zenerasyon.

Kot nou’n war en zenn *windsurfer* Jules Kandasamy, selman 13 an ti sorti trwazyenm

lakours Mahe, Praslin e Prezidan ti donn li en rekonpans Mr Speaker, ti fer li kado en novo *board*, *windsurfing board* Mr Speaker, pour kontinyen ankouraz li Mr Speaker.

Sa i bann keksoz ki nou bezwen pe fer. Mon mazin *Sir Sonny* ki’n re ankadre nou bann zenn *vollyballers* fiy konman garson, ki pe pran bann konpetisyon nasyonal Mr Speaker.

Sa bann dimoun, sanmenm bann keksoz ki nou merit pe siporte, ankouraze.

Lo kote *basketball* nou annan *Shaun Barbe*, nou annan *coach Knowles*, nou annan *Jackson*, nou annan klib *Praslin Boys*, Rania osi pe donn en sipor pour nou ankadre nou bann zenn Mr Speaker.

Menm si zot pe fer fas ek bokou defi akoz pli gro defi *Praslin se sponsorship* pour vin zwe bann konpetisyon Mahe.

E zot pe ganny menm alokasyon avek bann klib Mahe kan zot kou i bokou pli o pour zot fer sa deplasman pour al Mahe.

En keksoz ki mon krwar i merit ganny konsidere pour lefitir, akoz nou annan bokou bann atlet, e nou bezwen sipor zot Mr Speaker.

Mr Speaker, mwan, mon krwar lakle pour pozitivite pour devlop bann zenn se *sport*, e ki nou'n war menm lo Komite *MYSCC* nou'n fer en vizit Mahe, Praslin, La Digue, nou'n war leta ki bann facilite i ladan ozordi, bann leta deplorab ki ozordi Gouvernman pe bezwen depans plizyer milyon Mr Speaker, pour re met sa bann facilite lo en bon standar, lo en standar enternasyonal pour nou ede ankadre nou bann zenn dan distrik Mr Speaker.

E sa lanfaz ki nou Komite in met bokou lo lanfaz lo parey mon'n dir met an plas bann novo facilite, re organiz bann vye facilite.

Nou'n vizit *Unisey* Mr Speaker, par get bann konstrent pour ekoute ki bann zenn i annan pou dir. La semenn prosen nou pe al vizit STA Mr Speaker.

Nou'n angaz avek SNYA, nou ti envit zot dan Lasanble Nasyonal. Nou'n al zot *Sitting* Mr Speaker, pour ankouraz bann zenn.

La sa novo cohort byento nou pour bezwen organiz en pti vizit kot zot osi Mr Speaker.

Nou'n al vizit *Youth Hostel* Mr Speaker, pour al get konsern bann zenn Mr Speaker. Tousala i bann keksoz ki nou pe fer, nou pe angaze konman en

Lasanble, konman en Komite, e konman bann Manm Onorab Mr Speaker.

Ki nou war ozordi, bokou bann travay volonteer pe ganny organize o nivo distrik.

Mr Speaker, lannen pase nou ti netway e penn Klinik Grand Anse Praslin,-ou konnen lekel ki ti vin donn sipor? Mwan menm mon ti la, nou ti war bann zenn marmay.

Praslin Boys ti vini pour donn lanmen penn Mr Speaker. Nou kominate i vin ansanm pour fer bann aktivite. Nou fek organiz en lot travay volonteer. I ti annan ankor zenn Mr Speaker. Zenn i angaze; zenn i anvi partisipe Mr Speaker.

Aktivite pour bann zenn avek dezabilite otreman kapab fek fer enn la - *New Life Church* ansanm avek *Local Government*, mwan menm mon ti la e lezot bann *partner* parey *La Pirogue*, lafanmir Bedier ti ede pour donn en sipor pour nou ankadre nou bann zenn avek dezabilite.

La Cigale osi tanzantan i donn nou sipor Mr Speaker, e nou rekonpanse nou donn sipor bann ki fer byen.

Zwe Dezil lannen pase ler bann atlet ki ti retournen ki ti'n ganny meday lor ek meday larzan, ou konnen ki nou ti fer - mwan avek Onorab Porice Mr

Speaker? Nou ti organiz en aktivite *Lobster Bay* pour zot.

E nou ti tap laport pour rod bann kado pour donn zot pour dir zot mersi, nou apresye zot zefor. Nou pa ti rekonnet zis bann atlet. Nou ti rekonnet bann *coaches*. A plizyer repriz mwan menm personnelman mon'n donn kado bann *coaches* Mr Speaker.

Sponsorship nou rode nou tap laport Mr Speaker. Nou rode *this is how* nou ankouraz pozitivite o nivo nou distrik Mr Speaker, nou bezwen ankouraz nou bann zenn.

An konklizyon Mr Speaker, en kantite keksoz mon war pe arive ou konnen i sagrin mwan ki Lopozisyon pa pe koz ditou lo bann keksoz pozitiv ki pe arive.

Lo zot menm zot personnelman ki zot pe fer dan zot distrik? Ki zot pe fer pour ankouraz sa? Ki zot pe fer o nivo nasyonal?

Mr Speaker, lamars pour lanvironnman fek ganny organize par lekol Baie Ste Anne Praslin zis mwan avek Onorab Porice, ki ti la avek Minis Joubert, Mr Speaker, an kolaborasyon avek Lanvironnman.

Scout fek organiz en aktivite en group in al Sid Kore e la ankor sa lannen mon krwar

si mon pa tronpe zot pe al Moris Mr Speaker.

Unity relay ti ganny organize Mahe avek Praslin e mon ti war Onorab Naidu pe taye, menm si apre 5 minit i ti pe ronfle, in feb Mr Speaker, i ti pe donn en lankourazman, i ti pe donn en lankourazman bann zenn dan son distrik Mr Speaker. Sa i bann keksoz ki nou bezwen fer konman mwan menm mwan Mr Speaker, mon'n partisip dan bann konpetisyon *basketball*.

E la mon fek ganny envite pour zwen bann veteran pour nou al fer bann aktivite *sport* pour nou al *compete* avek bann zenn.

Mr Speaker, nou bezwen angaz nou bann zenn. Ler nou organiz plizyer bann *hike* i ganny organize, mwan personnelman mon'n akonpanny bann zenn, sponsor zot bann aktivite ki zot in fer Mr Speaker.

Nou bezwen fer sa. Nou nou bezwen zwe en rol pour nou ankouraz sa bann keksoz. Rasambleman *Youth For Christ*: Ti annan en zour mon ganny sok menm zour ki nou ti pe netway klinik, mon tann en tapaz deor, transpor pe pase ler mon sorti ti annan en *motorcade*.

En *motorcade* par group *Youth For Christ* kot bann diferan legliz in zwenn ansanm pe fer rasanbleman, pour ankouraz spirityalite, pozitivite dan nou pei Mr Speaker.

E pandan vakans ki nou war? Pandan vakans Mr Speaker, i annan bokou, bokou bann klib, bokou bann klib Mr Speaker, ki ganny organize an deor lekol Mr Speaker.

Mwan dan lepase mon'n form parti bann *campus* ki mon'n organize dan plizyer lekol dan lepase avan mon ti antre dan politik.

Me selman i pa anpes nou koman bann Manm pour nou osi angaze e ede, e partisip dan bann aktivite ki bon, ki ankadre nou bann zenn Mr Speaker.

Sa i sa kalite lespri sa Mosyon, sa i lespri sa Mosyon, sa i ki nou bezwen, ki nou anvi war dan nou pei Mr Speaker.

Nou pa kapab zis vini toultan tou Mosyon vin fer en kalite polemik, en bann kalite politik bon marse, la nou bezwen pe ankouraze vin devan dir ki pour fer.

Ki mwan, mon pe fer pour mon ankouraz bann zenn, ki aksyon mon pe pran *ok?* Zot bezwen *walk the talk* Mr Speaker, pa zis vini kritike.

E lo Praslin - lo Praslin sel Manm ki mon war pe angaz

bann zenn Mr Speaker, mon war Onorab Porice *fulltime* pe angaz bann zenn.

Mwan menm pe angaz bann zenn, dan bann aktivite zenn zanmen en fwa mon pa'n war Onorab Churchill Gill dan okenn aktivite. E dimoun i remarke, dimoun i dir sa Mr Speaker. Mr Speaker, *ok.*

Mr Speaker, *this is the spirit* of sa Mosyon selman lespri sa Mosyon se wi, nou tou, nou bezwen nou annan en rol pour zwe.

Lasable nou pa kapab zis depan zis lo Gouvernman pour fer tou keksoz. Nou menm nou, nou bezwen en linisyativ ennler Mr Speaker, sa ki enportan, sa ki nou bezwen ankouraze.

E sa lespri par deryer sa Mosyon ki Onorab, Kelly Samynadin, in anmennen ozordi e mwan, mon pour siport sa Mosyon.

E mon demann zot lo lot kote latab osi donn en sipor sa Mosyon annou ede nou osi. Annou fer bann keksoz ki pozitiv pour ed lepanouisman nou bann zenn dan nou pei Sesel.

Avek sa 2 mo, mon dir ou mersi Mr Speaker.

MR DEPUTY SPEAKER

Mersi. Mon krwar nou ava ganny sans ekout ankor en

entervenan avan 12 edmi Onorab Cosgrow, ou a kapab rann lantenn SBC 12 edmi?
Very good, proceed.

HON WALLACE COSGROW

Mersi Mr Speaker. Bonzour ankor enn fwa Mr Speaker.

Mr Speaker, granmoun i dir tou lanmor i annan son siny. Ou konnen ler dimoun pe noye la, i rod tou pti fason i graponn ek nenport kwa pour kapab fer sir ki i reste flote.

Si Seselwa i asize i reflesir en pti pe byen, pandan sa bann dernyen detrwa mwan or petet lannen, nou pe tann en bann parol sorti lo lot kote latab, ki pe konmans dir nou pe fer transformasyon, nou'n fer sanzman transformasyon.

La en lot parol se pozitivite. Pozitivite Mr Speaker, byento nou pour tann *sacrifice* - nou'n sakrifye sepa kisia dan en sanson - vin Elton John konmela.

So Mr Speaker, akoz tousala ozordi Mr Speaker? Parti lot kote latab Mr Speaker, zot in realize pour pandan plis ki 30 ekek lannen, zot in donn en koudmen senm sa kalite kiltir ki ozordi zot pe rekole.

Zot in senm vanzans, laenn, lakoler parmi popilasyon e ozordi zot pe rekole sanmenm, e ozordi Mr Speaker

zot pe sey sanz *narrative*. Zot pe vin ek en *narrative* pozitivite, akoz zot pe rekole sanmenm.

Mr Speaker, be solman sa ki ankourazan ozordi, se ki lamazorite Seselwa ki nou, nou koz avek, ki mwan, mon koz avek in fini dekouver zot dan gran kler.

E malgre zot pe sey sanz *narrative* ozordi Seselwa i konnen, e Onorab Gill, in koz lo en sanson zot pa le koz lo la ozordi.

Be sa sanson Mr Speaker, in senm en kantite divizyon parmi nou popilasyon, parmi lafanmir.

Toulkou mon donn en legzanp Mr Speaker ; 2016 mon pe kanpanny Plaisance enn pti garson sa oter i sant pil lo li avek mwan! Sa oter Mr Speaker.

Konmsi ou kapab konpran Mr Speaker, ki lenpak kalite dizesyon sa in fer dan nou pei, e ozordi nou pe koz lo pozitivite?

Mr Speaker, pozitivite, pozitivite Mr Speaker, letan ki nou, nou ti o pouvwar Mr Speaker, pozitivite in annan en renesans kiltirel dan sa pei, kot lanmizik Seselwa, lanmizik Kreol in ganny son valer Mr Speaker.

Sa pozitivite sa nou ki'n anmennen, kot bann artis in ganny valorize Mr Speaker.

Ozordi kantite artis pe *perform* ki swa lanmizik, lar, teat e tou.

Mr Speaker, sportif; in annan an kantite legzanp kot nou'n devlop spor Sesel, kot nou'n anmenn pozitivite, kot nou'n anmenn meday Mr Speaker.

En komodite ki ozordi i rar anba sa 4 an Gouvernman *LDS* nou annan meday nivo Lafrik Mr Speaker, Zwe Dezil nivo Lafrik, nivo *Commonwealth* Mr Speaker. Pozitivite nou'n semen parmi nou lazences.

Mr Speaker, ledikasyon, nou'n etablier ledikasyon, sistenm ledikasyon ki'n epanouir nou lazences.

Ozordi nou war bokou dimoun menm dan sa Lasanble ki ozordi zot in vin sa ki zot anvi vini. Nou war enzenyer, nou fek koz lo enzenyer, pilot 2 semenn pase, Dokter tou sort kalite, *businessmen* ki'n anmenn nou pei kot i ete ozordi.

Sosyal, lasante nou'n la avek nou pep e nou'n devlop sa pozitivite avek nou pep pandan bann letan ki nou ti la.

Mr Speaker, be selman ozordi nou tann lot kote pe koz pozitivite, nou pe koz lo spirityalite, pe koz lo ranforsi devlopman, bann aktivite pour ranforsi devlopman spirityel, kan zot in kontribye Mr Speaker, pour annan sa

dekadans moral e spirityel parmi bann aksyon e bann parol ki zot in senmen Mr Speaker. Tousala.

Kwa ki ozordi Mr Speaker, ki fer Lasanble Nasional debat lo en tel Mosyon? Sirman Mr Speaker i bezwen annan en sir dekadans; e en mank lentere parmi serten kous nou lazences, pour vir ver bann konportman e lenfliyans anti sosyal.

Mr Speaker, be annou koz en pti kou lo sa bann problem ki ozordi pe afekte nou lazences e nou sosyete, me an partikilye nou lazences Mr Speaker.

Limero 1 Mr Speaker, labi drog; labi drog Mr Speaker i en refleksyon sa lalit kont drog ozordi ki swadizan Gouvernman pe dir nou "zot in successful".

E ozordi parey Vis Prezidan ti dir Mardi, nepli annan eroin. Be kote nepli annan eroin Mr Speaker?

Ozordi drog i reste en problem dan tou nou bann kominote, dan sou distrik partou, drog i reste en problem.

E i annan bokou bann zistwar ki ou pe tandé ozordi, ki drog i pli bokou, drog pe ganny vann par bann dimoun ki annan konekssyon avek Leta.

I annan en problem Mr Speaker, drog i reste en

problemm e ozordi nou pa pe adres sa size drog parey i ti devret ganny adrese.

Yer nou'n tann Minis dir, pour annan en Sant Reabilitasyon - nou pa konnen kan i dir nou poudir bann bayer de fon, bann partener i ankor angaze.

Me solman zot pa ankor konnen kan pour fer. So i mank striktir, i mank travay par Gouvernman pour rezourd sa problemm.

Ki swa lo kote pour redwir demann e pour reabilit dimoun ouswa pour anpes li antre Mr Speaker, tousala i mank en kordinasyon.

E lefe ozordi ki nou pe war se sa problemm ki pe kree par lazennes Seselwa.

Limero 2 Mr Speaker, lansentman anba laz; Minis pour Zafer Sosyal ti vin dir nou bann statistik alarman ozordi an se ki konsern lansentman anba laz.

Mr Speaker, be problemm i konmans dan lafanmir. Problemm parey Onorab Aglae in dir taler lafanmir, kot lafanmir napa letan ek kanmarad.

E sa i pa zis ariv koumsanmenm Mr Speaker, i annan en problemm dan lafanmir kot ozordi paran i war

zot strese pe bezwen rod en fason pour fer 2 bout zwenn.

Pe sey travay 2 job pa pe ariv dan lakour a ler pour attend to zot zanfan e nou war kot prezan bann konportman anti-sosyal.

I antre parmi la fanmir i afekte bann zanfan e ou trouv sa dekadans sosyal dan sa striktir lafanmir.

I bann problemm lasosyete ki pe de koul dan lafanmir e pe afekte bann zenn dan lafanmir Mr Speaker.

Problemm maladi mantal Mr Speaker, limero 4; ozordi en kantite Seselwa i strese avek presyon lavi, avek problemm pa konnen ki mannyer pour fer 2 bout zwenn e pe reflekte dan bann diferan maladi mantal parmi nou popilasyon.

Enkli zenn ki pe rezulta ver posib swisid. Ka i alarman. I monte e statistik i la, in prouve, kantite bann *attempt suicide* ozordi ki pe ganny rikorde. Erezman Mr Speaker, nou pa devret annan ni menm 1, me erezman sa kantite *attempt* pa ariv pour bann ka konfirmen swaside Mr Speaker.

Tousala Mr Speaker, se bann problemm ki pe afekte lasosyete, afekte la fanmir e ki pe afekte direk nou bann zenn.

I bann presyon lavi kot en sosyete pa pe pran ka avek son

popilasyon ek son bann dimoun. Bann keksoz ki'n ganny tire vitman, dizour a lannmen ganny arase. Popilasyon ganny arase bann keksoz e ozordi zot war zot, zot tousel dan difikilte.

Pa tou fanmir Mr Speaker. I annan fanmir ki kapab debourye. I annan fanmir ki annan fason pour zot kapab mannye sa sityasyon, me i annan fanmir pa kapab.

E sa i tous lamazorite lafanmir ki pli vilnerab dan sosyete, ler ou tir son lasistans sosyal ou fors li al fer 2 travay.

E ler ou fors li fer 2 travay Mr Speaker, ou fors li negliz son zanfan, negliz son fanmir i annan en dekadans sosyal ki vini dan lafanmir e sa i repantir dan lasosyete.

So ler nou pe koz lo annan bann aktivite moral, spirityel pour lev nivo pozitivite, lavi, nou bezwen pran kont tousala, nou pa kapab zis koze sa Mr Speaker.

I pa zis vin par koze, i bezwen annan bann aksyon. Ozordi ki Minister lafanmir pe fer Mr Speaker, i bezwen annan bann aksyon.

An term get lafason ki la fanmir pe viv ekonomikman, get bann sipor sosyal ki annan pour la fanmir, sipor moral ki annan pour lafanmir Mr

Speaker, pour kapab ede ki sa zenn finalman pa perdi e pour al war li dan en sityasyon sosyal kot apre i pri i pa kapab sorti.

Mr Speaker, ler nou pe get sa Mosyon an zeneral Mr Speaker, sa Mosyon pour mwan i pran responsabilite i met lo endividé.

Wi, lendividé i bezwen annan serten nivo responsabilite, me mon krwar pour nou kapab fer sa sanzman mon santi ki sa Mosyon i devret osi viz son responsabilite ver Gouvernman.

Akoz Gouvernman i annan en responsabilite Mr Speaker. Petet lafason ki mwan, mon panse, lafason ki nou, nou parti i panse, avek lafason ki zot, zot parti i panse, petet i diferan. Me nou, nou krwar sa ki Gouvernman i annan en responsabilite e i bezwen akonpanny son popilasyon, son pep dan bann demars ekonomik sosyal pour zot kapab epanouir. E pour zot kapab arriv *the next step* dan zot lavi.

Ou pa kapab zis larg li, aras son lasistans sosyal, aras li tou sa ki i ti annan dizour a lannmen, e espekte tou keksoz i *ok*, nou pou annan pozitivite, nou pou bouze, tou dimoun pou *happy* Mr Speaker. I pa mars koumsa. Ozordi sa ki nou pe

anmase i en refleksyon aksyon ki'n ganny fer pandan sa bann dernyen lannen.

I en refleksyon vizib aksyon ki'n ganny fer par sa Gouvernman pandan sa bann dernyen lannen. E pour nou kapab re enstil sa pozitivite dan dimoun, nou bezwen osi kapab vwar nou menm nou Mr Speaker. Nou menm nou, nou bezwen get Gouvernman li menm bann aksyon ki i pe pran.

Bezwen rekalkil lafason ki i pran bann desizyon e fer ki i a kapab retourne sa konfyans, sa pozitivite ver lafanmir, kot tou i konmanse.

Ki an dekoul dan lasosyete ki nou ava kapab war en lakkerte dan fon sa tinel Mr Speaker, akoz ozordi si nou kontiny sa menm semen.

Si Gouvernman i kontinyen lav son lanmen dan son responsabilite, mon asir ou Mr Speaker, ankor dan 2 an, 3 an, nou pa pou war okenn sanzman okenn pozitivite, okenn transformasyon.

Nou pour war nou plis dan fernwar, dan difikilte kot bokou plis nou bann zenn pe ganny afekte, e zot pour war li bokou pli difisil pour zot war li pour zot sorti dan sa trou ki zot in tonm ladan.

So Mr Speaker, mwan ler nou koz lo pozitivite, ler nou koz lo spirityalite nou bezwen koz li avek fransiz lonnekete e non pa lipokrizi.

Nou bezwen admet kwa ki nou'n fer dan lepase akoz ler nou'n koz lo sa zafer' pil lo li la' ou a krwar zot pa'n kontan.

Me nou bezwen admet i en fot ki zot in fer, ti en fot ki zot in fer zot le pil lo dimoun, nou bezwen admet poudir nou ti mal e preznan nou ava bouz devan.

Nou ava bouz devan nou ava vin bann mesaz dan nou bann sanson politik bokou pli pozitiv. Be en mannyer nou ava enspir pozitivite dan dimoun *but* i konmans avek nou, i konmans avek zot politisyen - vin avek bann keksoz ki enspir pozitivite.

Nou pa kapab dan tou *rally* nou sote, nou pile apre nou anmenn en Mosyon ki dir annou enstil pozitivite dan dimoun; be i pa mars koumsa sa ; pa mars koumsa.

So Mr Speaker, mwan fransman dir ou, mon pa war senserite ek lonnekete, akoz nou koze la apre sa ki ganny fer e dir an deor Lasanble dan Gouvernman, i pa *match* i pa ale ansanm avek sa ki nou pe dir isi dan sa Lasanble

So mwan pour mwan, mon pa - *unless* ti annan serten senserite pour nou bouz dan sa direksyon, mwan, mon pa war sa Mosyon ozordi Mr Speaker, i fer sans. Mersi bokou.

MR DEPUTY SPEAKER

Mersi Onorab Cosgrow. Nou pe apres lafen nou travay pour la nou pour *adjourn* ziska 2 er.

Me avan nou fer sa, ti reste zis 3 Manm ki reste pour koze apre midi nou'n fini ferm lalis - sa i Onorab Loizeau, i Onorab Loze apre i annan Onorab William apre i ava annan *right of reply*.

Aprezan Speaker, pe retourn dan *Chair* apre midi be bomaten Onorab Naidu, ti oule lev en *matter of privilege*, so lefe ki mon la e mon pa pe retournen apre midi, nou pa le *burden* Speaker, *with the matter* mon a demann ou, pour ou *state ou matter brief* parey *Standing Orders* i dir ou, pour nou konnen ki pwen ou ti pe leve silvouple. Mersi.

HON SATHYA NAIDU

Yes Mr Speaker. Mersi pour akord mwan sa benefis zisteman pour koriz en *misapprehension* ki ti'n ganny fer yer lo Mosyon, ki ti'n ganny table par Onorab Esparon.

E ti'n annan mon koleg Onorab, lo lot kote latab Onorab Pillay, ki ti'n dir konmkwa mon avek Minis, Dezinyen nou ti'n kriye. E nou ti'n angaz dan bann fason fer kot nou'n *threaten* en lot dimoun.

Akoz mon'n resevwar pa mal *text messages* ki sorti kot bann endividji, ki ti'n partisip dan sa *meeting*.

E ti annan 13 *household* ki ti dan sa *meeting*, ekskli sa enn ki pa ti ladan e wi ti annan en lensidan me pa la fason ki Onorab Pillay in fer resorti.

Nou ti pe fer en travay ekstrememan enportan, akoz le 7 avek le 12 Desanm ler gro lapli ti'n tonbe *all 14 households were flooded and now we are trying to find a solution*.

E Zedi nou ti fini sa rankont 7 er diswar e Dimans mon ti'n retournen lo teren akoz i ti annan sa lensidan pour zisteman fer sir ki tou keksoz i ok.

Ant 5 er edmi apre midi ziska 8 er edmi diswar lo en zour Dimans, mon ti pe travay. I enportan ki ler en Onorab, i met en keksoz devan i *substantiate* sa *claim*. Akoz okenn dimoun ki santi zot in ganny menase, ki santi zot drwa in ganny afeblir, i annan

rekour legal ki zot, zot kapab pran, ki zot kapab met an pratik si zot santi sa in arrive. I enportan ki Onorab Pillay, i pa fer bann lakizasyon san okenn rezon valab. Mersi Mr Speaker.

MR DEPUTY SPEAKER

Mersi Onorab. Wi, sa komanter ti ganny fer yer, ou pa ti la.

E i ti annan, ou annan ou drwa pour ou lev sa pwen e klarifye lakizasyon ki ti ganny fer kont ou, mon krwar ou'n fer le pwen.

E mon war Onorab Pillay pe lev son lanmen - non, mon pa pour donn ou laparol parsiki...

(*Interruption*)

MR DEPUTY SPEAKER

... non, non...

(*Interruption*)

MR DEPUTY SPEAKER

I will not give you the mic - Lonorab, in dir si ou ti kapab substantiate ou fer sa an ekrir donn sa Speaker.

Mwan pour mwan, ou'n dir en keksoz, li in klarifye - *end of the matter*. Mersi nou pour adjourn ziska 2 er.

E avan nou ale nou annan ABC 1 er kar e nou annan *Bills Committee* avek *Central Bank*

pou bann Manm ki le vin asiste. Mersi.

(BREAK)

(*Mr Speaker in the Chair*)

MR SPEAKER

Bonn apre midi tou dimoun, tou Manm, zofisyen. Nou pe termin deba lo Mosyon ki ti devan Lasanble bomaten. E nou annan 3 Manm ki reste pou koze. Nou a pran sa 3 Manm apre *summing up*. Premye Onorab Norbert Loizeau, ou annan laparol.

HON NORBERT LOIZEAU

Mersi Mr Speaker. Byenveni dan *House* pou apre midi. Bonzour tou Manm, e tou dimoun a lekout spesyalman bann zenn ki enport ou afilyasyon politik, ou vizyon e ou lanbisyon.

Mr Speaker, ler mon'n lir Mosyon anmennen par Onorab Kelly Samynadin, dan Mosyon mon pa'n war okenn bout ladan ki'n ekrir sa bann mo parey 'laenn', 'rankin' e 'lanmertim.' Dan Mosyon Onorab Samynadin, mon'n plito war bann keksoz ki anmenn pozitivite ki pe demande pou anmenn plis prodktivite pou nou zenn.

Mr Speaker, Onorab Samynadin atraver son lentervansyon, in promot pozitivite dan tou form, dan tou son splander parey nou kapab dir. In osi fer resorti ki tou i bezwen komans dan lekol e osi kot lakour. Ler i ti a pe dir sa Mr Speaker, sa in fer mwan mazin en reportaz yer swar lo *SBC* dan Nouvel *SBC*.

Mr Speaker, kot lekol Bel Eau vi ki Onorab Samynadin in koz lo pozitivite, lekol Bel Eau yer ti lans, ti lans en keksoz pozitiv. Zot in lans en konpanny kont *bullying* Mr Speaker. Se sa ki nou anvi war dan nou bann lekol.

Sa ki enteresan Mr Speaker, ler mon'n ekout sa nouvel se ki Lekol Bel Eau i en lekol primer. Se a sa laz Mr Speaker, ki nou bezwen enkilke tou bann valer bann bon valer dan nou bann zanfan ler zot dan sa laz.

Me Mr Speaker, pandan ki lekol pe lans sa bann keksoz pozitiv, eski nou les lekol fer tou li menm, Nou koman bann paran? Mr Speaker, mon krwar non. Nou koman paran nou bezwen osi pran nou responsabilite anver nou bann zanfan.

Nou pa kapab les lekol oubyen Gouvernman, fer tou keksoz pou nou. E nou koman

paran nou pa pran nou responsabilite. Paran Mr Speaker, dan lavi en zanfan, i annan en gran rol pou zwe. Mr Speaker, akoz ozordi si nou realize tou bann vilen manni ki sa zanfan i anmenn kot lekol, Mr Speaker, i sorti dan lakour.

Alors Mr Speaker, lontan nou ti ganny dir sa nou, ki lapolites i bezwen komans dan lakour. Mr Speaker, Mosyon pe osi koz lo en lavi sen pou nou bann zenn, pou nou bann zanfan. Pou en zenn Mr Speaker, viv en lavi sen, fodre ki son lanvironnman ek son kominote i sen.

Eski dan en kominote kot tou bann keksoz imoral pe pase, eski pou ed sa zanfan oubyen sa zenn adolesan viv en lavi sen? Mr Speaker, larepons i non.

Nou bann zanfan ozordi Mr Speaker, pe ganny trennen dan tou form negativite. Drog i enn bann negativite ki pe detri nou bann zenn, plis ki 8 mil ou menm 10 mil nou'n perdi avek drog Mr Speaker. nou bann zenn in perdi avek drog.

E ozordi Mr Speaker, nou pe koze nou pe dir nou *workforce* nou napa *workforce*, etranze pe rantre akoz nou bann zenn in perdi dan drog. Me en keksoz pozitiv Mr Speaker, ki pe ganny arive

ozordi Mr Speaker, se sa larger asarnen ki nou Gouvernman pe anmennen pou detri sa move fleo ki pe detri nou zenn.

Nou pe demann tou kominote alors Mr Speaker, pou zwenn nou dan sa lalit, pou nou sov nou lazenes pou ki Sesel i a reganny son dinyite.

Mr Speaker, nou bezwen en kominote pou fer grandi en zanfan parey mon'n tann bokou nou in dir. Par kont Mr Speaker, i annan bokou pozitivite la deor ozordi. Santer i sante.

Mr Speaker, ozordi parmi bann keksoz pozitivite ki pe arive ozordi dan Sesel zenn pe fer lanmizik. Si nou ekout *chart* dan Dimans Mr Speaker, mazorite sa bann zenn ki pe krake avek bann novo *track*. Sa Mr Speaker, se bann keksoz pozitiv ki pe arive dan Sesel.

Ozordi Mr Speaker, mazorite etidyan pe lager pou zot kapab ganny en *scholarship*. Me ler mon pe koz lo la Mr Speaker, i fer mwan mazin en zenn en zenn garson Chamad ki reste Roch Lane dan mon distrik, malgre ki i reste dan en komite ki lavi pa sitan an roz ki annan bokou bann keksoz negativ ki arive, in reste *focus* Mr Speaker lo sa ki i anvi. E byento i pe al son *scholarship* Mr Speaker.

Mr Speaker, mon anvi felisit Chamad, malgre mon pa konn son afilyasyon politik, me i en zenn ki aspir bann lezot zenn dan mon distrik, akoz li Chamad in reste pozitiv lo keksoz ki li i anvi. E in kapab achieve sa ki li i anvi.

Mr Speaker, ozordi parey mon'n dir pli boner, pozitivite i annan partou. I annan bann groupman Mr Speaker ki pe menm pran linisyativ lo zot menm pou organiz bann keksoz pozitiv, pou zenn lo tou nivo. E Sanmdi letan nou sorti blitz Glacis, mon ti war *Mason's Travel* mon ti war serten dan triko *Mason's Travel* pe fer en travay volontarya lo lans North East Point Mr Speaker. E sa se bann keksoz pozitiv ki pe annan dan pei. E nou anvi felisit sa bann lorganizasyon pou kontinyen Mr Speaker.

Akoz se pa zis Gouvernman ouswa lezot Departman Gouvernman ki bezwen fer sa bann keksoz. Nou koman sitwayen Seselwa, nou bezwen partisip dan lavi nou pei avek bann keksoz pozitiv ki nou anmennen.

Parey Onorab Samynadin in dir SNYC pe fer bokou bann programm pozitiv pou bann zenn. Mr Speaker, eski zis SNYC ki pou fer sa? Mr Speaker, la mwan ler mon pe

koz lo SNYC, mon pe mazinen, eski nou koman paran, eski pa nou kapab nou osi fer serten keksoz pou nou bann zenn?

Mr Speaker, aktyelman la ozordi nou annan en zenn fiy Aurelie Antoine 8 an son papa in envestir dan li. Ozordi Aurelie i *Dubai*, pe partisip dan en *NBA Camp*. I anvi vin en zwer *NBA* sa zenn fiy - 8an. Mr Speaker, ou konnen ki'n arive koman en zenn Seselwa? Aurelie in sorti premye parmi tou sa bann partisipan *Dubai* ki dan sa *camp* !

(APPLAUSE)

HON NORBERT LOIZEAU

Pozitivite Mr Speaker. En Seselwa 8 an! E pa blyie mon'n koz ek son papa apre midi Mr Christian Antoine, i dir mwan Aurelie ler in al laba, in partisip parmi akoz son laz ti ba 8 an li in partisip parmi bann marmay 14 an, 15 an e in sorti pli devan sa bann marmay.

E la Mr Speaker, avek sa mon anvi enplor avek bann Lotorite *Sport*, NSC, Minis *Sport*, akonpanny Aurelie in fer en pa lo li menm ek son papa e *coach Leaden* ki son *coach* personnel ki'n swiv li Mr Speaker.

Annou akonpanny Aurelie ler i vini sorti *Dubai*, pou nou fer

son rev vin vre. Nou Prezidan toulstan i dir "se lesyel ki ou limit". Annou akonpanny Aurelie ler i vini, pa les li laba li tousel donn li en sans pou li akonplir son rev. Alors, mon anvi dir ek Mr Antoine felisitasyon pou sa zes ki ou'n fer.

E la letan mon koz lo Mr Antoine Mr Speaker, boner mon'n tann en serten Onorab ki dir bann paran pa ganny letan ler zot sorti travay pou koz ek zot zanfan.

Me Mr Antoine i annan en biznes ; Mr Antoine in war letan pou li anmenn son zanfan. Akoz nou lezot nou napa letan pou anmenn nou zanfan dan bann keksoz pozitivite? Me selman *Boardwalk* nou ale? Lo lans piknik nou ale nou annan letan? Pou donn en pti letan nou zanfan nou napa?

Mr Speaker, annou pran legzanp avek Mr Antoine. Mon anvi felisit ou Mr Antoine pou sa. Mr Speaker, i annan bokou keksoz pe ganny fer, ki pa pe zis depan lo Gouvernman fer. Ozordi Minis Touris an partenarya avek bann dimoun dan *Tourism* Mr Speaker. I annan en Programm *Hospitality* ki zot pe fer dan lekol.

Me lekol Bel Eau ti ganny en sans Mr Speaker. Atraver Mr Gregory Albert i ti adopte Lekol

Bel Eau, i ti pran bann zanfan i ti anmenn zot lo zil laba, pou vvar mannyer bann letablisman i fonksyonnen, pou ankouraz ban zenn Mr Speaker, pou antre dan sa domenn touristik. Pou nou kapab pran plas bann etranze ki nou dir pe travay dan touris pou ankouraz sa bann zenn kot Lekol Bel Eau.

E mon anvi dir mersi Mr Albert, e mon panse ki sa lannen i ava annan ankor en lot sa programm ki a ganny fer pou bann marmay Lekol Bel Eau kapab ganny en sans pou zot aprofondi zot lekor.

Mr Speaker, nou pe koz pozitivite? Mr Speaker, i annan bokou pozitivite ki pe arive dan Sesel ozordi. Vi ki Mosyon i lo pozitivite, mon anvi kontinyen avek pozitivite.

Mr Speaker, 2 *weekend* pase, 2 *weekend* pase ti annan en *School Regatta* Mr Speaker. En sikse enorm, kot bann lekol ti partisipe e menm Prezidan ti al montre son lapresyasyon, menm si serten ti kraz li pe dir i pe fer politik Mr Speaker. Akoz i annan lanmour pou sa bann zanfan, e i apresye letan keksoz pozitiv i ganny fer dan Sesel.

E la Mr Speaker, dapre konpran, dapre tande sa levensnman pou ganny anmennen lo Zil Pros, kot bann zanfan Praslin/La Digue a

ganny sans partisip dan sa *School Regatta* Mr Speaker. Pozitivite Mr Speaker ki nou oule war, e ki Minister Ledikasyon pe angaz li ladan.

Mr Speaker letan nou pe koz lo pozitivite, Mr Speaker Group Scout in al Sid Kore en group zot dan en *camp* pozitivite kot bann zanfan in ganny sans zwenn avek bann lezot zanfan dan bann lezot pei atraver *Scout* ki zot kapab fer bann lesanz Mr Speaker.

Pozitivite ; e byento Mr Speaker, zot pe al Moris le 8 sa mwan or le 9 zot pe al Moris. E mon anvi dir ek Anne-Marie en madanm dan mon distrik Anne-Marie Dufrene mon'n war son *text*, mon pou zwenn li pou nou koze dapre son *text* ki in anvoy mwan.

Mr Speaker, pa zis sa pozitivite nou pe koze. Bann *Eco School* dan bann lekol i annan bann group *Eco School*, Onorab Pillay i konnen son fiy ansanm ek mon garson i dan Group *Eco Warriors* - zot zanmi Mr Speaker malgre nou annan diferans politik, me mon garson ek son fiy i 2 zanmi. Onorab Pillay i a konfirm sa avek mwan.

Mr Speaker, zot in al Aldabra. Mon garson in ganny sans al Aldabra. Ki zot in al fer Aldabra Mr Speaker? Pou zot al aprann nou lanvironnman,

mannyer i frazil, mannyer pou protez li. Onorab Georges ti laba letan zot ti... li i ti pe desann e bann marmay ti vini. Mr Speaker, tousala se bann keksoz pozitivite ki nou pe anmennen dan nou zanfan.

E ozordi mon garson letan in desann sorti Aldabra, in vin koz ek mwan zis lo lavyann torti - papa i dir pa manze. Pa manz marswen, Mr Speaker, ozordi si mwan en dimoun i anmenn en bout lavyann torti en bout marswen mon pou dir li mon pa oule Mr Speaker! Mon pa pou kapab kwi!

Akoz menm kot mwan la ozordi, mon kapab pe kwi en pti bout pwason sale i vini i vin gete i dir mwan "Papa kwa sa?" Mon dir li pwason sale.

Mr Speaker, ou trouve, nou bann zenn se bann keksoz pozitiv ki zot pe anmennen. E pa blyie Mr Speaker, ler nou pe koz lo SNYC Mr Speaker, be SNYC, lannen pase SNYC ti fer en konferans ki anglob tou bann zenn Losean Endyen. Pozitivite Mr Speaker, kot sa bann zenn Losean Endyen ti ganny sans partisip ansanm, koz ansanm, fer bann lesanz ansanm. Ti pran en semenn e mwan mon garson ti ladan.

I annan pou demande akoz ki mon garson i ladan Mr Speaker? Mr Speaker, akoz

mwan mon akonpanny mon bann marmay dan sa bann zafer. Nou pa reste se nou, kit marmay koumsa. Nou akonpanny zot, nou rod lenformasyon, nou swiv zot. Se sa ki ou trouve parey Onorab Pillay i fer i swiv son zanfan li osi ansanm ek mon garson. Demann li i a dir ou, alors nou konnen sa bann keksoz ki pe arive Mr Speaker.

Mr Speaker, nou pe koz pozitivite. Aktyelman i annan en group bann zenn foutboler seleksyon anba 17 an Mr Speaker, ki pe al Monaco mon krwar *en France*. En group zot Mr Speaker pozitivite, sa bann marmay ki ep al fer? En lesanz, pou zot mezir zot talan laba e possibleman enn i kapab reste dan en klib laba dan lakademi, pou li kontiny son karyer dan foutbol Mr Speaker.

Mr Speaker, tousala se pozitivite. Mr Speaker, pozitivite i partou mon dir. Lamars obesite inisyé par Prezidan avek Minister Lasante ; Onorab Naidu i rapel nou ti parmi ansanm avek nou ser defen Onorab Rosie Mr Speaker, nou ti partisipe. E byento mon krwar an Oktob zot pou fer ankor, kot nou pou desann nou pou partisipe. Nou anvi dir tou bann Manm Lasamble desann

vin partisipe, akoz obesite i en problem dan nou pei.

Mr Speaker, e pandan sa letan ler nou pe fer sa legzersis lo Laplenn *Freedom Square*, tou bann gym ti plen. Bann zenn fiy ki pe *shape* zot *body*, bann garson Mr Speaker, ozordi pa kapab gete pozitivite partou. Tou dimoun pe mazin en lavi sen ozordi.

Mr Speaker, ozordi mon tann i annan serten Onorab Mr Speaker ki'n dir lo nivo distrik napa naryen ki fer lo nivo distrik.

Mr Speaker, ti annan en *Unity Relay* zot rapel? Bel Air ti sorti dernyen. Nou ti sorti dernyen Mr Speaker, akoz nou, nou ti pran bann zenn 12 an, 13 an pou vin fer sa lakours. E sa bann zenn ti *compete* avek bann gran, gran nwar, gran, gran madanm sanmenm sa nou'n sorti dernyen.

Me selman Mr Speaker, en keksoz pozitiv ki nou'n tire ladan nou koman distrik. Pozitivite parmi nou bann zenn, zot pa'n les tonbe zot in taye ziska fernwar pou zot fini. Mr Speaker, tousala se pozitivite ki pe arive dan nou distrik.

Ozordi Mr Speaker, ler nou pe koz pozitivite tou nou bann lenfrastriktir sportif pe ganny refer, pe ganny re aranze pou nou met li lo en nivo

internasyonal pou ki nou bann zenn, nou bann atlet zot, zot a partisipe. Zour zot fer en bon letan, zot letan i a kapab ganny aksepte internasyonalman Mr Speaker.

Tousala se pozitivite Mr Speaker ki nou, ki mwan mon war pe arive dan Sesel ozordi.

Mon pa dir ti arive avan, me nou, nou pe kontinyen pouse pou sa kontinyen arive.

Mr Speaker, la mon anvi felisit tou bann *coach*, tou bann ankadre ki'n dedye tou zot letan pou ankadre sa bann dimoun. *Scout*, bann *coach* foutbol, *basketball* zot tou e pa blyie Mr Speaker, nou annan *coach* Onorab Arissol ki osi pe fer en travay formidab dan Anse Boileau.

Ozordi *coach* Arissol, avek sa lespri pozitiv ki i annan, i pe *coach* son lekip. I pe anmas bann zenn Anse Boileau pou tir zot dan bann move lenfliyans e anmenn zot dan pozitivite. Mon anvi dir ek *coach* Arissol, kontinyen dan sa direksyon mon frer. Dimoun Anse Boileau i deryer ou. E nou koman bann Manm Lasanble nou pou siport ou, akoz ou annan en pasyon pou sa keksoz.

Mr Speaker, mon anvi – an terminan mon anvi dir Onorab Kelly Samynadin mersi pou vin avek sa Mosyon. Malgre ki

Mosyon in derout en pti gin, in al an deor, me mwan Mr Speaker, mon'n fer sir ki mon reste pozitiv lo sa Mosyon.

Akoz Onorab Samynadin i konnen i annan keksoz pozitiv pe arive. Me ki i pe demande li pou annan plis Mr Speaker. Alor, mon dir ek tou bann zenn pran loportinite, partisip dan tou sa ki annan, rod lenformasyon si zot pa konn naryen ki SNYC pe fer rod lenformasyon parey mwan mon fer.

Bann paran pa reste kot lakour, esper keksoz vin kot zot. Vini, vin rod sa lenformasyon parey mwan mon fer, pou zot kapab akonpanny zot zanfan pou ki nou a kre en Sesel meyer pou ki ler mwan mon'n kit sa monn bann ki a pe vini a zwenn en Sesel ki pli meyer ki meyer.

Mr Speaker, parey nou kontan dir mon anvi dir ek bann zenn pouse. Parey Prezidan i kontan dir, se lesyel ki ou limit. E personn, e si ou reste pozitiv, personn pa pou kapab anpes ou akonpli ou rev parey Chamad dan mon distrik en zenn prometan in akonplir son rev e byento i pe fer son *Viza Moris* pou li al etidyé *La France*.

Mr Speaker, mon anvi remersi ou pou sa pti letan. E mon anvi dir Onorab

Samynadin mon pou siport ou Mosyon, akoz mwan kot i konsern pozitivite mon en dimoun ki pou siporte. E mon pou la akote ou, e a kote mon Gouvernman. Mersi Mr Speaker.

MR SPEAKER

Mersi Onorab. Laparol i pou Onorab Johan Loze.

HON JOHAN LOZE

Mersi Mr Speaker. Mr Speaker, an parti nou louvraz koman politisyen, nou bezwen penn en portre, kree en vizyon e enspir nou pep la deor pou ganny en direksyon.

Be, si dan sa travay kree en vizyon, enspir ou pep, nou tou nou bezwen vini fer en *speech*, nonm sa mo pozitiv 200 fwa e sa mo pozitivite 500 fwa, sa pep menm ki nou pe sey enspire, zot pe realize, zot pou realize ki i annan en keksoz forse la pe passe.

Si nou pou vini nou pou inyor problem, nou pou met en linet roz e nou pou koz lo en pozitivite - pou servi parol VP Afif, "imaziner" sa pep pou konpran poudir nou ki annan en problem. E nou ki'n dekonekte avek zot.

Mr Speaker, Sesel, letan ti ganny fonde ti fond konman en sosyete baze lo lesklavaz. Sa in

vin avek tou sa ki'n vin avek e in swiv par diferan keksoz.

A labolisyon lesklavaz, i annan en keksoz ki ti antre, sa sete travay pou kredi ou a ganny peye avek en boutey kalou. Kalou ki ou menm ou, ou ti tire.

E mon pa le personn lo lot kote santi zot ofanse par mon bann parol ki mon pe dir la, akoz sa pa konsern zot. Zot pa'n kree lesklavaz. Zot pa'n kree sistenm neokolonyal. Napa naryen pou fer ek zot. Be i la realite nou pei e nou pep.

Konman en nasyon nou bezwen konnen kot nou'n sorti pour nou kapab konpran akoz nou kot nou ete. Ki swa bann popilasyon, bann pep natif Ameriken avek zot *firewater*, ki swa bann Aborizin Ostrali avek zot *rampant alcoholism*. Ki swa en pei parey Irlan ki'n anba dominasyon brital lanpir Britanik pandan plizyer santenn lannen. Ki'n devlop zot en kiltir travay dir. Leve granmaten al travay. Fini 5 er apre midi al dan *pub*. Reste ziske 11 er diswar ler *pub* i fermen.

Ou pou vvar ou en komenalite ant tou pep ki'n ganny *subjugated ouswa* ki'n dan lesklavaz. *Alcohol dependency.* *Dependency* lo sibstans.

Dependency on one form or another.

Sa *generational trauma* ki en *learned behaviour* ki pase i avek nou de zenerasyon an zenerasyon, ki vin en nespes *generational curse* lo nou koman en pep, ki nou bezwen leve konman en nasyon, konman en sivilizasyon pran konsyans ki nou annan en problemm e sey kas sa *curse* ki lo nou.

E, nou annan en problemm. Nou annan en problemm mazer dan sa pei.

Resaman nou menm annan enn nou bann psikyat ki'n admet lo televizyon poudir Sesel nou annan *major mental health issues*. E sa i pa politik sa. Sa i realite.

So, nou annan sa problemm zenerasyonnel ki nou'n erite. Nou annan sa konportman ki dan nou. E ki bokou nou i difisil sirmonte. I difisil pour nou arete. I difisil pran sa sopin met laba e donn en lape.

E i domaz pou dir ki bokou nou, nou *graduate*. Nou al lo bann sibstans pli for. Nou kontinyen rod sa *high* ki pli *high*. Sa *thrill* ki pli *thrilling*. Nou *graduate*.

E dan sa loptik mon konpran bann dimoun ki pe pouz pou annan en form

marijuana legal. I pa pou adres sa problem konsonmasyon sibstans. *At least* i ava adres en sours toksikomann ki prop.

Kot sa ki pe servi sa zerb li i pa pou prizonnyen en dimoun ki pe vann sa ilegalman, ki pe melanz li avek bann keksoz pli adiktiv. E mon krwar i irzan la kot nou'n arive pour nou get sa.

Akoz mon tann dir yer poudir nou'n elimin eroin. Be, *fentanyl* in antre. E *fentanyl* i kree zonbiz. *Fentanyl* i touy dimoun. *Fentanyl* i fer ou vin en nespes *braindead*. Be, nou pou plere. Koman en pep nou pou plere si nou pa adres sa.

So, nou pou bezwen annan nou en panse kot nou get nou lekor dan laglas koman en pep, nou realize ki nou ete, aksepte nou defo kot i ete e pran bann lepa pou sey remedye nou problem kot i ete.

Mon konpran mwan ler bann dimoun pe koz lo pozitivite. Be zis nonm pozitivite pa adres problem. Nou pa kapab zis pran problem met dan papye klate e dir i zoli, i pozitiv.

Akoz la mannyer nou pe ale la i parey en cours lanez lo labou. I zoli, i klate, i blan. Be sa labou ki anba la i labou menm li. Nou pa pe adres li.

So, nou annan nou en problem labi sibstans. Be i annan en lot size ki nou bezwen gete la. Letan nou ti revwar Lalwa *Coast Guard*, sa Lalwa la ki ler nou ti amande. Onorab Andre ti sey amenn en lamannman ladan e *LDS* pa ti siport li pour son lamannman.

Be sa Lalwa ler nou ti amande ti donn pouvwar *Coast Guard* ki ler i atrap bann dimoun ki pe fer gran banditz *on the high seas* pou atrap sa ki abor, apre koul sa bato avek tou sa ki ladan.

Sa i en deba ki nou pou bezwen anmennen isi nasyonalman e tonm dakor lo la, ki nou aret anmenn kosonnyen isi ater. Nou aret pran pake sentonm lo kannal pou anmenn se nou. Fodre nou arete fer sa. Nou bezwen arete.

Si nou fer en pti resers, nou al get sa *Task Force 149* ki pe *operate* dan *Gulf of Aden*, i annan en bato Ostralyen *HMAS Warramunga* li tousel i responsab pour sepaman konbyen tonn drog ki'n ganny atrape. Zanmen i anmenn ni en granm ater Lostrali. Ni en granm.

Ni en pti *powder dust* sa drog pa antre se li koman levidans. Pa antre se li pou al dan en *warehouse* la pour naryen. Bril kannot, koul li

avek tou sa ki abor. E nou bezwen devlop nou en sistenm kot nou tou nou agree lo la koman en pep. Aret anmenn kosonnyen dimoun isi ater silvouple!

Nou ganny 5 minit laglwar, mont lo televizyon. Pwenti, get dan lakal bato dir “we, we, we we”. Apre ou tande in ariv lo gento Corgat Estate pe vann. Kit laba.

Nou koze, nou diskite, nou agree met an aplikasyon sa ki nou ti'n met dan lamannman Lalwa Coast Guard. Si fodre fer *referendum* koman en nasyon, annou vot lo la. Si fodre fer en sel met dan *referendum* lannen prosen letan nou al dan eleksyon zeneral. Mete.

Ki nou arete sa pratik. Annou aret anmenn pwazon se nou. Be, nou annan en problemm. Wi, mon agree siort pozitivite, be nou annan en problemm.

Mr Speaker, labandon zanfan. Minis la anndan ki'n dir nou. Statistik pe montre ki in ogmante. Bomaten mon vini, dan transpor lo radyo mon tann pe kriy lasasen en lot problemm. Lansentman anba laz.

Sa pei pe viz ver en kriz sosyal. E koman bann politisyen responsab, koman bann dirizan responsab, nou pa kapab vir nou ledo lo larealite.

Nou pa kapab vir nou ledo letan nou fas avek la sityasyon e asize nonm pozitiv 200 fwa e pozitivite 500 fwa. Zis akoz swa nou'n ganny en direktiv pour nou fer li koumsa. Oubyen nou santi en bezwen politik *or* nou santi nou dan problemm. Nou annan en responsabilite pour nou fer fas avek larealite.

E sa sityasyon labandon zanfan, sa sityasyon lansentman anba laz. Letan nou vin avek bann panse ki dir lasistans sosyal i en labi, nou pou met lord ladan, e ou koup tou! Ou koup tou ou kit zis 115!

Prezan, pandan 3 an zis nou koz lo bann; parese. Pa le travay. Pe abize. Leve al travay. Deza pe travay li. I ti pe ganny en lasistans ekstra akoz son saler pa ti permet li fer 2 bout zwenn.

Prezan i ganny maltrete par bann dimoun ki sipoze pe reprezentant li. I pa sipoze pe maltret li. I sipoze pe reprezentant li. Nou maltret li. I al travay de mare prezan. De mare i pe travay i li tousel kot lakaz.

Prezan nou, nou pe *be cost effective* dapre nou. Nou prefere rann R30 milyon ki ti'n donn ASP. Rann dan Bidze pour nou pa servi pangar nou pe soutir dimoun. Nou pe isi. Nou pe laba. Fer *savings* lo ledo malere.

Akoz dapre nou, nou pe fer *savings* nou.

Prezan sa paran ki li i pe travay de mare ki li i pa kapab okip son zanfan, son zanfan i tonm dan labandon e i tonm anba lenfliyans sa ki li i napa okenn ni moralite, ni spirityalite. I pa konn ni byen ek mal. Sepa si i konn drwat ek gos.

La...a...a...a aprezan i vini la. La i vin ou lansentman la. La i vin ou maladi transmisib la. La pou vin tou sa ki pou vin avek. Selman nou ti pe fer *savings* nou.

Sa *savings* ki nou fer la, pou kout nou depi sa *teenage pregnancy* pour larestan lavi sa zanfan. Akoz sa paran, sa zanfan ki'n fer sa zanfan i pa pare pou fer en zanfan. E sa zanfan ki'n ganny fer li, *probably will be more of the same*.

La nou pou rekolte la prezan la. La nou pou rekolte depi en lot toksikomann, ki pou al tonm mon prezimen lo *fentanyl* la prezan, akoz zot dir nou zot in rezourd eroin. Selman nou konnen poudir *fentanyl* i annan.

La nou pou al evantelman rekolte li dan prizon kot i pou kout nou pli ser. I pou kout nou pli ser ki sa lasistans sosyal ki sa paran ti

pe gannyen. I pou kout nou pli ser.

Nou pe kree en boubou, en kanser par akoz zis nou'n anvi asize maltret dimoun apel zot parese. E nou, nou annan nou en sistem ekonomik liberal. Nou pli konnen. Dimoun pe abize. Tir zot. I reste zis 115. Zot ti tir tou, ti kit 115. Be sa move dimoun ki fer sa.

Mr Speaker, mon konnen mon pou ganny dir ki mon'n gat Mosyon. Be, mwan letan i annan realite pou ganny adrese, mon pa kapab zis asize repet pozitivite, pozitivite, pozitivite konmsi mon en nespes *brainless toad*.

Mr Speaker, ou war ou en sityasyon dan sa pei kot 2021, sa pep i ti ganny abandonnen. Sirtou bann ki ti annan mwens. Sirtou bann ki ti pli feb. Adilt koman zanfan. Fanmir Seselwa ki ti pli dan bezwen ti ganny abandonnen. Mon pa konnen si *by design or default*, selman ti arive. Zot in fer.

Mwan en zour Onorab Georges ti koz mwan en lardon la anndan ti dir "depi ou la anndan, ni en kestyon ou pa zanmen anmennen!". Be foutkwa mon pou anmenn kestyon?

Zour mon ti anmennen, mon ti demann en kestyon. Premye kestyon mon ti

demande lo swisid, Minis ti dir mwan napa problem. Napa problem.

Prezan mwan mon a demann zot kestyon? Mwan mon a demann zot kestyon? Mwan ganny sa kalite repons. Be mon pa bezwen sa stres mwan. Be, swisid? Mental health issues nou pep?

Mr Speaker, zot a *google*, zot a fer zot prop resers. I annan en relasyon etrwat ant *gut biome* en imen. Sa ta bakteri, *fungus* ki dan ou vant la avek ou *mental health*. Prodiksyon *serotonin* dan ou lespri ki *basically* ou *happy juice*, ou *happy hormone*, i ganny regulated par ou *gut microbiota*. Sa lasyans ki dir.

E zot konnen ki arive ek ou *gut microbiome*, sirtou dan zanfan, si ou *drop* li dan en sitasyon malnitrisyon *overnight* – en zanfan ki ti abitye byen manze, ou ale ou *drop* li dan en sitasyon malnitrisyon? Ou afekte son *mental health* zis akoz ou *disrupt* son *gut microbiome*.

Mon konnen Loze ki pe dir zot, zot pa pou le krwar. Be al fer zot resers, rode. E zot a konpran – zot a konpran! Zot a konmans konpran ki ti arive Sesel 2021 e akoz zot, zot direkteman responsab pour sa

ki'n arive avek en kantite dimoun dan nou pei.

Zot in anmenn en bann Polisi ki'n agrav en sitasyon egzistan. Ki la ozordi nou annan en psikyatri, en psikolog. Mon krwar. Mon pa asire lekel si en *clinical psychometrician* ouswa si i en *psychologist*. I mont lo televizyon ki dir ou, Sesel nou annan nou en gro problem *mental health*.

Nou annan nou en gro problem lasante mantal. E fas avek sa, mwan mon pa pou asize pou nonm pozitiv 200 fwa e pozitivite 500 fwa, konmsi a repetisyon. Mon pou fer li vre.

Mr Speaker, kantite keksoz i ganny dir la anndan. Zot dir pou dir sa Program Renesans Moral ti konmans an 2011. Ti aktyelman konmans 2004. Ti en komite volonter li, anba gidans PS Marie-Antoinette Alexis. E ziske ozordi i annan en keksoz ki'n sorti dan sa komite ki ankor anfors. En programm ki ankor anfors ozordi.

Sete zot ki ti rekonnent nesesite pour *better parenting*. Tou sa bann Program *Parenting* ki anfors Sesel ozordi i en prodwi, i en fri direk sa Komite Renesans Moral.

Be, lekel ki ti maltret plis sa Program Renesans Moral? Lekel ki ti konplent plis? Mon a

donn zot en *guess*? Zot Prezidan. Sa ki Prezidan ozordi. Sete li ki ti konplent sa plis.

ENN bann fri renesans moral, SNYC ti vin ek son Programm Valer. Mon a donn zot en *guess*. Lekel ki ti pran "valer pour ou, valer pour nou tou" fer vin "maler"? Lekel ki ti apel sa "maler pour ou, maler pour nou tou"? Mwan ouswa zot?

SNP ki ti pran sa Programm SNYC valer zot ti apel li maler. Zot ti batiz li "maler pour ou, maler pour nou". Be ozordi pozitivite i pou ne ozordi li? Avek zot listwar maler, maltret renesans.

Tou loportinite asize la anndan, ki, ki, ki. Nou pti trezor. Ki, ki, ki. Pti trezor. 2004 ti lannen ki ti deklar "nou zanfan, nou trezor, nou fitir". Ti menm lannen ki Programm Renesans ti ne.

Be, zot ti koz byen lo sa bann keksoz zot? Zot ti pozitiv? Mon pe koz zot depi 2004 la. Zot pe gwaye. Zot pe ki, ki, ki, ki, ki, ki, ki, ki. La zot reveye dan zot *somnambule*. Zot deside vin nonm nou pozitiv 200 fwa. Pozitivite 500 fwa konmsi en konsep zot fek evante. Ler problem in anta avek nou?

Apre zot in abandonn sa pep, cours sa pep pli vilnerab depi lannen 2021 an antye. E

problem in antan, in kante ek nou. La ozordi zot reveye zot vin rod nou pozitivite. Par lo la pou sey konvenk nou, zot pou nonm li 500 fwa. Konmsi nou, nou bet nou.

Be ler zot in sorti dan maler, zot in al dan pil lo li. Zot in enzekte pile, pil lo li dan lanmwel sa pep. Ziske zot menm zot in ganny en degou la. Si i zwe sa sanson ek zot, manke zot pou rann. Zot pa le tande. Zot pa le tande.

Mon pa kapab dir zot, zot pa pou zwe sa sanson dan zot rali. Zot pa ni kapab fer rali osi la. Ni rali zot pa kapab fer. So, kot zot pou zwe sa sanson? Kote zot pou zwe pil lo li?

(Interruption)

HON JOHAN LOZE

Rezulta zot pile se ki sa pep in vir son ledo avek zot. Ozordi Freminot Corgat Estate i annan plis sans ganny elekte ki zot Prezidan. Sa mon garanti zot. Pa ti anvi vin la li.

Mr Speaker, mwan mon napa okenn *issues* avek Onorab Samynadin e son Mosyon. E Onorab Samynadin lo li menm koman en imen i pa devret pe anmenn sa *burden* istorik sa bann keksoz ki mon'n dir son parti in anmennen. Akoz li osi i en zenn, i pe seye fer son bout.

Selman! Selman Mr Speaker, dan kiryozite taler mon'n al dan mon WhatsApp - en dimoun i anvoy mon en zafer ki dan *Wavel 2025*. Mon pa konnen si zot konn sa group Mr Speaker. Mon pa frekante.

I annan en pos ladan. E mon site i dir "ou pa kapab vin anmenn Mosyon pour zenn epanouir. Selman ou, ou pa fer naryen pour zenn dan ou distrik". Mon pa konnen mon Mr Speaker. Sa zot antre zot dan zot group *Wavel 2025* ki pe dir.

Be selman Mr Speaker, Onorab Samynadin i en zenn. Mwan mon prezimen son leker i dan bon landrwa fas avek sa Mosyon ki in anmennen. Be *lineup* ou parti an antye depi bomaten, pa'n adres realite Sesel. Zot pa'n tous lo naryen ki pe tous sa pep ki apel Seselwa.

Mwan mon pa pou kapab *be party to* en tel kalite legzersis kot nou pe zis sey anbet sa pep. Mon pa pou *join* dan sa bann kalite zafer koumsa mwan. Mon pa pou kapab asize aksepte ki ozordi la kot nou'n arive, nou bezwen koz zis en fason dan sa Lasanble e pa kapab balans nou deba.

Mwan mon pou aksepte ki Onorab Samynadin i en zenn. Mon pou aksepte ki i en inosan dan lamazorite sa bann zafer,

tou sa bann zafer ki mon'n dir *basically*. Mon pou aksepte ki son leker i dan bon landrwa. Ki son lentansyon mon prezimen i bon. Be mon pa pou *party to* anbet Lepep Seselwa. Mersi Mr Speaker.

MR SPEAKER

Mersi Onorab. Laparol i prezan pour Onorab Waven William.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker, Mosyon i lir konm swivan;

"Avek bi pour kontinyelman ankouraz nou bann zenn pou viv en lavi ki sen, e pour promot lespri pozitivite dan nou pei, Lasanble pe demann avek tou parti prenan, enkli piblik an zeneral, pour partisip plis dan bann aktivite ki ranforsi en devlopman moral e spirityel solid".

Mr Speaker, mon pa kapab konman en reprezantan distrik ek konesans ek leksperyans dan politik pei, pa koz lo sa Mosyon sitan enportan. Sitan enportan Mr Speaker, pou ganny latansyon nou zenn, gid e diriz zot dan pozitivite pou *être bien informé* touzour pare moman larelev i prezant devan zot.

Mr Speaker, en Mosyon ki pe demann tou parti prenan pou organiz plis bann aktivite pour devlopman moral e spirityel nou zenn, pou kontinyelman annan sa lespri pozitivite pou delivre, pa zis serten, me tou sa 17 target devlopman soutenab ki pei in siny sa Konvansyon pour benefis pei, lendivid'i lafanmir e soyete li menm.

Mr Speaker, mon remersi Bondye Tou Pwisan pour son benediksyon, gidans e direksyon ki in met a nou dispozisyon pou annan konprenezon, kapasite pou disernen pran bann desizyon sarz atraver bann aksyon pridan.

Sirtou kot lemonn in rekonnet sa prensip en devlopman soutenab ki size sa Mosyon pe touse, ki i konsern bann zenn ki fitir dirizan e larelev demen e pour le fitir. Si zot pa ganny prepare konmela pour zot progresyon, nou pou dan problem Mr Speaker. Parey nou pe konstate e pa zis Sesel.

Dan plizyer departman i annan mankman e bann mendev kalifye pou ranpli e osi ranplas serten nonm etranze. Mr Speaker, tou le Mardi isi dan sa Lasamble nou tande avek bann Minis bann mankman. E

sa nesesite pou donn nou bann zenn plis formasyon e *training*.

Mr Speaker, pa in ler pour nou tou *hands-on* lo sa sityasyon pou ranvers sa tandans. Etranze pe etidye febles mendev nou pei e pe antre pou pran lavantaz e tir larzan dan pei pou anrisi zot fanmir deor e osi zot pei, Mr Speaker. Sa parey mon dir i pa zis Sesel me osi dan lemonn.

Lentansite domaz lo nou resours imen pa'n vin pandan sa 4 an nouveau Gouvernman. Sa pye dibwa Mr Speaker, lontan ti'n tord. E preznan Gouvernman date le 24 Oktob 2020, in vin ek en motivasyon - en lanvi pou redres e sov nou pei Mr Speaker.

Sa Mosyon pe dil ek en size ki merit sipor inanim dan sa Lasamble. Me non pa divizyon. I en size ki lemonn antye pe konsernen. I pe fer tou pou anmenn sa lespri pozitiv dan devlopman entegral nou bann zenn.

Mr Speaker, Ras Ricky i en santer. Sekreteur Zeneral, ouswa Onorab Aglae dan zot *rally* Anse aux Pins, kot zot aktivis in tir portre avek Ras Ricky. Personn pa'n kestyonn li lo sa sanson Mr Speaker, "pou konn sa vre realite."

Mr Speaker, ek zot azanda parti, zot pe aspire ki Ras Ricky

ki'n sant "pil lo li" ti a mont lo stage Mr Speaker avek zot. Ras Ricky i pa'n *entertain* zot.

Mr Speaker, i domaz ki Lopozisyon antre zot, zot ankor divize lo sa size lenteré nasyonal kont azanda parti.

Onorab Spiro e Onorab Lemiel in sey donn direksyon, me zot pozitivite ki neseser pou siport sa zefor kolektiv tou parti prenan, Lopozisyon zot in abandonn bann zenn parey zot fer ler zot pa vot Bidze Mr Speaker.

Me ou le tou lasirans ganny zwenn. *Boycott* tou keksoz akoz dan zot lespri, se sa ki pou fer piblik kontan zot e pour zot reganny pouvwar.

Sa ki mon a dir piblik la deor ki sak Sesyon Lasanble zot pou vin ek kestyón, envant keksoz e kree bann fo kontak ek bi esey rod relevans. La mon dakor ki vre zot in *politically spent of* pozitivite. Me ranpli ek negativite fristrasyon *Blitz LDS*.

Mr Speaker, an siortan sa Mosyon pour plis lankadremán ek gidans pour nou bann zenn.

Mr Speaker dan lespri sa Mosyon, mon pe rekomande ki Komite Medya, Lazenes e Kiltir zot kontinyen sa konversasyon ek bann diferan parti prenan an

portan pou pous sa azanda pli devan.

Ki sekter prive zot osi vin en pe pli sansib ek sa realite e pran bann mezir dan sa partenarya Gouvernman e prive pou gid nou zenn Mr Speaker. Akoz Gouvernman tousel i pa pou kapab fer li. Me nou bezwen tou sipor parti prenan parey Mosyon pe demande.

Mon konnen ki parey lavil ti deborde pour lafet nou lendepandans, kot nou pa ti pey larzan pou piblik desann, malgre Lopozisyon pe sirkil en papye ki *LDS* pou pey R500 siporter ki desann, i fo Mr Speaker. E dan lespri pozitivite, *NSC Hall* osi pou ranpli sa Dimans le 28 Zilyet.

(APPLAUSE)

HON WAVEN WILLIAM

Akoz Mr Speaker? Akoz parey direksyon sa Mosyon, lazenes i en mazorite Seselwa. Zot apresye e pe siport sa kanpanny en lespri positif ki *LDS* pe prese e ki vizib atraver transformasyon ki pe arive dan pei.

Zot pe koz 43 an. Seselwa pe eksperyans kalite e lenpak pozitivite dan zis 4 an gidans e direksyon sa Dirizan *LDS* Mr Speaker.

Ki wi Mr Speaker, i neseser atraver plis bann aktivite pour devlopman moral e spirityel ki nou zenes i bezwen pran en lapros pli pozitiv pour li menm realiz son rev, epi osi benefisy.

E ver sa demars Mr Speaker, menm si Lopozisyon pa siport nou, sa pep ti byen dan son swa gouvernans Oktob 2020. E lo sa kote latab Mr Speaker, nou pa pou zanmen les tonbe.

Pa fini Mr Speaker. Nou konnen ki en mazorite pep Seselwa pou *stand strong* ek Prezidan Ramkalawan an 2025. Mersi Mr Speaker. Mersi Mr Speaker.

(APPLAUSE)

MR SPEAKER

Mersi Onorab. Bon, nou'n termin deba avek sa lantervansyon e loter Mosyon Onorab Samynadin a fer son repons.

HON KELLY SAMYNADIN

Mersi Mr Speaker e bonn apre midi tou dimoun a lekout. Mr Speaker, avan mon prezant bann rekmandasyon tre signifikan lo sa Mosyon, mon ti a kontan remersye tou mon bann koleg Onorab pour zot lantervansyon.

En remersiman spesyal i al pour bann ki'n konpran vre rezondet ki mon'n anmenn sa Mosyon. Notaman bann Manm lo kote *LDS* osi byen ki Onorab Spiro e Onorab Lemiel, ki zot osi zot in anmenn bann kontribisyon e bann rekmandasyon valab e pozitiv.

(APPLAUSE)

HON KELLY SAMYNADIN

Lobzektif sete pa pou kritik personn, ni pou vin fer politik. Me pou ankouraz tou bann partener kle dan devlopman spirityel e moral bann zenn, pour zot osi partisip pli vivman avek zot dan bann aktivite ki ganny organize pour zot avek en lespri pozitiv.

Mr Speaker, in annan plizyer rekmandasyon tre signifikan ki'n ganny fer resorti e zot konm swivan; mon pa pou nonm non tou Onorab ki'n koze. Mon pou fer resorti bann pwen rekmandasyon ki mon santi i ase relevan pou fer resorti.

Ki bann artis i angaz plis dan bann mesaz pozitivite pour nou bann zenn atraver bann form lar.

Ki i annan plis sinerzi ant Minister Ledikasyon ek *SIFCO* pou pli byen ankadre bann

etidyan spirityelman, pour ki personn pa ganny kit deryer.

Ki bann paran i angaz plis dan ledikasyon zot zanfan avek bi pou ankouraz zot lo benefis etidye e sipor pour bann ansenyan.

Ki nou konman bann Manm Lasanble nou *lead by example* atraver nou aksyon e konportman konman bann dirizan dan kominote.

Ki lorganizasyon bann aktivite pour bann zenn i ganny revwar, ki swa atraver en *survey* avek bi pou fer sir ki zot pa pe ganny ekspoze avek bann move lenfliyans.

Ki bann Polisi pa zis ganny drafte. Me ki bann paran, bann ankadrer, sisyete civil ek lezot dirizan dan kominote i vin pli pratik an sa ki konsern promosyon bann valer moralite ek spirityalite an azisan konman bann *role models*.

Ki bann paran i rekonnnet ki ledikasyon bann valer spirityel e moralite i konmans dan lakour e ki zot amplifie zot zefor lo la.

Ki size *teenage pregnancy* i ganny get pli pre avek bi pou redwir lakantite ka ki ganny raporte.

Ki plis resours i ganny met a dispozisyon bann zenn kot lorganizasyon aktivite

kominoter pour bann zenn i konsernen.

Ki alokasyon finansyel pour bann zenn sportif *Inner Islands* i ganny revwar, anvi ki zot bann kou deplasman i pli o.

E finalman, ki Komite MYSCC dan Lasanble Nasional i fer pouse azanda lazenes pli devan avek bi pou anmenn plis sipor pour zot.

Mr Speaker, bokou Manm ki'n entervenir in nonm plizyer aktivite pozitiv ki'n ganny organize lo en konteks nasyonal li menm dan zot distrik.

Se pour sa rezon ki mon ti a voudre fer Onorab Aglae atraver ou Mr Speaker, konpran ki responsabilite aktivite dan distrik pa retom zis lo Gouvernman letan nou pe koz lo resours. Annou nou osi bann dirizan dan kominote aret pares e aprann tap laport bann sponsors!

(Interruption)

HON KELLY SAMYNADIN

I annan en kantite *businessman* ki pare pou ede. Me si nou, nou pa ouver laport pour sa bann loportinite partenarya, byensir nou pa pou fer naryen e nou pou asize nou pou kritik partou kote!

(APPLAUSE)

HON KELLY SAMYNADIN

Letan ki li i pe esper *Godo*, nou bann Manm lo sa kote latab nou pe bouze, nou pe fer aksyon e nou pe travay ek dimoun dan nou kominate.

Mr Speaker, sa Mosyon pe senpleman demande ki tou parti prenan i partisip akote bann zenn dan bann aktivite, ki moralman e spirityelman byen konman en form lankourazman pour zot.

E la mon pou profite pou felisit ankor enn fwa nou Gouvernman, kot i pe ankouraz nou bann zenn pou envestir dan zot ledikasyon akote sa Programm *Scholarship Tradisyonnal*. E sa i atraver sa *Education Loan Scheme* ki ti lanse lannen pase.

Gouvernman pe osi apartir sa lannen entrodwir en novo *scheme* kot i pou *fully fund 5 scholarships* dan domenn *ICT*. Sa i enn bann lobzektif nou Gouvernman pou met lanfaz lo devlopman *ICT*. An vi ki i annan bokou demann pour sa kalite *skill*, Gouvernman pe konmans kree plis louvertir an preparasyon pour lavenir.

E ler mon pe koz lo lavenir, mon pou refer lo nou fitir pros. E sa se an 2025 Mr Speaker. 2025 pou en lannen

ase sarze. E la mon pa pe refer lo eleksyon. Me lo en konteks sportif e artistik, nou pou war Sesel kot pe host Zwe *CJSOI*, kot nou bann zenn pou ganny sans eksplwat zot bann diferan talan.

Sesel pou pe osi organiz *FIFA Beach Football World Tournament*. Sa i pou en levensman istorik kot pour la premyer fwa nou pe pe temwanny en tel *tournoi* lo nou later. Ankor en lot lakonplisman pour nou bann zenn.

Mr Speaker, tre byento an Out Lekol Ladans pou pe al partisip dan en *Workshop Sidafrlik* avek bi pou amelyor zot efikasite konman en lenstitisyon. Mr Speaker, lalis i tro long.

Me sa i serten parmi bann lakonplisman sa ki konsern lazernes ki pe pran plas dan nou pei. Si nou bann zenn napa gidans, definitivman zot pou deroute.

Onorab Naidu in mansyonnen ki perseverans, determinasyon, sakrifis i parmi bann eleman kle ki nou bezwen pou ariv kot nou bezwen arive.

E wi Mr Speaker, mwan mon enn sa bann zenn ki'n pas dan tousala pou ariv kot mon ete ozordi. Sa ki nou reve pour

nou vini pa pou zanmen vini si nou asize nou espere.

Mr Speaker, mon pou dir ki wi, laspe moralite e spirityalite ensi ki bann bon valer i vreman esansyel pour nou kapab anlinyen avek sa ki nou vreman anvi vini dan lavi.

Nou kapab annan pli zoli sertifika, degre, *masters* e doktora, me si nou konportman pa bon, nou pa disiplinen, nou pou *fail* dan lavi.

Konman en zenn ki'n grandi avek en manman tousel. Mon'n war li kot in plere, kot in *struggle* pou fer 2 bout zwenn, zis pou asire ki nou annan manze, delo pou bennyen, lalimyer pou ekler nou e liniform pou al lekol. Mon ti trouv mon plizyer fwa mwan tousel avek mon frer kot lakaz akoz mon manman ti travay *shift*.

Onorab Cosgrow atraver ou Mr Speaker. Mon manman pa ti depan lo *welfare* li. I ti travay dir. Se sa ki son paran ti enkilke dan li.

Mon'n servi mon manman Christine Rose ne Samynadin konman en model. E mon'n travay pour mwan kapab ozordi pran larelev dan mon pei e vin en *success story*.

(APPLAUSE)

HON KELLY SAMYNADIN

Se pour sa rezon ki mon pe ankouraz tou dimoun, enkli bann zenn zot menm, pou kontinyen reflesir lo lafason ki nou pe viv. Lo kalite legzanp ki nou pe swiv. Akoz apre tou, se nou pei Sesel ki pou ganny met an kestyon.

Mr Speaker, atraver ou mon oule dir avek Onorab Gill; si ou ti'n lir sa Mosyon avek en lespri pozitiv, byensir ou pa ti pou'n trouv zis bann largiman negativ pour ou vin avek pour ou gat sa Mosyon.

Si sa ki nou ti pe koz lo la yer napa naryen pou fer avek sa ki nou pe koz lo la ozordi, akfer ki nou bezwen relye zot avek kanmarad?

E si sa metafor "pil lo li" i en lekspresyon ki vilger pour ou avek ou parti, akoz ki *Leader Lopozisyon* ti dir dan en zot bann *rally*, se li ki siny Pillay e se li ki pou pil lo *LDS*?

(APPLAUSE)
(Interruption)

HON KELLY SAMYNADIN

E pa blye, se sanmenm sa metafor ki ti fer zot ganny met deor an 2020. Wi Mr Speaker, se sa rezon zot fristrasyon. E letan ki zot pe ganny nerf pil lo li, nou pa blyi zot byen vit nou osi.

Lekel ki ti sant Flit tou karya? Kile Lopozisyon? E la tou dernyen rer, "Hit and run"? E lekel sa dirizan ki ti dir ki si zot retourne pouvwar, sa ki pa siport zot pou retrouv li dan en rigol anba en pon?

(APPLAUSE)

HON KELLY SAMYNADIN

Mr Speaker, sa ti zis en pti *reminder* an ka zot ti'n blyie. Dan plas asize, pwenti ledwa e akize akoz pa zot ki dan Gouvernman. O kontrer, annou travay ansanm pou siport nou bann zenn lavenir nou pei.

Mr Speaker, mwan mon pa pou zanmen aret dir sa mo pozitivite. I en mo ki mon pou kapab repet li 100 fwa, 500 fwa e menm mil fwa si fodre!

Akoz i pa en mo ki fer mon per e mon pou viv li tou mon lavi! Dan distrik Au Cap nou'n fer plizyer keksoz pour lazernes Au Cap. Nou'n konstrir *seating facilities* pour laplenn foutbol. E tre byento pou annan konstriksyon fasilitate twalet. Pour nou bann zenn tousala Mr Speaker.

Resaman, nou'n fer en aktivite *mural painting* kot lekol Au Cap, avek bi pou senm bann mesaz pozitiv pour bann zanfan ek lezot zabitan nou distrik.

Mr Speaker, lannen pase nou ti organiz en *charity event* atraver en *beach fiesta* pou raise Fon pour zabitan ki ti enkli zenn, parmi ki pe fer fas avek serten sityasyon, primordyalman ki annan pou fer avek zot lasante.

Nou'n osi al tap laport pour ki tim foutbol Au Cap FC i ganny sponsor plizyer lekipman pour zot klib kapab fonksyonnen.

Tre byento, nou pou temwanny en manifestasyon sportif rezyonnal ki pe organize par en group zenn sorti dan distrik Au Cap.

E byensir konman Manm Lasanble pour sa distrik, mon pe donn zot tou mon sipor pour ki sa aktivite i a kapab vin en realite. Mr Speaker, sa ki pa vwar kler pa pou zanmen vwar kler.

Mon pou termin mon lentervansyon avek sa pwen refleksyon. Si nou konman paran e dirizan nou bes nou lebra lo nou bann zenn, e nou pa ankouraz zot pou vin bann bon sitwayen, eski nou konsider nou konman bann patriyot ki vreman annan nou pei Sesel aker?

Avek sa Mr Speaker, mon pou remersye ou e mon pou demann sa Lasanble pou siport

sa Mosyon pour lanmour lazennes Seselwa. Mersi.

(APPLAUSE)

MR SPEAKER

Mersi Onorab pour ou repons lo deba ki'n termin konsiderasyon sa Mosyon. Mon pou prezan envit bann Manm pou vote lo sa Mosyon. Mon pa tro krwar zot bezwen tro bokou pou fer zot rapel sa Mosyon. E mon a zis lir son *wording* avan zot vote.

Avek bi pour kontinyelman ankouraz nou bann zenn pou viv en lavi ki sen, e pour promot lespri pozitivite dan nou pei, Lasanble pe demann avek tou parti prenan, enkli piblik an zeneral, pour partisip plis dan bann aktivite ki ranforsi en devlopman moral e spirityel solid.

Manm ki an faver lev lanmen silvouple? Mersi. Manm ki kont? Lo Mosyon ki mon fek lir, 22 Manm in vot pour, 0 kont e 8 in *abstain*. Donk, Mosyon in aprouve par Lasanble.

Nou'n arriv en ler ki mon krwar nou pa pou kapab pran en lot *item* biznes. Si nou pran poz la e nou trounen 4 er mon krwar i pa pou fer zistis okenn biznes ki nou sey dil avek la.

Donk, mon mazinen nou a termin la. Me selman avan nou

terminen, parey nou ti'n dakor dan *ABC*, nou'n ganny rapor sorti kot *Bills Committee* lo zot konsiderasyon pour *Bills* ki ti devan zot.

E nou ti'n dakor ki depan lo zot fini – depan ki zot in fini avek travay, nou kapab fer en *Revised Order Paper*. E nou'n gannyen sa konfirmasyon. Alor mon ava envit Madam Deputy Clerk pou fer *Revised Order Paper*. Onorab Pillay, wi?

HON SEBASTIEN PILLAY

Si mon kapab *beg* ou *indulgence* pou met lo rikord Lasanble nou pozisyon regarding sa ki ou fek dir lo bann *Bills*.

I ava en *fair representation of* – akoz ou'n dir ou'n ganny lakor *ABC*.

MR SPEAKER

Wi. Wi.

HON SEBASTIEN PILLAY

Mon ti a kontan ou met lo rikord ou pozisyon.

MR SPEAKER

Si ou pe koz mwan lo bann pwen ki ou'n leve dan *ABC*. Mon permet ou met li dan Lasanble la. Nou pe reste lo sa size ki ou'n leve deza. Wi?

HON SEBASTIEN PILLAY

Avek ou permisyon Mr Speaker.

MR SPEAKER

Wi.

HON SEBASTIEN PILLAY

Mersi bokou. Mon le met lo rikord Lasanble ki lo kote *Caucus US*, nou'n eksprim nou protestasyon an relasyon avek bann *Bills* ki pe ganny mete lo *Order Paper*.

I annan en *Bill. Penal Code (Amendment) Bill* ki'n fini gazete e ki nou, nou santi i devret ganny mete pour *First Reading* lo *Order Paper* e nou pa pe war li. Me nou pa'n kapab ganny Lagreman avek Lasanble lo sa size.

So nou le met lo rikord nou pozisyon. E mon pou aret lanmenm la Mr Speaker, baze lo ou lendilzans ki ou'n donn mwan e permisyon ki ou'n donn mwan pou koze. Mon pa ti a kontan ki sa i envit okenn deba, akoz sa i nou pozisyon ki nou nou'n pran lo *ABC*. Mersi.

MR SPEAKER

Wi, i pa size pour en deba e mon pa pe ouver en deba. Me selman mon a donn Onorab Georges *Leader* Biznes Gouvernman laparol, akoz li osi in annan en pozisyon lo sa pwen ki ou'n mete. E mwan osi mon annan en pozisyon lo sa pwen ki ou'n

mete, ki mon pou met devan Lasanble. Onorab Georges, ou annan laparol.

HON BERNARD GEORGES

Mersi Mr Speaker. Mr Speaker mersi. Mon pa pe pran okenn pozisyon akoz mon pozisyon se pozisyon *Standing Orders* ki anba Order 13(5) i dir ki se Clerk anba ou direksyon ki pou prepar en *Order Paper* an konsiltasyon avek sa 2 *Leaders'* dan Lasanble.

Set egzakteman sa ki'n arive. Clerk in prepar *Order Paper* anba ou direksyon apre ki in konsilte nou. Sel problem se ki *Leader Lopozisyon* ti anvi en serten direksyon. Sa pa'n ganny retenir.

Alor dan en lespri demokratik, se anba ou direksyon ki Clerk i prepar *Order Paper*. Nou, nou napa naryen pou dir plis ki sa. Sa se nou *Standing Orders*. Mersi.

MR SPEAKER

Mersi Onorab Georges. Mon pwen ki mwan mon'n fer se ki menm ki *Standing Orders* pa dir pou dir ou bezwen travay *Bills Committee* avan ou met en *Bill* pour *First Reading* - en prosedir ki Lasanble – e *ABC* in aksepte ki nou regarde kote *Bills Committee* i ete avek bann *Bills* avan nou konsidere.

Mon rekonnet mon lobligasyon anba Konstitisyon pou konsilte *Leader Lopozisyon* lo lord dan ki bann *Bill* i ganny mete dan *Order Paper*.

Me nou kontinyen swiv sa menm prosedir. E se pour sa ki ozordi nou'n esper sa rapor sorti kot *Bills Committee* pour nou fer sa revizyon *Order Paper*. E mon ava envit a se moman Madam Deputy Clerk pou prezant *Revised Order Paper* pour nou permet nou met *First Reading Bills* ki zot in konsidere.

MADAM DEPUTY CLERK

Mersi Mr Speaker. *This Act may be cited as the Central Bank of Seychelles (Amendment) Act, 2024.*

This Act may be cited as the Wild Animals and Birds Protection Act, 2024. Mersi.

MR SPEAKER

Mersi. La lo *Central Bank (Amendment) Act, ABC* in diskit sa semenn pase e osi sa semenn. E sa i kler ki nou annord pou met li lo *Order Paper* pour *Second Reading*.

Lo size *Wild Animals and Birds Protection*, nou pa'n diskit sa dan *ABC*. Donk mon ava pran sa prosedir pour mwan konsilte *Leader Lopozisyon* lo met sa lo *Order Paper* pour

Second Reading semenn prosenn. Me selman, mon ekspekte ki i pou napa gran issue lo la e ki nou a kapab prosede avek sa.

Mersi bokou. Nou ava aret nou travay la pour ozordi. Lasanble i ava *adjourn* pou repran Mardi prosen 9er. Mersi.

(ADJOURNMENT)

Verbatim Report

NAS Sitting

Wednesday 24th July 2024

Verbatim Report

NAS Sitting

Wednesday 24th July 2024